

Dr Jòusè fallen

La Santo-Baumo



C.I.E.L. d'Oc

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/ciel/>

Dr J. FALLEN

PÈR MOUNTO- DAVALO

LA SANTO-BAUMO

**POUÈMO PROUVENÇAU
EN DÈS CANT
EMÉ PROULOGUE E EPILOGUE**

**MARSIHO
A. TACUSSEL, Libraire Editour
54. Carriero Paradis,54**

1928

Musico dei roundo, cansoun e belugueto

de MARIUS ARNAUD

A la memòri de ma douço mouié

1867- 1927

LA SANTO-BAUMO

PROULOGUE

Lou fue de Sant-Jan

Espausado dóu plan. - Envoucacien. - Lei fue de Sant-Jan. - La fiero de Sant-Jan-de-Garguié. - Uno idèio de Fèlis: s'anavian à la Santo- Baumo? - Sian lèst.

L'a 'no fourèst, dins la Prouvènço,
Que soun noum soul, iéu, mi fa tresana,
Desempuèi que, dins ma jouvènço,
Lou murmur de sa voues inmènso
Uno nue mi bressè: vous li vouéli mena.

Au daut dóu boues l'a 'no grand baumo:
La Madaleno un long tèms l'a resta,
Cercant e perdoun e calaumo.
Aquéu lue sant qu'encaro embaumo
Soun souveni pïous, iéu, lou vouéli canta...

Mistral, Aubanèu, Roumaniho,
Prestas-m' un pau voueste dous paraulis;
Es l'amour pur de la patriò
Que sèmpe en voueste vers bresihò,
O cantaire preclar de noueste bèu païs.

Es l'amour dóu sòu e dei rèire
Que de-countùni empurè vouesto voues
E vous faguè, gaiard vincèire,
Leis aparaire d'us e crèire
Que de traite voudrien enclaire dins lou croues.

En vautre l'amo prouvençalo
Avié pres cors, tant la sabias eima,
Nouesto bello terro natalo,
E quand dins la lengo meiralo
Cantavias, soun ardour venié vous anima.

PROULOGUE

Oh! Leissas-m' un pau d'aquelo amo,
Car iéu tambèn àimi lou sòu natau;
Leissas soun alen e sa flamo
Rèndre ma voues un pau plus flamo,

Umble ecò de la vouestro, o troubaire inmourtau...
Coumo lou printèms chasco annado
Fa tourna-mai nisa leis auceloun,
De l'estiéu la caudo alenado
Pouso lei foulo à moulounado
De-vers la Santo-Baumo e fin-qu'au Sant-Pieloun.

Es au mié de la tubadisso
Dóu fue mourènt, la vèio de Sant-Jan,
Au moumen de la charradisso,
Après lei cant, la cridadisso,
Que deciderian, nautre, aquéu viàgi engajant.

Avian tóutei l'amo countènto,
Car, va sabès, Sant-Jan es bouto-en-trin:
S'èro, au toumba de la nue lènto,
Acampa 'n vouele de jouvènto
E de jouious garçoun autourdóu tambourin

Au bèu mitan de la carriero
S'èro fa vite un mountihoun tant aut
Tout contro uno vièio cadiero
Acoutant tres feissino entiero,
Pèire n'avié d'abord pausa lou pedestau.

Ero lou signau qu'esperavon
Lei pichoun drole... e meme un pau lei grand,
Car Jano e Pau que calignavon
Veguèri bèn que si mesclavon
Quàuquei fes ei nistoun que vendien de vin blanc.

De panié rout, de canestello,
De vièi gourbin, n'en voues? aqui n'en a;
Uno tauleto autre-tèms bello,
Un van, la paio e leis estello
D'un coulas un tinèu, tout fuguè 'nmoulouna.

De tout, de tout si carrejavo:
Canisso routo, eisino emé de trau
Titin meme à la fin pourtavo,
Es pèr dire que rèn mancavo,
De vièi capèu: Sant-Jan netejo leis oustau!

— Anen! Encaro uno brassado
D'arroumias se, pèr fini lou mouloun!...
Acò va bèn!... Doues carretado
Bèn larjo, auto, cacalouchado
Aurien pas tout pourta; Pèire diguè: — N'a proun!

Pican dei man: vèngue la flamo
Pèr un moumen, vèngue loucha la nue!
— Vivo Sant-Jan! alor si clamo,
E la moulounado s'enflamo
Au calèn d'un bouen vièi que vèn abra lou fue.

Uno subito cridadisso
Desboundo aqui: — Brave, mèste Tounin!
E d'uno foulo mouvedisso
La desaviado trounadisso
Estoufo dins leis èr lou brut dóu tambourin.

Ardènto, la flamo lenguejo
En fènt rounfla sei viravòut d'infèr
Lou brasié reno, petenejo;
S'escagassant lou boues cranejo
E la belugo escalò, esteleto, dins l'èr.

Avèn, emé la roujo caro,
Leis uei couiènt e noueste péu rima...
Que fue!... Que calourasso!... Garo!...
Tenès vous luen, plus luen encaro!
Lou fue vous bruscarie, tau d'aucèu despluma!

Leis oustau jusquo ei genouveso
Brihon bèn mai qu au ressaut dóu soulèu
Coumo l'auro dins uno teso
Quand aleno, l'èr caud souspeso
E balanço deis aubre, à l'entour dóu fournèu,

La fueio mouelo que boulego;
Quielant d'esfrai an fugi leis aucèu.
Dou tèms Tapeno fa sa plego:
A si desalena s'emplego,
Boufant dins lou fluitet, bacelant sus la pèu.

Mai quand s'amaino la flamado,
— Anen, jouinesso! anen, vivo Sant-Jan!
Touto la galoio eissamado,
Fiho e garçoun, caro alumado,

Viron autour dóu fue en si dounant la man.
Viro que viraras, Jouinesso!
Es qu'un còup l'an Sant-Jan lou meissounié!
Farandoulejo em' alegresso!
Cueie. quand poues, uno caresso!
Vendran proun lèu lei peno e la malancounié!

Aduas encaro uno brassado
De boues au fue: que flambe, grand e bèu!
Sautas à travès la flamado,
Jouious garçoun!... La dessonado
Noro, que sauto aussi, fa vèire lei boutèu!

Ai! Jaque, à travès la brasiero,
A fa 'n rescontre e ressouerte coulant:
Après lou caud vèn la fresquero,
Car n'a, dóu cantoun dei carriero,
Qu'emé de pouaire plen van engaugna Sant-Jan

E Jaque a reçu l'espouscado
Dóu proumié gisclé; au bord dóu recalieu
Dóu meme còup Claro es bagnado
En tirant lei dousso tourrado
De l'aïet sanitous e nous quielo: — Boudieu!

SANTO-BAUMO

Alor coumenço la bataio,
Bataio umido, e zóu! tè, tu! tè, iéu!
Ferrat e jarro, tout travaio:
Lei maire couchon la marmaio
E s'arrèston lei grand, quand soun nega tout viéu!

Cènt fue parié si fan en vilo
E dins lei champ; s'escaufon lei cervèu,
E quand la nue devèn tranquilo,
A charra la lengo es facilo
E si fa, vèire en man. lei proujèt lei plus bèu.

Es au mié de la tubadisso
Dóu fue mourènt, dóu bèu fue de Sant-Jan,
Au moumen de la charradisso,
Après lei saut, la cridadisso
Que Fèlis prepausè l'escapado au boues sant.

L'idèio pareissè sublimo
Tant que cadun si n'en rejouïssié
En chimant la rasado ultimo,
Idèio bello e richissimo,
Que ma fremo, à moun caire, en dourmènt n'en risié.

Si dourmè vite: èro la fiero,
Lou de-matin, à Sant-Jan de-Garguié:
La bando siguè matiniero
E davancè, gaio e lóugiero,
Lou soulèu sus lei cimo aussant soun beluguié.

Erian en joio: la pensado
De noueste viàgi au boues madalenen
Ero pèr tóutei caressado
Emé grand gau, e pèr passado
N'en charravian enca sus lou prat sant-Janen.

Se croumperian quàuquei bandiero,
Ni leis esvoto empren de devoucien,

Ni lei venduJo coustumiero
D'eisino e tèlo meissouniero
Pousquèron reteni nouesto longo atencien.

Mai basto!... Es pèr la Madaleno
Qu'au Sant-Pieloun deciderian d'ana;
Aguerian la mesado pleno
Pèr nous alesti: l'a proun peno
E jamai troup de tèms, quand fau tout coumbina.

Pamens, de nouesto escourregudo
Quand sounè l'ouro, avian fini l'aprèst:
Pèr la nue lei vano poupudo,
Pèr lou jour lei biasso boumbudo;
Lou fricot, e lou pan e lou vin èron lèst.

CANT I

La partènço

Aubagno au cagnard. - Leis iero. - Lou vièi peisan. - L'ai de moun ounce. - Que caud! - Lou soulèu de Prouvènço. - Lei cigalo e lei felibre. - La capello de Boueno-Nouvello. - La levado e lei roubino dei palun. - L'a plus de vigno. - Leis apròchi de Gèmo.

Jusquo à Sant-Pouens, en doublo bando,
Si renderian: souto soun tendoulet
E pèr lou blanc camin que lando,
Uno jardiniero proun grando
Li menè de fremeto un charmant roudelet.

Mai nautre, prenènt l'avans-gardo,
Pèr lei palun, leis ome, passerian:
Sus lou pendis que l'acagnardo,
Souto un soulèu que l'encoucardo
Aubagno èro ensuca dóu caud, quand parterian.

Dire que sènso un pau de cagno
Prenguerian vanc serié pas vertadié,
Car se noueste poulit Aubagno,

Coumo si dis, quand plòu si bagno,
Souto lou souleias aquéu jour si foundié.

Urousamen que pren l'auturo,
Coumo sabès, lou camin dei palun;
Ges d'èr pamens dins la naturo
E si perdien dins la negruro
Leis àutei chaminèio enfangado de fum.

Ero uno ouro e miejo qu'eis iero
S'adraiavian: sus lou sòu calada,
A pèd descaus, entre lei tiero
Dei garbeiroun e dei garbiero,
Travaïavon, susant, lei caucaire assedla.

Douço amigo, la gargouleta
De tèms en tèms recebié sei poutoun;
E de soun front que de pampeto
Oumbrejavon, verde e fresqueto,
La susour fiéu à fiéu goutejavo au mentoun.

Despeitrina, camié bagnado,
Tóutei leis ome espaiavon, ardènt
Souto la rodo, la caucado
En pau d'ouro s'èro menado,
Car vite avié peta la blesto en si durbènt.

Dóu tèms que s'encuco la paio
E qu'au, mitan s'amoulouno lou blad,
Lou cavalin que s'enmourraio
Aro pèr soun comte travaio
E trisso la civado, à l'ombro, apereila.

Sus lei bras aut d'uno carreto
Lei fremo an mes un flourié pèr douna
D'ombro mens caudo uno brigueto
E puei, sus l'erbo verdouleta,
Pèr lei travaïadou preparon lou dina.

Alor si fa bèn, cambarado?
Nautre cridan: — Acò si fa pas mau!

— E mounte anas? fa la gravado
Que, sus un roulèu assetado,
Coupavo en fin taioun un coucoubre verdau.

— A la santo-Baumo! li crido,
Picant dei man, Titinet qu'es jouious.
- Anen! poudès larga la brido!
La fèsto sera pas finido,
Quand li serés.—Tè! fau en mi virant, es vous,

Paire Tòni?... Sus la garbiero
Vous vesiéu pas.—Pèr l'èstre à tèms, carèu,
Partès dous jour avans la fiero?
E caviho uno cavaliero,
Lou brave vièi, risèire, au pounchoun dóu capèu.

Es, mèste Toni, un ome abile:
Cregnié degun pèr lou travai dei bèn;
Tout èro à soun gàubi facile,
E, meinagié, dourmiés tranquile,
Quand menavo la jouncho: em' éu fautavo rèn.

Aro lou pes deis an l'escranco:
S'envan lei cambo e la visto a beissa
Mai lou vièi chaine, qu'espalanco
Lou tron, laissez vèire, à sei branco,
Que Diéu, que Diéu soulet lou poudié cabussa.

Lou pèd-terrous au-jour-d'uei plego,
Car Diéu va vòu; mai l'a dès an, pas mai,
Degun coumo éu fasié sa plego:
Se coutrejavo, voulès de rego?
Founso, drecho, vaqui! Mai de touerto, jamais!

Car, éu, lou coutrié 'mé l'araire,
Lei manejava em' un gàubi tant grand
Que, mounte soun fèrri cavaire
Cinq còup passavo, un musicaire
Aurié poussu veni l'escrèure quauque cant.

Es éu tambèn, se s'enfroundavo,
Que dei fousèire èro lou capoulié;
Dounavo pouncho o davalavo,

Mai mounte soun bechard trassavo,
Coumo emé lou nivèu èro aplana lou lié.

Pèr jita 'n terro la seisseto,
Lou blad fegound que Diéu fara grana,
Pèr cui la liquor rousseto
Que s'escapo en làrgei luseto
De l'ólivo au moulin, crési que degun a

Soun adrèssu, sa man lógiero;
Eu rabroundavo, éu poudavo tambèn,
E quand la sesoun printaniero
Avié creissu l'erbo pradiero,
Menavo, dai en man, lei segaire valènt.

Pèr vendùmi, fièr destregnèire,
Coumo pas un, éu sabié 'mpielouna
E, d'aigo claro fouert bevèire,
Eimavo que-noun-sai de vèire
Dins la mastro à grand flot lou vin pur bouiouna.

En un mot, coumo un bèn si meno,
Coumo si fa l'òli, lou vin, lou pan,
Coumo la luno novo o pleno,
Segound lou gran que si sameno,

Dèu guida, va sabié, tout acò, pan pèr pan.
Aro lou pes deis an lou plego:

Ensin Diéu vou! Mai que vèngue Sant-Jan,
Dins sei veno lou sang boulego
Coumo s'aviédou vin qu'empego
Chourla 'n bouen chicouloun, e vias lou vièi peisan

Que pèr un tèms s'es rabaiado
Touto sa voio e soun biais li revèn:
De Jun la caudo souleiado,
— Tant va que l'aguèsse enebriado, —
Reviho sa vièio amo en un cors de jouvènt.

Vias pas que lou blad s'amaduro
E que deja s'alestisson lei dai
E leis oulame? Or l'amo puro

Dou bouen vièi, dins sa vido escuro,
A nourri 'no passien, un ourguei, vous dirai;

A pas vougu dins lou terraire
Qu'un autre qu'eu pousquèsse agué l'ounour
D'èstre meieur garbeirounaire;
Aussi pouedon lei garbejaire
Manda de garbo au vièi: garbeirouno toujours.

Es de-bouen qu'a jamai, sus l'iero,
Trouva soun mèstre, e s'en trouvara plus
Quouro a planta lei cavaliero
Sus la cimo d'uno garbiero,
Poues veni, mistralas, poues li boufa dessus!

— Viéu qu'en retard voulès pas l'èstre!
Nous diguè dounc lou vièi adaut quiha,
E, risoulet, de soun bras dèstre
Nous saludavo, - Es pa 'cò, Mèstre!
Respouende à la subito un gars qu'apereia

Passo de gran à la machino;
Van querre au boues remèdi pèr soun ai
Qu'es malaut, vias pas? - Laido mino!
Li fa Titin... — Sus soun esquino
Noun serié 'ntassela, s'èro gaiard, bessai!

E sa dicho galejarello
Si perde alin dins lou rounfle brusènt
De la machino ventarello
Que ramplaço, gaubejarello,
La trepalo, lou drai, e lou van, e lou vènt.

Fau vous dire qu'èro dóu viàgi
L'ai poulidet de moun ouncle Vincèn,
Ai brave, inteligènt e sàgi
Que, se li voulian rèndre óumàgi,
Dirian qu'avié de fes un semblant de bouen sèn.

Coumo Martin l'a plus ges d'ase,
Car après éu lou mouele si roumpè.
N'en rias, vautre? Ah! coumo un viedase

Vouéli que l'escàfi m'escrase,
Se, quand saurrés soun biais, li pourtas pas respèt.

Nous devié carreja pitaço,
Béure e cuberto, à parti de Sant-Pouens;
Tambèn s'enanant vuide, o chanço!
S'èro bèn vite mes en danso
Coumo un jouine cabrit que menas à la fouent,

Quouro Aguste, just sus l'auturo,
Prenguè Titin, sus noueste ai lou pausè
E nautre darrié la mounturo
Venian: ensin, causo seguro,
Dins soun viàgi en Egitò anavo Sant Jousè.

S esplico aqui lou badinàgi
Que de Titin au travers deis eiròu
Vèn de saluda lou passàgi,
E, coumo s'aqueú galejàgi
Li fasié gau, Martin sautejo tant que pòu...

Ai! las, qùnei longuei muraio
De nouesto routo aro fan un enclaus!
Pa 'n brisoun d'auro li varaio
E lou souleias que dardaio
N'ous ensuco: susan, bouièn; n'en sian malaut!..

O bèu soulèu de la Prouvènço,
Jito un velet à l'ardour de tei rai;
Sèns terni ta magnificènço,
Poues bèn, pèr un jour de clemènço!
Estre mens radius: ti counouissèn, parai?

Sabèn que de nouesto countrado
Siés la bèuta, la glòri, l'esplendour:..
Après la frejo tempourado,
Ta plus pichoto escandihado
A la terro subran redouno sa calour;

Souto toun ardènto lumiero
Foude la nèu, s'esvalisse l'ivèr,
E, fugènt davans la fresquiero,

Lei gènt d'Uba, famiho entiero,
Vènon béure tei rai coumo fan lei limbert.

E quand vèn puei la primavèro.
O bèu soulèu, se verdejon lei prat,
Se dei flour la gràci prouspèro
Se la genèsto, planto fèro,
Embaumo lei cresten de sei boutoun daura,

Se jito a bódre l'auceliho,
Dins lei bouissoun, sei cant amourousi,
Se dins l'aubre un vouele de fiho,
E jouine e bèu, s'escarrabiho
Em' un gai cridadis que fa gau de l'ausi

E cueie la frucho maduro,
Se lou blad pènde acabla de soun fais,
Enfin se pertout la naturo
De meravihóusei paruro
Si vestisse, o soulèu, va devèn à tei rai.

Sabèn que siés nouesto richesso:
Lei frueit, lei flour, ço qu'es bouen.,co qu'es bèu,
Tout crèisse souto tei caresso;
Pèr tu lou sou tèn sei proumesso
E plegon lei granié, e vèsson lei tounèu.

N'ai vuei implouran ta clemèncò
Jito un velet à tei raïoun cousènt
O bèu soulèu de la Prouvèncò
Perdrié rèn ta magnificènço,
Se ti sentian mens caud: nautre ti counouissèn!...

Mai nouesto fèblo pregaïeto
Mounto pas proun e l'astre qu'envoucan
Dèu pas l'ausi: sei pampaieto,
Entre la doublo muraieto,
Nous inoundon d'or rous e sa braso plan-plan

Sus noueste front sèmpre davalò.
Aussi tout chuto à travès lou campas...
Noun, pas tout: dins sa ramo palo

Leis oulivié an de cigalo
Qu'ajuston sa cansoun au brut de nouéstei pas...

Cantas, cigalo meigrinello,
Que de canta pèr voutro es la sesoun!
Fa caud: l'oumbro d'uno jitello
Vous aparo, e mai clarinello
S'aubouro vouesto voues souto un soulèu de ploumb.

Cantas! La calour secarouso
Vous fa brusi lou frusta dei mirau
Emé mai de fogo arderouso
E vouéstei sinfòni auturouso
An de crescendo alor que souenon jamai rau.

Cantas, qu'es brèvo vouesto vido!
Avès pas vist que la grando mita
Dei souerre emé voutro espelido
Si soun deja, pauro, esvalido?
Cantas sènso repaus: vouéstei jour soun coumta.

Cantas! Noun sigués soucitouso
De l'aveni: se lou terme es toucant
D'uno eisistènci tant urouso,
Meme quand la nue souloumbrouso
Aura coucha 'quéu jour, jitas encaro un cant.

Vouésteis armeto renadivo
Periran pas: fa lou souem ivernen,
Dou sòu mounte seran cativo,
Dins un autre cors, sèmpre vivo
Lei fara remounta lou gai trelus junen.

Cantas! Vouesto raço inmourtalo
Pòu pas mourir: sias fiho dóu soulèu
E chasco sesoun estivalo
Veira de novèlle cigalo,
Tant qu'adaut brihara soun radious calèu.

Es coumo vautreï, dous felibre:
Sènso soucit largas vouéstei cansoun
E que toujours voueste amour vibre

Pèr lou pais que voulèn libre:
Vouesto raço valènto es pas pèr mourir! Noun,

Tant que nouesto terro natalo
Aura sei frueit, soun souleu e sei flour,
E tant que l'aura de cigalo,
Nouesto patrio prouvençalo
Aura, pèr la canta, seis ardènt troubadour...

Dounc cadun susavo, boufavo
E marchavian en tirassant lei pèd;
Franc de l'ai que pèr fes quielavo
Vers lei palun si davalavo
En tenènt un grand chut, quand Jousè lou roumpè:

— Hoi! faguè tout-d'uno, aquéu fuso!
E lampejant, gai coumo un fouletoun,
— Au daut d'uno ribasso nuso
Que creirias que lei lagramuso,
Entre lei clot d'embriago e souto lei queiroun,

Soulo li fan sei proumenado,
Coumo un uiau filavo un trin esprès.
Courre aqui la ligno ferrado
Qu'à toun entour l'an aubourado
Pèr va bèn faire vèire' o vilo de moun brès,

Que de tout caire siés tant bello...
Martin subran, que dóu brut ague pòu
O bèn qu'afrounte en sa cervello
Uno loucho touto nouvello,
Martin subran si mete à landa tant que pòu.

E filo que filaras! Basto!...
Hòu!... Ai!... n'a proun!.. Ensin plouro Titin
Arrapa coumo uno lingasto
Ei crin de l'asenoun qu'embasto
Uno simple cuberto: e rapide, Martin

Davalo sèmpre vers la plano;
Venèn après, nautre, en cridant: — Houe!.. houe!..
Mai nouesto crido es d'abord vano:

Enfin souto uno oumbrouso andano
L'ai s'aplanto, e, dreissant seis auriho e sa coue,

Tout d'un-coup bramo, bramo, bramo
E sèmblo rire en fènt vèire sei dènt;
Titin soulet d'aquelo gamo
Ris pas.—Aqui, vai! as ~,es d'an~o!
Vèn Pèire; mai Titin si grato, mau-countènt...

Es ensin qu'à Boueno-Nouvello
Si trouverian: sus lou borddóu camin
La vièio e pichoto capello
Semblavo faire sentinello
Tristamen: ah! leis ome an puei tròup de verin!

Au mens uno fes dins l'annado,
Pèr Rouguesoun, l'a trento e quàuqueis an,
Venien de fiho, à gourbinado
De branqueto e de flour trenado,
Venien ourna lindau, paret, pausadou sant.

Noumbrous, à l'endeman, à l'aubo,
Dins lei draiòu! à travès lei meissoun,
Lei jouvènto en sei blànquei raubo,
Lei vièi peisan, lei prèire en aubo
Venien promena Diéu en cantant rouguesoun,

E Diéu benissié de la terro
Touto la frucho. Aro tout pouso mau
E nouesto vido s'engimerro;
Que voules? N'a que fan la guerro
A Diéu, e, verinous, anas demanda 'n pau

Au Mèstre ounnipoutènt sei gràci!
Ni! poudèn plus dins lei carriero, ei champ,
Prega lou Segnour à la fàci
Dou soulèu, car es en desgràci
Lou Diéu nouestre e dèu plus sourti dóu tèmple sant.

E lei catau, ço que fau vèire!
Aujon si dire encaro lei cepoun
De la patrio, quand lei crèire,

Lei mour, leis us de nouéstei rèire,
Lei chaupinon au sòu!... Es sei bourrèu que soun!...

Vaqui perqué Boueno-Nouvello
Despuei trento an vèi plus sei proucessien;
Tambèn, au daut de la capello,
Mounte si metien lei flour bello,
Mounte long-tèms après dessecado pendien,

Aro l'a rèn sus la façado.
Ah! passen vite! Au couer douno un turtau
Ensin de vèire deleissado,
De l'espargoulo mourdassado,
La vièio que dins l'erbo escounde soun lindau.

Marchen! Marchen! Dins la planuro
Plus bèu tablèu si mouestro à nouésteis uei:
Un verd riban de ramaduro
Courre au mitan de la jannuro
Dei restouble e dei blad: à soun ombro, au-jour-d'uei,

Que serié douço uno pausetò!

Mai caminen en proufitant dóu fres
Qu'entre la Maire e la Meireto
Jiton lei frais e lei sausetò
De la levado: aqui, dessus lou ribeirés

Que separo lei doues roubino
Passo un camin qu'es bèn proun agradiéu:
Marchen! Marchen!... Douço, tendrino,
Aqui s'aubouro, mistoulino,
La voues deis auceloun que fan: si-zi!.. piéu-piéu!

La vasto plano palunenco
D'aquí la vias si perdre aperalin:
A drecho, à gaucho, tencho unenco,
Jusquo ei limitò mountagnenco
Que dessino en festoun lou rouge petelin,

Tout es jaune e jaune: la daio
Quàsi pertout a sega lou blad rous
E lou bèu soulèu que dardaio

A douna sa coulour de paio
Eis erbo dei valat; aquéu jaune tetrous

De luen en luen, dins la planuro,
Quàunquei nouguié lou tacon tout soulet,
E s'amagant dins la jaunuro,
Vias peralin, nus de verduro,
De noumbrous bastidoun e quàunqueis oustalet.

— Digas! perqué l'a de roubino
Dins lei palun? tout d'un coup fa Titin
Au brave Jousè que camino
A soun caire; uno cardarino,
Pèr si leva lou set, devrié verni matin

— S'encaro avié toumba d'eigagno!...
Fèlis apounde. — Ah! moun paure pichoun,
Sabes pas l'istòri d'Aubagno?
Autrei-fes poussavo de sagno
Mounte viés qu'aqueste an a grana la meissoun.

— Ato! coumo va poudriéu crèire?
Se de Sant-Pouens venié pas lou valat,
Dins la Maire l'aurié pa 'n vèire
D'aigo lindo. — En estiéu! dis Pèire;

E puei Jousé l'ajusto: — E meme apereila,

Mau-grat lou se, veiras tout-aro,
Au founs de Lencho, au mitan dei canèu,
Uno sourso que fresco e claro,
A flour de terro, espiro encaro;
E lou Fauge pamens passo proun luen, moun bèu,

Qu'à la Maire alin s'embessouno!
Lei terro eici s'entre-secon jamai;
Anan vèire, larjo e redouno,
Uno pouso-raco que douno,
A quàunquei pan de founs, d'aigo tant-e-puei mai.

S'en arroso leis ourtoulaiò
Qu'as à man drecho.. Ensin Jousé diguè.
Sus lou pourtaire de sounaio

Titin quinquè plus. Tout en aio
Un moumen marcherian, puei Jousè reprenguè:

— Tè! vaqui l'aigo qu-e sourgènto!..
Eila lou pous!.. La palun, dins un tèms,
Ero un lau: dins l'aigo dourménto
Poussavo de sagno, e mourènto
La sourso de Sant-Pouens si li perdié toustèms.

L'aigo moufudo èro verdasso
E sentié mau; de boujigo en fusant
Escapavon de la fangasso
E puei, ei jour neblous, l'aurasso
Alin, vers leis oustau, pourtavo l'èr mau-san;

Aussi lei gènt èron, pecaire!
Tóutei malaut, e, dóu mau dóu fanguié
Cercant lou remèdi sauvaire,
Pèr prega courrien de tout caire
A Sant-Pèire, à Sant-Pouens, à Sant-Jan-de-Garguié.

Mai de-countùni l'orro fèbre
Vous lei segavo e coumo de mouissau
Toumbavon, quouro au flèu menèbre,
De Prouvènço un comte célèbre,
Lou bouen Reinié, vouguè liéura lou grand assaut;

Pèr acoumpli seis ordre Sàgi,
Soun counseié, Carle de Castihoun,
A travès l'afrous marescàgi,
Faguè cava, penible oubràgi,
Lei roubino qu'as vist e d'autro aperamount.

Lèu-lèu s'escampè dins la Maire
L'aigo dei terro ounte avèn travessa,
E leis eissour de l'autre caire,
D'àutrei valadet carrejaire
Alin, vers lei embut, lei faguèron vessa.

Despuei qu'ensin Jousè parlavo,
Plen d'atencien, Titin èro serious,
E rede sus soun ai badavo

Au bèu raconte qu'escoutavo.
— Que 's acò, leis embut? Aqui faguè, curious.

— Es dous grand trau, dous emboutaire
Qu'au bout dóu plan, dins de founs garagai,
Engouergon lou flot viróutaire
Que l'aduen lei regdu tetaire,
E si conto qu'après, sàbi pas s'es vrai,

L'aigo filo en sóumbreis artèro
Fin-qu'à la mar, au couchant de Cassis.
Titin aqui, tout serious qu'èro, Perdè lèu sa mino sevèro:
— Boufo! cridè: va bèn que sian defouero, eici!

— Dins la plano ensin dessecado
Pèr la saunié, si plantè 'n vignarés,
E quatre siècle d'à filado
Si veguè lei souco nousado
Que dounèron à bro lou vin claret e fres.

Ah! lou bèu tèms, va poudès creire,
Quand lei veissèu chasque an èron estré!
Ai! las, acò si pòu plus vèire;
Fan pas plus rèn lei destregnèire:
Mèste Tòni despuei a brula soun destré.

Maidóu tèms qu'ensin la charrado
Si debanavo, avian fa noueste trin
E penetra dins de terrado
Bèn plus richamen coulourado
E d'un tout autre aspèt: la plano, chincherin,

A noueste entour s'èro vestido
D'aubre noumbrous: de bèus agrefiounié
Que, l'a long-tèms, l'avien cuïdo
Sa frucho douço, acoulourido,
Puei de pesseguié jaune, e puei de coudounié

Que, gris e sedous, fasien tiero
Dins lei baragno emé sei gros coudoun;
E pueiubre-tout de poumiero

Qu'emé sei poumo dei proumiero
Nous embaumavon l'èr; e lou restouble blound

A l'erbetto verde e flourido
Avié fa plaço: ah! coumo si sentié
Qu'eici d'aigo lindo e sanido
La naturo s'es prouvesido!
De prat fres e risènt tapon lou sòu entié.

E pamens un ridèu souvâgi
S'enausso eila davans noueste ourizoun,
Couelo e cresten sènso boucâgi,
Que la rasco l'a fa ravâgi,
Que d'eici countemplan, lei pèd dins lou gazoun.

Mai l'escuei nus e fèr nous troumpo
E veiren lèu, souto un domo azurin
Que pa 'no nivoulino estoumpo,
La naturo dins sa grand poumpo:
Veici deja 'n jouièu qu'escampo soun escrin.

CANT II

Sant- Pouens

Gèmo e soun pargue: sa legèndo. - Jito, peirin! - Lei bugadiero. - Anan a la Santo-Baumo! crido Titin jouious. - Lou valoun de Sant-Pouens. - Lou ramâgi d'un roussignòu - Lei Toumpino. - La capello de Sant-Martin. - Lou feneiràgi - L'armouniouso cantarello. - Lou respouens de mèste Martin: saludavo Blanquet emé coun charmant cargamen.

Au pèd dei couelo roucassiero
Mounte estrechoun lou valoun de Sant-Pouens
Badaio, dins uno bressiero
Que li fan sei vèrdei pradiero,
Gèmo juego lou jour e la nue fa soun souem.

Emé seis aubras que l'oumbrajon
Quand dins l'estiéu l'engauto lou soulèu,
Emé sei,cascado que rajon,

Emé seis aucèu que ramajon,
Serié 'sta 'qui d'un rèi lou sejour mai que bèu,

Fuguèsse plus grando sa taio;
Se fau d'aiours n'en crèire lou renoum
Que l'a fa 'no legèndo gaio,
Gèmo es lou cabus de Versaio
E l'un de sei quartié n'en pouerto enca lou noum.

Lou rèi Louis quatorze de Franço,
A Sant-German, li prenguè 'n jour l'enuei,
—dóu passat duro rermembranço,
Pèr l'aveni desesperanço,
De vèire à l'ourizoun, toujours l'óufuscant l'uei,

De Sant-Danis lei toure bello
Coumo un signau pounchejant vers lei niéu,
De Sant-Danis que sei capello,
Dins lou maubre que l'enmantello,
Gardon deis encian rèi lou cors noun renadiéu.

Estènt pas fraire de la Trapo,
Trouvavo ensin gaire plasènt, lou rèi,
De sounja que degun escapo,
De qu viéu souto la grand capo,
Mounarco o simple gus, à la coumuno lèi

E que la mouert nous egaliso
Tristo pensado, anas n'en counveni,
Quand l'astre que vous favouriso
Sus terro vous emparadiso!...
Aor dounc, sounjarèu lou rèi faguè veni

Touto la dòuto ribambello
Deis architèite, e, nouvèu Saloumoun,
Noun plus à Diéu, mai à sei bello,
Dreissè, souto d'àutreis estello,
Un tèmple majestous e digne de soun noum:

Siguè lou palais de Versaio.
Aqui Le Notre, un baile-jardinié
Que n'a gaire agu de sa taio,

Sout lei fenestràdei muraio
De l'inmènse Castèu, menant un vermenié,

Un pople ardènt de travaiaire,
Vous bouleguè prefoundamen lou sòu,
Cavant, carrejjant de tout caire,
E souto sa man de doumtaire
Neissè 'no meraviho, un grand jardin tout nòu:

L'avié 'qui de làrgeis alèio
D'aubre superbe e de vàstei barquiéu
Que l'aurihavon lei ninfèio,
E de prat verd na de la veio
E de fouent que soun aigo adamount vers lei niéu,

Pèr lou souleiet coulourado,
Devié.giscla... Paure! que vous dirai
A la reialo rampelado,
L 'aigo, de troup bas bournelado,
Refusè d'óubeï... N'aguè 'qui de varai!

N'en fauguè de plan, de machino
Pèr la soumetre au bouen plesi dóu rèi!...
Dins aquéu tèms... Ah! la couquino!
De moun raconte eici l'espino!
Urous aquéu, sabès, que sènso vèire crèi!...

Aurias d'aiours pas pou scu vèire
Ço que vau dire, estènt que si passè
De nue,dóu tèms de nouéstei rèire;
Iéu, trovi poulit de va crèire...
Dins aquéu tèms, disiéu, uno fado pensè,

- Fado gaio, galejarello,
Que serié bèu de juga'n tour au rèi,
E, de Gèmo, la farfantello.
Coumo èro fado assoustarello,
Dins uno nue, bravant lei sourdat e la lèi,

D'aquéu bèu jardin,de Versaio
N'en raubè 'n troues; lou' plus bèu chausissè;
Puei lou carrejè, touto en aio,

Coumo un aucèu pouerto uno paio,
E, flame, toucant Gèmo, avans jour lou placè;

Puei vite la richo naturo
Ajustè flour, aigo, auceloun, soulèu...
Viéu qu'aquelo vous parèis duro
A-n-avala, mai pamens puro
La verita s'escounde aqui souto un simbèu.

Es bèn la memo man artistico
Que de Versaio e de Gèmo a traca
Lei jardin e qu'a mes, esquisto,
Tant de bèuta souto la visto
Dou bèn-astru qu'à Gèmo un jour vèn s'espaça!

Es pas eici que l'aigo manco
Pertout de fouent, de sourgènt, de pesquié,
De jiet d'aigo que jusquo ei branco
Mandon sei perlo; l'oundo blanco
Orlo de soun argènt lei verdejant pasquié.

Oume, piblo, chaine, platano,
Aubre ramu dóu capèu magistrau
E de tout boues formon d'andano
Que lou soulèu tout-just trepano
E que rèn pou clina, pas meme lou Mistrau.

Em' acò l'auro sèmpe aleno
Dins lou fuiàgi e fa 'ntèndre adamount
Sènso relàmbi sa voues pleno;
E dei teso que n'en soun pleno
Souerte lou gai piéuta dei jóuineis auceloun.

Dins uno estrecho valounado,
Un long tapis de gazoun e de flour,
Souto uno vouto auto e ramado,
Ei fèsto e danso acoustumado
Sèmblo envita lei gènt... Oins aquéu lue d'amour,

Que de poutoun, dessus l'erbetto,
De bouco à bouco an degu vouteja!
Es bèn dous: - Parai, lei fiheto?

Quand la soulitudo es tant quieto
E fa boumbi lou couer, de vous poutouneja!..

Ai! las, si fisant de moun dire,
S'un amateur venié vuei roudejant
E vesié rên, em'un sourire,
Creirié qu'en mei sêns en delire
Aquéu pargue famous l'âgui vist qu'en sounjant.

De barquiéu se la longo tiero
Aro encenturo un restouble tout nus
E lou vièi castèu, dins uno iero,
S'estalouiro en pleno lumiero...
V'an vougu 'nsin d'esprit qu'apoucharien pa 'n fus.

Viéu bèn, Gèmo, souto l'oumbràgi
Qu'uno cascado à Floro rajo enca;
Mai monte soun tei verd bouscàgi?
Monte es toun seculàri aubràgi
Que de conse malaut leissèron escranca?

E qu saup se toun destin triste
Vèn pas de Diéu que, venjant lou passat,
Vou que nouesto amo si countriste
E que plus rên de bèu sussiste
Monte un sang generous àtrei-fes a vessa?

Que vau dire?... La mouert crudèlo
De toun marqués es pa 'n crime de tu:
Sa famiho ti faguè bello,
Mai l'as toujours resta fidèlo
E, d'Albertas mourènt. plourères sei vertu.

E puei siés pas tant malurouso!
T'an pas rauba toun entiero belour;
Toun ombro es encaro! óudourouso;
Rajo enca toun aigo courouso
E l'a 'ncaro d'aucèu pèr poutouna tei flour!...

Es aquelo idèio mai gaio
Que mi venguè, tout en seguènt noueste ai
Au dindamen de sei sounaio,

Quouro, au carreiroun que s'endraio,
En virant, vers Sant-Pouens, mountè lou dous cascai,

De l'aigo lindo que cantavo
Dins lei valat... Ai! ai! subran Martin,
Inchaiènt dóu fais que pourtavo,
A l'aigo basso s'amourravo
E, fuguèsse pas iéu, samenavo Titin.

Aguessias vist rire lei fiho
Qu'à soun lindau prenien aqui lou fres!
Nous semblè 'ntèndre l'auceliho,
Quand, lou matin, s'escarrabiho
Lou long d'uno baragno o dins un vignarés.

Mai l'autre, à miejo-voues: — Lei saumo!
Mi dis, e lèu, s'enarcant tant que pòu
Pèr moustra que fa pas la paumo,
Crido: - Anan à la Santo-Baumo!
- Em.'enca'n pau, li fa 'no bloundo, ères au sòu.

En esperant, adré mountaire!...
E vague mai, vague de perleja
Lou rire argentin de tout caire,
E lou paure Titin, pecaire!
Verpougous, amudi, saup que richouneja.

Subran de la carriero redo
Qu'à drecho escalo au dautdóu vilajoun,
Coumo à sei cabro em' à sei fedo
Quand lou pastre duerbe sei cledo,
Desboundo davans nautre un troupèu de pichoun.

Ah! s'avias vist quénteï figuro
E quent escuei! Un artisto aurié fa,
En lei prenènt d'après naturo,
De flamo e risénteï pinturo:
Coumo d'un troumpetoun qu'es en trin de boufa

L'avié de facho gautarudo;
N'avié de gras; n'avié qu'èron lisquet
Emé leis espalo pouchudo;

Mai tóutei, grand Diéu! que tengudo!
Vous ai di, va sabès, que fasié pas fresquet,

Aussi touto aquesto marmaio
Avié carga seis àbi lóugeiret,
Tout- just la camié 'mé lei braio
E pèr fes mié-capèu de paio:
Lei blound coumo lei brun èron tóutei mouret.

Foueco manjavon la candèlo
Em' un bouen pan de crasso sus lou nas:
E vous avié, la ribambello,
Ve cambo negro, caspitello!
E de pèd! e de man!...
L'aigo es coustouso, anas!

L'escabouet, trelusènt de joio,
De-reculoun davans de gèns farot
Sautavo: encaro proun ravoio,
Uno vièio venié, galoio,
Au bras d'un brave vièi majestous coumo un ro.

Pèr uno douço ceremoni
Avien passa touei dous sei vièsti bèu,
Relicle de soun matrimòni,
Se n'en préni pèr testimòni
Lei ple qu'à soun coutet fasien coumo un soulèu.

Davans lei dous vièi caminavo.
Pourtant un móussi e semblant trapia d'uou,
La bailo que si bindoussavo;
Dei pichoun la bando cridavo
En li sautant autour: — Jito, peirin, couguou!

De tèms en tèms, coumo à pognado,
Dins soun boussoun lou vièi prenié dous sòu
E, dins la pleno moulounado
Dei marrias que fasien chamado,
Zóu! vague de manda soun tresor pèr lou sòu.

Boudiéu! coumo la troupo lèsto
Lèu si jitavo ounte avien roudela
Lei pièd, e, tèsto contro tèsto,

N'en falié vèire la batèsto,
E lei vièi, d'aquéu tèms, s'esquihavon eila.

Mai de nouvèu l'escabouet lando,
Countènt o noun: — Jito, peirin crassous!
Jito! crido la gaio bando
Que li danso la sarabando:
Jito, que lou pichoun! li fan, serié gibous!

E mai dins lou valat s'amourron
Moute a dinda, puei sus lou plus urous
A tiro-péu, zóu! tóutei courron:
Pousson, toumbon, s'ausson, si bourron
E cridon tourna-mai: — Jito, peirin crassous!

Es prèchi la fouent poulideto
Dóu vilajoun, moute quatre dóufin
Douçamenet racon l'eigueto
Dins uno conco redouneto,
Qu'ensin rescountrierian e meirino e peirin

E lei pichoun fasènt seguidò,
En cridassant: — Jito, peirin cougou!
Noueste Titin subran óublido
Soun auvéari e coumo la crido
Es troup brèvo à soun goust, en bramant coumo un buou:

— Qu'a pas doui liard, éu vito ajusto,
Pèr si tapa... Pòu pas fini, car, zóu!
Lou peirin qu'acò tarabusto,
En plen nas d'uno man roubusto,
L'alongo uno pognado en li cridant: — Atout!

Mai Titin emé la crespino
A degu nèisse: ensin, que vous dirai?
Lei sòu tout-bèu-just sus sa mino
Avien touca, qu'à la rapino
Sei man leis avien pres; sus lou coup, es vrai,

S'esfraiè bèn uno brigueto
En si sentènt lou nas enmalauti;
Puei de plesi faguè riseto,

Quand si veguè dins lei maneto
Tres sòu plen de verdet, tres sòu proun enclouti

Mai pamens de boueno mounedo
E li pichoun, jalous de soun butin,
Contro éu, coumo d'aucèu de predo,
Menèron uno atacò redo
E, siguèsse soulet, noueste paure Titin,

Lou chabissien dins l'escaufèstre
De nouesto ajudo aguè 'n moumen besoun;
Aguste, pèr un coup de mèstre,
Lou tirè lèu de soun mal-èstre: [soun,
Prenguè quàuquei dardèno au founs de soun bous-

Au mens dès sòu dins la pognado,
E, si virant dóu coustat de la fouent,
Dins la conco, à la voulado,
Zan! de manda! Descervelado,
La troupo deis enfant, quand entènde lou souen

De tant de peceto lusènto
Que fan din-din e qu'uiaussant en l'èr
Toumbon dins l'aigo frenissènto,
La troupo, toujours mai ardènto,
Abandouno Titin, e coumo de cat-fèr

Contro la fouent si precepito:
Alin, au founs, lei sòu si vien lusi;
Que n'a! boudiéu!... A la subito,
Dins l'aigo un dei pichoun si jito;
Un autre fa coumo éu: que crid! fau leis ausi!

Pouso, tu! pouso, iéu!... Estrapo
Qu'estraparas!... Bèn lèu si vèi plus rèn
Dins lou founs que la fango tapo...
Mai subran un marrias destapo
Lou tap de boues: que joio!... Alor tóuteis ensèn

Encambon lou bord de la pielo,
Lei mourvelous, e coumo de canard
Bouigon dins la fangasso, e fielo

La susour sus soun front... E quielo,
Quielo lou femelan que s'es, sènso retard,

Sus la plaço acampa pèr vèire
Pàurei pichoun que soun trempe e fangous!.
Mai d'aquéu tèms, va poudès crèire
La bailo e lou móussi e sei rèire
Avien despareissu; nautre, pau soucitous

D'afrounta la lengo dei maire
Que risien plus, tambèn caminerian...
Au pas gai de noueste bramaire,
Siguerian lèu de l'autre caire
Dóu vilajoun: aqui lou camin que seguian,

Contro la roco escalabrouso
E lei baus nus, dirias que va fini,
Car lei mountagneto neblouso,
Que bordon sa brèssso óudourouso,
Dei dous coustat sus Gèmo aqui vènon s'uni.

Mai pamens la roco badaio
E lou camin pren subran lou countour,
Ribejant l'aigo claro e gaio
Qu'au Fauge e dins sei biau cascaio
Escoundudo à mita souto l'erbo e lei flour.

De fremo aqui touto uno tiero
Fan sa bugado e bacellon: pan! pan!
A ginous, messo à la lógiero,
Travaion la journado entiero
E perdon rèn de tèms si lengo ni sei man.

Ah! vous n'en chaplon qu'àuqueis-uno
En bacelant tout lou franc jour de Diéu!
Micoulau qu'a rauba sa bruno,
Fino qu'an vis au clar de luno,
Lou mègi, lou curat, cadun passo au lissiéu

E n'en souerte pas blanc, pecaire!
Lou plus souvènt... Li meton ges de mau
D'aiours nouéstei bouénei coumaire.

Oh! ges! mai coumo faudrié faire
Pèr resta mudo un jour?... Alor charron un pau!...

Quand passerian, uno bruneto
Fasié l'arengo en plegant de lançou:
Sus lou comte d'uno nouvieto
Anavo, anavo sa lengueto
E leis outro risien à si tirassa 'u sòu.

Mai soun tambèn galejarello
Lei bugadiero e va moustrèron bèn:
Tre nous vèire, cado femello
Lèu nous diguè sa bogatello.
- Tè! Sant-Jóusè! fa l'uno; — Oh! paure ai! l'autro vèn,

E tourna-mai vague de rire,
Puei, toueis en couer: — E mounte anas, chichiéu?
Aurias di de fouelo en delire:
E Titin subran de li dire:
— A la Santo-Baumo! — A! pas mai? — E, sacre-biéu!

Pèr vautre aurian enca de plaço,
Fèlis li fa, se li voulias veni!
— A la Santo-Baumo, bagasso!
Fa la bruneto; eh! bèn, siéu lasso
Rèn que de li pensa!... Mai Titin fa freni

Jusquo eis ecò dei mountagneto,
Tant crido fouert seis estrambord d'enfant:
— A la Santo-Baumo, fremeto,
Demam saludaren l'aubeto!
E noun pareissié las, lou drole, en li pensant...

Mai serié dins un ouert de fado
Que tout d'un coup venèn de naseja?
De tant de gràci amoulounado
La naturo eici s'es ournado
Que sa belour subran nous fa parpeleja.

L'a 'qui doues mountagno bessouno,
- Gèmo, parèis, d'élei tirè soun noum,
— Qu'emé sei crestò auto e redouno,

A drecho, à gaucho, e proun ferouno,
S'esperlongon alin, enclausènt un valoun

Entre sei gigàntei muraio:
Sus lei pendis centurant lei baus nus,
Crèisson de pin de touto taio
E n'en serié pas foueço gaio
La visto, se vesias lei cresten tout-bèu-just.

Mai dins lou founs tout s'embelisse:
Jaises aqui, bèu valoun de Sant-Pouens!
D'aubre mai verd si li vestisse
Lou pèd dei couelo, e l'expandisse
Lou jaune genestié sei flour que sènton bouen;

L'aubre-de-Judas à flo douno,
Quand vèn Abriéu, sei bouquet perfuma
Edou printèms fin-qu'a l'autouno
Ensin Jou coumbau si festouno
D'aubre e de planto en flour coumo un claus embeima.

Ah! bèu soulèu de la Prouvenco,
Bravan eici tei dardaïoun ardènt:
Doues tiero de platano innènso,
Qu'as fa poussa, ti fan defènso
De nous uscla la caro e l'aigo qu'entendèn

Cascaiant un pau de tout caire
Refresco l'èr: pertout l'oumbro e lou fres,
E noun creirié, lou proumenaire,
Que dins la pureta de l'aire
Fas plòure sus la coumbo un brasas de fue gres:

Ta lumiero, certo, trepano
De tout coustat, mai sus lei pradarié
Que s'estalouiron, vèrdei plano,
Entre lei tiero de platano,
S'amouesso soun ardour, e d'un rebat lóugié

Vèn puei caressa nouesto visto...
Dins aquéu lue plen de fres e de lus,
Au founs de la coumbo requisto,

Nous dis uno legèndo esquisto,
Un tèmple s' aubouravo à Castour e Pòlus,

E de la bessouno neissènço
De sei mié-diéu Gèmo aurié pres soun noum.
— De peirin, vias, Gèmo es pas sènso!
Mai, basto! aquelo souvenènço
Es la provodóu mens que lou sacra valoun

Coumo aro àutrei-fes fasié flòri
E pareissié digne dei diéu d' alor
Pèr sa graciouso belòri,
Car es pa'n lue de languitòri
Lou superbe coumbau: la vido à plen desbord,

Emé l' aigo fresco e clareto,
Li rajo sèmpre: encantaire sejour,
Li vènon jovènt e fiheto,
A l' ombro douço e sus l' erbeto,
Festeja 'n autre diéu que s' apello l' amour.

E creiriéu meme qu' aquéu culte,
Qu' a proun fidèu, li dato de long-tèms
Eto! sènso que si counsulte
De libre mai o mens óuculte,
Cupidoun e Vènus li regnèron toustèms,

Acò mi sèmblo assas de crèire.
Dins un moumen, un raconte un pau gai
Nous va pourra d' aiours fa vèire...
Mai revenguen un pau à rèire,
Avans de vanega dins lei gènt garagai

De la legèndo... Eri pèr dire
Qu' ei jour de fèsto em' ei jour dimenchau
La jovènço, coumo un satire
A Sant- Pouens vèn eima, vèn rire...
Mai, dins aquélei jour, dóu travai qu' s' enchau?

A Sant-Pouens pamens si travaio,
Car, vous ai di, la vido à plen desbord
Li rajo, e l' oundo, que varaio

A travès prat e que cascaio
De-longo dins lei riéu passant ras jusquo ei bord,

Elo-memo es travaiarello:
De luen en luen l'an trauca sei valat
E sa grand masso, que roudello
Dessus lei rodo gafarello,
Fa vira lei moulin rounflant d'eici, d'eila;

E viro, viro, e fai farino,
Brave móunié! Trisso, trisso de gran,
Dóu tèms que, dins d'àutreis usino
Que plus bas la memo aigo entrino,
Vèire, dougo, papié si fabricon en grand.

E li n'en fau de travaiaire,
D'ome, de fremo e d'enfant tout ensèn!
L'eissame n'a, de fièr louchaire!
De mai lei fougous rusticaire,
En fouero dei fabrico, an de travai tambèn...

Dins la superbo valounado
Noueste courtègi avié dounc naseja!
Davans lei bèuta 'nmoulounado
Coumo dins un jardin de fado
Marcherian un moumen sènso bretouneja

Lou mendre mot e de tout caire
Alucavian, en badant un pauquet;
Mai lou silènci durè gaire
Car lèu, li tenènt plus, pecaire!
Titin sautant de l'ase: — Oh! lei poulit bouquet!

Cridavo, e vague, à la brassado,
Dins lou gazoun que n'en es clavela,
De cui lei flour embeimado
E de milo toun coulourado
Coumo un bèl arc-de-sedo; e l'entendian eila:

— Oh! n'en voulès?... Tè! lei poulido!...
Aquelò es roujo!... Aquelò es jouno!... Ve!
Uno moufado!... Uno frounsido!...

Caucavo la tepo flourido
Dei prat, e nautre erian ravi coumo éu, ma fe!

Seguian dounc ensin nouesto routo
Souto lou charme, en repetant, sousprés
— Qu'acò 's bèu!... qu'acò 's bèu!... — Escouto!
Mi fa Guste e la bando touto
S'arrèsto à soun signau: M'a sembla plusiour fes

D'ausi peralin lou ramàgi
Dóu roussignò!.. — A-n aquesto ouro?.. Anen!..
Chauriherian... Dins lou bouscàgi
Leis auceloundóu vesinàgi
Jitavon sei piéu-piéu! Mai siblant tendramen

Aurias bèn di qu'aussi cantavo
Un roussignò... Plus d'aise marcherian.
E coumo lou camin viravo,
Un flou! flou! tout-d'un-còup coupavo
La temido cansoun e tóutei veguerian

Toumba 'no grando marteliero
Dins un valat... Lou jouine roussignò,
Pèd nus e mes à la lógiero,
Au mitan deis erbo pradiero
Arrousavo en siblant e, mens candi dóu coup

Se l'ai s'èro emplana dins l'aire,
Resterian mut!... Es pas rare d'ausi
Ei champ un agradant cantaire,
Mai, viedase! noueste arrousaire
Tant bèn roussignoulavo, en l'ausènt qu'elo aussi

S'èro troumpado l'auceliho...
Eh! mai, tenès, vous raconté qu'ei champ
Pèr fes vous caresson l'auriho
De voues pleno de meloudio?...
Eh! bèn, quand nouesto routo, à drecho ribejant,

Après la darriero fabrico,
A nouesto visto aguè de Sant-Martin
Destapa la capello antico,

Uno voues douço, pouëtico,
S'enaure dins leis èr, la voues d'un serafin.

Mai toucant la vièio capello
Lou Fauge entié vous fa 'n saut esfraiious
Dins la vouto d'uno baumello
E soun aigo cabussarello
Curbié d'un sourd murmur lou cant armounious...

S'aplanterian... La valounado,
Que miejo-lègo a deja serpenta,
Subran aqui s'es relargado
E s'alongo, aro, vasto prado,
Davans Gèmo-lou-vièi, qu'es adamount planta,

Mouloun de pèiro, sus la cimo
D'un grand roucas encapela de pin...
S'aplanterian... Tèndro, sublimo,
La voues mountavo, clarissimo,
E l'èr nous adusié soun cascai argentin.

Uno jouvènto poulideto
Ensin cantavo, en seguènt, fourco en man,
Un brun segaire, e boulegueto,
Coumo dedaiavo l'erbeto,
De soun cors la cansoun bressavo lou balans.

Ero tant douço, encantarello,
La jouino voues, que, pèr miés escouta
Sa meloudio bressarello,
Travaiaire e travaiarello
S'èron, l'avié 'n moumen, coumo nautre aplanta.

Un vièi, es éu que mestrejavo
Touto la chourmo, óublidant soun martèu
Sus lou fiéu dóu dai qu'enchaplavo,
Lou vesian eila que badavo
En belant la sereno; óublidant sei rastèu

E sei fourco, rastelarello
E fièr jouvènt que viravon lou fuen
O bèn qu'en mouelo redounello

L'encucavon, de regardello
Si coungoustavon, aro en chaurihant; pu luen,

— Quand mi parlas de la jouvènço!
Un cadelas, fouert, grand coumo tout vuei,
Sus seis espalo, en que's que pènso?
Oublidant uno trousso inmènso,
S'èro arresta, tout mut, em' un fue dins leis uei.

La cantairis, pèr calignaire,
Osco seguro! es éu qu'avié chausi...
Tambèn, envejous e trufaire,
Plus à rèire un autre cargaire
L'engaugno, meichant, en li fasènt lusi

Un uei bouiènt de flamo ardènto;
E sus d'un càrri à mita plen deja,
Un autre, lei cambo pendènto,
Esperavo seis aise, e, lènto
Ausissènt la cansoun, s'èro mes à penja

La tèsto en batènt la mesuro...
Nautre, arribant, siguerian espanta
D'aquéu gai tablèu de naturo
E pivela pèr la voues puro
De l'esquisto jouvènto, avian, sènso muta,

Dubert leis uei e leis auriho:
Chale divin, quand nous pouerto, l'èr dous,
Dins lou meme alen que bresiho
L'encantarello meloudio,
Dóu fuen coupa de fres lou parfum óudourous

Que reniflan, emé delìci,
A plen de narro!... Ai! las, l'encantamen
Durè pau, car, sènso malìci,
Ni meichantiso, v'afourtissi,
Noueste ai prouvouquè lèu soun proumt esvalimen.

De la tèndro roussignoulado
La cantairis arribavo au,mitan,
Quand noueste Martin, coue dreissado,

Entamenè 'no bramassado
Que leis eco vesin, dereviha subran,

Cinq fes au mens la repetèron...
Ah! drole, anas, siguè l'espantamen,
Puei bèn lèu de rire esclatèron
Aquélei toutei qu'entendèron
A la divino voues tal acoumpagnamen,

E la meinado atravalido
Reprenguè fourco e dai... Mèste Martin
Pamens, de sa gaio bronzido,
Se nous avié cafi l'ausido,
Ero pas pèr caprici, eto! qu'avié fa' nsin

Restounti leis ecò... Pecaire!
Pèr anoncia la vengudo d'ami,
Un ase, en fidèu troumpetaire,
De que biais aurié poussu faire,
Sènso destressouna lei ressouen endourmi?

Or, un clar dindin de sounaio
A rèire lèu nous faguè regarda:
Moun Blanquet, susarènt, en aio,
Arribavo, tesant la maio,
E Martin de soun bram l'avié just saluda.

Blanquet, em'un quielet de joio,
Saludo aussi Martin... Subitamen
Uno mescladisso galoio
De voues jouino, de voues ravoio,
Ei segaire dis proun lou charmant cargamen

Qu'escounde aquesto jardiniero
Souto sa tèndo,... e vite an galeja:
— Esperas-nous, bèlle bergiero,
Qu'emé gau serian de la fiero!...
E lou rire enca mai vague de perleja.

CANT III

Lei moungeto

Lou cargargamen de la carriolo. - La cascado dóu vièi moulin. - Lou relarg de Sant-Pouens. - Lou moungié. - Lou vièi gàrdi. - Lei sourso. - L'antico capello. - De gentilome sousprés pèr l'aurige. - L'assousto au mounastèri. - La drihanço. - Blanco de Simiano e Gautié d'Aunet. - L'escoumenjo. - Lou moungié es agrasa. - Pauro Blanco!...

— Hue!... Hue, Blanquet!... E Pau Alàri
En veiturin tremuda pèr l'amour,
L'ouuncle Vincèn, soun segoundàri,
Tanquèron subran lou bestiàri
Au mitan dòu camin embauma de sentour...

Coumo lou blound vouele d'abiho
Que tout-d'un tèms lou bèu soulèu de Mai
Fouero dóu brusc escarrabiho,
Lei jouinei fremo emai lei fiho,
Descafournant aqui sei mourroun fres e gai,

De l'auto carriolo sourtèron...
Oh! bèu tablèu, tablèu meravilhous
Qu'emé grand chale devistèron
Vouésteis uei! A-de-rèng sautèron,
Deis ome s'apielant sus lei bras nerviòus,

Claro de Fèlis, sa Martouno,
Un anjounèu que comto pas dèss an,
Berto de Pèire e sa chatouno.
Roso-Mirèio, tant gentouno
Que passarias de jour à li bada davans:

Sese printèms an sus sa caro
Mes sei belour e dous sen redounet
En trin de prendre formo encaro...
Mai, chut! que s'estravian tout-aro...
Veici Jano d'aiours, souerre de Titinet,

Que si descargo après sa maire
E qu'es tambèn, ma fisto, un fin moussèu
Mai fau que la regardés gaire,
Aquesto, que soun calignaire,
Qu'es aqui la pipant coumo la serp l'aucèu,

Sèrié mau-countènt, poudès crèire,
S'alucavias lei boutelet redoun
Qu'elo en sautant pou faire vèire...
Veici puei la souerre de Pèire
Qu'en li dounant la man Jousè la bèlo proun;

Veici puei la fremo d'Aguste,
Pas laido aussi; veici ma fremo enfin!
E pèr elo serié pas juste
Que moun raconte noun ajuste
Qu'emé seis uei parlant, qu'emé soun mourroun fin

Au mié de sei coumpagno bello
Tenié soun rèng pèr la poulideta...
Eron dounc toutei riserello,
Gaïo, poulido, encantarello,
Nouvello court d'amour qu'anavian escourta

Dins soun ardidò escourregudo...
Quand toutei puei, risènt, cacalejant,
Quielant, car èron proun lengudo,
Aguèron, emé nouesto ajudò,
Cauca d'un pèd lougié lou margai verdejant,

S'anè descarga leis eisino
Un pau plus luen, après lei grand barquiéu;
Mai entandóumens qu'à l'oumbrino
Noueste ai recebié sus l'esquino
Vano, bevèndo, viéure e lou tout-bèn de Diéu

Que s'èro alesti pèr lou viàgi,
En maje part lou vouele fouligaud
Souto lou souloumbrous oumbràgi
Deis éuse emé dei pin sóuvàgi
S'enfounsè lestamen, plen d'ardour e de gau...

Eici dirias que si termino
Subitamen lou superbe coumbau:
Lei verd pinastre e leis éusino
Que davalon dei doues coulino
S'arrapon coumo un bàrri à travès de la vau:

Lou soulèu jamai li trepano
La fresqueta ni l'eternalo errour,
E quand, rajous, si l'encabano
Lou mistrau vo la tremountano,
Si l'entènde de gème à fa ferni d'ourrou.

Ah! coumo fa bèn, la naturo,
Tout ço que fa! Lou lassùgi vendrié
D'un bèu-vèire que toujours duro
E l'armounio la mai puro
Serié 'n òdi à-n-aquéu que sèmpe l'entendrié,

Car si dis que lou languitòri
Un jour neissè de l'unifourmita.
Aussi, barrant la vau tant flòri
Ounte à plen de man lei belòri
Sèmbelon escampihado, aquéu boues es planta

Pèr que la visto si repause...
En avans dounc!... Lou Fauge, quàsi se,
Nous guidara: sènso que s'ause,
Un biau, que bourdejon lei sause
E que s'escoude eila darrié lei verd-bouisset

E lei rouni, plan-plan carrejo
L'aigo aboundouso ei moulin d'eicabas
E l'aurian vist que s'espóussejo
E qu'en ample ventau sautejo,
S'avian dubert l'auriho e l'uei, un pau plus bas.

Uno outro cascado autant flamo,
Un pau plus luen, nous espèro d'aiours.
Tè! chauribas: dins la calamo
Dóu boues es soun aigo que bramo.
En avans! Soun rounflun vias que crèisse toujours.

— Hoi! que! fa Roso, uno téulisso
Entre leis aubre!... — Acò's un vièi moulin!...
— Eto! mai toucant la bastisso
Viéu deja l'aigo trounadisso
De roucas en roucas boumbissènt peralin.

E la troupo despachativo,
Pèr pu lèu vèire, alongo enca lou pas;
L'eigueto, en invésible nivo,
Subran en espouscant s'abrivo
Sus lei proumié venènt e l'espargisse au nas

Uno fino e fresco eigagnolo,
Coumo n'en toumbo, au printèms, sus lei flour,
Coumo l'auro fouelo e courriolo
Devrié proun, quand dei mountagnolo
Seren vers lei cresten nous n'aduerre toujour.

Tambèn davans l'aigo gisclanto
Dequn recuelo; oh! noun, mai restan mut!
Es, la toumbado, esbrihaudanto:
Dou cèu la capo bluiejanto,
Qu'un estras si n'en vis entre lei pin ramu,

Mando un rai de soulèu qu'uiausso
E beluguejo en milanto coulour,
Bord- qu'au flot couladis si sausso:
D'amoundaut l'oundo si debausso
Blanquejanto, escumanto en touto soun amplour,

Puei de roco en roco reboundo
E dins lou boues soun rounfle coumo un tron
De-longo restountisse e groundo,
Dóu tèms qu'uno auro sus lei broundo
Jito lou pouverèu, pèr caire e sus lou front.

Verdejon à noun plus l'aubriho
Que sus lou saut estènde sei long bras
E l'èurre qu'à cha pau resquiho
Jusquo à l'aigo, sus lei clapiho,
Emai l'erbo-dei-touero e lou muguet dei prat

Que sei mato li fan sausetto.
Vènon eici, pèr si leva la set
E dins lou fres faire pausetto,
L'iroundo gaio e l'alauseto,
Quouro an treva proun tèms sus lei baus nus e se.

Oh! chale deleitous de vèire
Tout acò bèu! Jouvènto emai jouvènt
Barrulon à l'entour risèire;
Davans un lusènt troues de vèire
La calandro jamai fa tant de vai-e-vèn.

Quand fauguè quita la cascado
Que troup de tèms nous avié pivela
Regretouso, leis afouscado
Disien qu'aurien resta tancado
Un jour,... s'avien pouscu si l'entèndre parla...

Mai mounte desboundo la sourso
Va vouliau vèire e lou tèms quicharié,
Car muso jamai dins sa curso
Lou blound soulèu, e la grando ourso
Sabian qu'à l'ouero dicho au cèu clarejarié.

Remountant dounc lou cours de l'oundo,
Après agué countourna lou roucas
De mounte boundo emai reboundo,
Pèr un draioulet que s'inoundo
Ei gròsseis aigo, lèu sourterian dóu bouscas.

Obro de Diéu! Obro sublimo!
A nouesto visto aro s'es desvela
Uno valengo bellissimo:
Au founs drèisson seis àutei cimo
De baus gigant de lus toustèms enmantela:

Es, à gaucho, Roco-fourcado
Amenaçant lou cèu de sei tres dènt
Que pèr lou trounèire embrouncado
Proun de fes siguèron brecado;
Es, à drecho, amoundaut dins l'azur si perdènt,

De Bartagno l'inmènso tèsto
Lou marinié, que sus lou toumple amar
Es agarri de la tempèsto,
Sènte un trefoulimen de fèsto
S'entre lou fiermamen e lou blu de la mar

Vis aquelo tèsto parèisse,
E crido: — Terro! en rendèn gràci à Diéu:
Aco's lou proumié pue que nèisse
A l'ourizoun e que li crèisse,
Bèn avans que pouncheje, ei marin agradiéu

De Nouesto-Damo-de-Marsiho
Lou santuàri emé sa vièrgi d'or,
Sa vièrgi d'or qu'amoundaut briho
Remembrant qu'uno maire viho
Sèmpe sus lei vougaire e l'ensignant lou port...

Au founs drèisson seis àutei cimo
Lei baus gigant: à l'escala dessus
Uno fourèst de pin si pimo,
Verdo coumo un prat que, la primo
L'aguènt mau refresca, negrejarié 'n pessu.

Mai dins la baisso s'esclarisse
La verde tencho e counfoude à cha pau
La couelo ounte lou pin trachisse
E lou relarg ounte flourisse
Lou jaune boutoun-d'or dins lou gazoun verdau.

La sciènci ajudant la naturo
E li pourgènt d'aubre de luen vengu,
Lou vaste tapis de verduro,
Que s'esperlongo de l'auturo
Fin-qu'à nautre, es d'un ouert pèr miracle tengu...

O vàutrei que sias amiraire
Deis obro grando e belasso de Diéu,
Eici venès! Iéu, crési gaire
Que la Souïssu ei regardaire
Oufrisse de sejour mai qu'aqueste atratiéu.

Oh! quant es bello la Prouvènço!
Counouissen-lo: seren fièr, Prouvençau!...
Eici d'aubras de touto essènco
Ombrejon en pleno creissènço,
Aubre neissu sus plaço, aubre sus l'aigo-sau

Adu dei pu luénchei countrado,
Aubre de couelo e de prado e d'ermas.
Dins aquesto esclargiero astrado,
Subre la tepouso flourado,
Freirejon lou fau verd e lou fau rouginas,

Aquéu que sa ramo pourpalo,
Passa l'estiéu, quouro an perdu soun toun
Leis autro, elo devèn verdalo.
Lou tihòu dei fueio argentalo
Qu'a flour jauno embaumant soun capelas redoun,

Lou plai que de sei branco duro
Fasien de lanço antan, lou sicoumour
Que pèr sa pampo e soun auturo
De la platano a la tournuro,
D'enòrmei blasinié qu'an tout-just toumba flour,

Emé sei tèsto respandènto
D'óume auturous, de chaine brancaru,
De liéu que sei branco pendènto
Pouerton fuiado encro e lusènto,
Prouvenèntdóu Meissique un sapin loungaru

Qu'adaut menaço leis estello,
Un cèdre maje, autre-tèms au Liban,
Aro au mitan de la pradello,
Aussant sa pouncho que trampello,
Mèle, frais, platanié piramidau, gigant,

E d'autre, e d'autre eici freirejon...
Mai Claro, alor, moustrant nerto e lausié
Que sei tousco à gaucho soubrejon:
Que soun lei rouino que grisejon,
Nous dis, eila dessouto? — Es, acò, lou mouingié

Que lou gàrdi nous fara vèire,
S'es peraqui. — Lou moungié? — Dins un tems,
(Fau tourna de cinq siècle à rèire),
En aquéu lue que, (si pòu crèire,
Va vias), fuguè proupici à la prègo toustèm,

Pregavon de blànquei moungeto
Lausenjant Diéu' urouso li vivien...
— Marchen que darrié la sausetto
Dóu gàrdi coumo uno luseto
Ai vist briba la placo!... E de l'esfrai qu'avien,

Doues dei fremo prenguèron courso
Pèr s'enfugi... — Que 's acò, noum de noum?
Dòufe vous dounarié sa bourso
E n'avès pòu, vautre?... — A la sourso
Vias pas que nous espèro?... — Es pas meichant, oh! Noun!

Pamens despuei cinquanto annado
Gardo Sant-Pouens e li l'an jamai pres...
E sus aquesto badinado
Que Pau nous l'avié debanado,
Reprenguerian lou vanc de-long dóu ribeirés.

Lou flumenet d'aigo clarido,
Sus un founs aro uni coumo la man,
A travès dei prado flourido
Clavelado de margarido,
Tulipo, boutoun-d'or, serpentejo e 'n bramant

D'espàci en espàci boumbisse
Dei sautadou que coupon soun courrènt;
L'espousc de-countùni aspergisse
La ribo que s'entuvelisse,
Amoutant un croustas, dessouto lou mourdènt.

— Hòu! la calour coumo vous trato,
Paire Dòufe?... — Eto! eicito va charmant,
Car si pòu béure à la gargato,
Parai, pichot?... E sa man plato,
De Titin que deja l'es prochi, en talounant,

Flatejo la gauto moureto.
— Bèn lou bouen-jour!...— Diéu vous lou doune auusi!
E' puei nous toucant la paletto:
— Mounte anas ensin, jouveneto,
Qu'emé lou caud que, fa vanegas pereici?

— Eto! anan à la Santo-Baumo!
Lou couer respouende. — En passant pèr San-Pouens
Que vous refresco e vous embaumo,
Si sian di que dessus lei caumo
Meinarié la calour dins lou tèms qu'a la fouent

Em'ei rouino farian vesito.
— Coumo de sàvi avès fa voueste plan!...
Lou seguissèn, que nous l'envito,
Au ro d'ounte si precepito,
Pèr lei fendasclo basso, un flot d'aigo rounflant

Coumo uno afrouso mistralado.
— Eh! n'en voues, d'aigo? — Encaro es pas lou
Que de la roco fendasclado
Soun escumejanto gisclado
A plen de trau si fa; fau la vèire au printèms,

Quand lei pluejo sus lei mountagno,
Tres mes d'ivèr, an escampa sei plour:
Pèr lou couèp peto la castagno
E dins l'avalanco si bagno
Lou mentastre qu'adaut, à tres cano, es en flour.

Alor la mendro fèndo douno;
Tout just recebe, estènt pleno à desbord,
La conco proun founso e redouno
E dins lou courrènt linde pouno
Lou féuse sèmpre verd que garnisse sei bord.

L'aigo es racado emé vioulènci
E, coumo ei flanc la mountagno n'a mai
Que n'en voudrié sa countenènci,
Encagna pèr la resistènci
Lou regounfle plus aut cerco d'àutrei gargai;

Si l'abeno pas sa furio,
E bruscamen, dins lou valour vesin
Que sus la drechro es plen d'aubriho,
Reboubissènt sus la peiriho
Uno troumbo espalanco avaus e petelin.

Mai l'estiéu pèr leis escourriho
Lei fèndo basso au de traufisènt
E soulet, bressant l'avaussiho,
Au vau dei Cabrello bresiho
Lou pasible murmur dóu ventoulet risènt.

Ensin lou gèrdi nous esplico
Lei causo bello e nautre, un long moumen,
Davans la sourso magnifico
Que, mau-grat l'estiéu que saupico,
Nous espousco un tau flot, sian dins l'espantamen.

— Alor vouliás vèire la clastro?..
Nous vèn mai Dòufe amistous: anen-li!
Dins sei traufisènt courvo uno mastro
La rato penado s'encastro
E dei mounjo l'a plus lou sourrire angeli.

Sa paraulo galejarello
Tou-bèu-just dicho acampo à soun entour
L'eissame deis escoutarello
E,deja caduno barbèlo
De l'entèndre counta quauco istòri d'amour.

Mai lou gèrdi que risoulejo,
S'amudissènt, nous camino davans.
Dintre lou nertié que l'ombrejo,
Sènso troupe de brèco grisejo
Un long claus que lou tèms l'a buta contro en van:

A jusquo eici soustengu leis assaut,
Mai vous dien, sei làrgei crebasso,
Qu'à cha pau pamens s'escagasso
E qu'à la fin vincudo un jour fara lou saut.

Au caire d'uba s'acantello,
Dins soun amplour, dins soun escuei fieroun,
Uno venerablo capello.
Lou vièi tèmplo vers leis estello
Ausso sus sa façado un vuide cloucheiroun.

L'èurre escalaire e l'espargoulo
An arrapa, vigourous, sus sei flanc;
L'embriago en flour, la ferigoulo,
La nerto e meme uno piboulo
Qu'adaut lou mistralas n'en carrejè lou plant,

Sus sa téulisso an pres racino:
Es, pèr courouno, un jardin fantasti
Qu'au grat de l'aureto si clino
E que s'arrosò d'eigadino:
Dessouto es fièr enca lou mounumen ant

Intran dins lou claus: rèn li rèsto
Dei vâstei salo e dei long courredou;
Li jaison de sant sènso tèsto
Sout l'oulivastre e la genèsto
Ounte èron lou courtiéu, lei cello e cenadou.

— D'un riche e pïous mounastèri
Aco's lei rouino, enfin Dòufe nous vèn;
Dins la preguiero e lou mistèri
Deis amo eici lou treboulèri
Venié puei s'endourmi dins lou siau dóu couvènt.

Sus lei rouças e sus l'areno
Vènon rounfla leis erso de la mar
E sa viólènci aqui s'abeno;
Ensin la vido emé sei peno
Contro aquèstei paret roumpien soun flus amar.

Coumo au port, l'amo adoulentido
Trouvavo eici la pas... Mai coupèn court:
Dins la fourèst estrementido
Pèr lou tron, uno trouto ardido
De gentilome bèu de jouinesso e d'amour

Brutalamen Siguè souspresso,
A jour fali, pèr un aurige afrous;
Ensin courseja pèr l'aspresso
Dou tèms, lei jouve à l'abadesso
Aujèron dèmanda qu'au sant noum de la crous

Dins lou moungié leis assoustèsse.
— Ah! lou demoun de tout soun poudé lèu
Fauguè bèn que s'entre-metèsse,
Pèr que la priéouesso assentèsse!
Countèron qu'à Sant-Pouens, em'un brihant soulèu,

S'èron rejoun au patrournàgi
De l'abadié, car èro Sant-Martin
E chasco annado, en roumavàgi,
A parié jour, dóu vesinàgi,
Un gros pople venié... L'oufici dóu matin

Ausi 'm' uno pieta fervènto,
— Elei disien, dins lou boues souloubrous
S'esmaravo sa trouto ardènto
E de Bartagno que vous tènto
Avien vougu doumta lou baus escalabrous...

Autro èro la verita puro:
Au Gourg de l'oulo avien passa lou jour,
Bevènt, cantant verdo e maduro,
Foulejant... basto!... — Sus l'auturo,
Dis Gaulié, lou plus bèu d'aquéstei bèu segnour,

Nous a sousprés l'orro tempèsto:
Nouéstei courrèire, espauri pèr lou tron
Que li creniho sus la tèsto
Vouelon plus faire avans. O fèsto
Pioussamen duberto, emé sus nouste front

Ço qu'aparan d'aigo glaçado,
Tristo sera ta fin e proumtamen!
Assousta-nous uno passado; Amen!
De Diéu serias recoumpensado,
Ma souerre!... Aquesto alor de li respouendre:

E lei vint gentilome intrèron
Dins la grand salo: èro puro foulié
Lei vièiei mounjo si signèron,
Mai lei jouineto sourriguèron
Entre vèire arriba lei galant chivalié.

E quèntei chivalié, ma fino!
Eron, sabès, trempa fin-qu' à la pèu
E pamens sei moustacho fino,
Seis àbi prim, sei bèllei mino
Dins lei couer vierginen batèron lou rampèu;

E noun pourtavon la tristesso
Dins sei vistoun, mai lei flamo d'amour
Qu'ardènto dintre l'èron messo,
— S'en pourrié faire l'escoumesso,
Pèr lei vin proun requist begu tout lou franc jour...

Or despuei bèn quàuquei mesado,
Fau saupre acò, pourtavo eici lou vèu
Blanco de Simiano; alassado
D'eima sènso si sèntrè eimado
E l'angouissous desden pognènt coumo un clavèu

Soun tèn dre couer, la castelano
S'èro embarrado, au mounde renouciant.
Emé sa gràci soubeirano,
La jouino Blanco de Simiano,
Dins lou mounde pamens mai qu'uno outro brihant,

Avié de-countùni fa flòri:
A noun plus bello e de cors e d'esprit
E d'uno raço que la glòri
N'avié mes lou noum dins l'istòri,
Elo, à sei pèd, d'amour vesié si coumbouri

Touto la nablo jouventuro.
Mai quand parlas dei caprici dóu couer!
Avié chausi, soun amo puro,
Un am,ourous bèu de figuro,
D'esprit e de neissènço e coumo un chaine fouert,

Mai que pèr s'estaca, pecaire!
Avié bèn troup d'acòddou partaioun
Que voulastrejo de to iti caire
De touto flour poutounejaire:
Dins sei pantai foueço oumbro e bèn pau de raïoun

Veguè la fiho dei Simiano
E s'enclastrè... Mai coumprenès deja
Qu'es l'eima de la castelano,
Gautié d'Aunet, qu'à la campano
Dou couvènt, plen d'audàci, avié campaneja

E qu'au noum de la trouto ardido
De la priéouresso avié 'nsin ótengu
L'estranjo e fouelo counsentido...
Adounc, davans la regalido
Qu'embrasè lou fougau, lèu lei nouvèu-vengu

Retrouvèron touto sa voio
E soun gentun. Tal un vènt de foulié,
S'expandissié pertout la joio
E lei moungeto èron galoio,
— Foueço estènt fiho noblo, en viant lei chivalié,

De si rememouria lei fèsto
Visto àutrei-fes au castèu peirenau;
Puei lei cousiniero à la lèsto,
Lei vièio fau vous dire, en tèsto,
Pèr trata dignamen seis oste freirenau,

Alestissèron la soupado
D'un gàubi tria: mens de doues ouro après
La gaio bando èro acampado
Autour d'uno taulo aclapado
De bouen vin e de plat d'un sabourous aprèst.

E quand lei mounjo à la capello
Cantèron puei l'óufici de la nue,
Coumo respouens, la ribambello,
A taulo sèmpre e riserello,
Disié de cant d'amour nouvèu pèr lou sant lue.

Mai, zóu! s'auboure la taulado!
L'aubo roussejo e soueno l'angelus:
Sias pas de la santo oustalado,
Jouvènt! Tiras la capelado
E vite alunchas-vous: la pluejo toumbo plus!

Aquéstei prudèntei paraulo
Degun, ai! las, au matin lei diguè.
Lei jouine acouida sus la taulo
Coumo dourmien, en gatamiaulo
Uno esfraiouso envejo en soun èime venguè

Empurado pèr lou demòni.
Es dins l'escur ensin que lou Marrit,
N'en sera 'cò lou testimèni,
Nous engènso sei ceremdni,
Es souvènt dins lou souem que nous boufo à l'esprit

Lei plus afróusei desiranço!
Juguèron dounc, lei jouvènt afousca,
Dins la piouso demouranço
De faire tout un jour drihanco!
Gautié, pèr óuteni que restèsson enca,

Trouvè de paraulo requisto
E l'abadesso aujè li counsenti!
Lis ouro, passas que sias visto,
Em'uno proumtitudo esquisto
Siguèron recitado e lèu, pèr alesti

Quau uno douço bounbouniho,
Quau uno crèmo e quau un plat goustous
Ounte soun gàubi es meraviho,
Si groupèron lei sàntei fiho:
Falié faire l'ounourdóu counvit amistous.

Ero alor foundudo la glaço
E vièio e jouino emé lou meme entrin
Si penavon; quand èron lasso,
Lei gentilome, ourriblo raço,
D'un paraulis manèu qu'èro un pire verin

Leis acourajavon bèn vite...
Vers lei miejour lou festin coumencè.
E voulès pas que Diéu s'irrite
E dins l'infèr n'en precepité?
Entre doues nono à taulo un cadan si placè

E lei mot jouious si crousèron
Ben innocènt, bèn temide d'abord,
Puei lei sourneto si countèron,
Puei lei toun pau à pau s'aussèron
E lou vin coungreie lou plus fouele estrambord

Jusquo au souspir, jusquo au delire,
Jusquo à l'amour; quand davalè l'escur,
Lou jardin clantissié dei rire
E dei poutoun e l'on pòu dire
Qu'èro countènt Satan qu'autour fasié lou fur.

Lou bèu Gautié de regardello
Tout aquéu jour s'èro pas contenta:
Blanco, la douço vierginello,
Couro un gau-galin rouginello,
L'avié facho s'assèire, éu-meme, à soun coustat

E li disié de parauleto
Tant melicouso e tant pleno d'amour
Que, creserello, trernouletto,
A cha pau la tèndro agneletto
Sentié mounta soun couer e sa tèsto en coumbour.

Subran de la taulo s'aubouro
La pauo mounjo e davans un autar
De la Madono la tourdouro
Va si traire à ginous e plouro,
Plouro sus un amour, ai! las, que vèn tròup tard.

Mai la casso es que s'abandouno,
Sounant lei chin, quand lou cèrvi es rendu?
Sentènt que dins l'oumbran si douno
E si pren mai d'uno poutouno,
Gautié tambèn a fam dóu bèu fru defendu:

Perseguissènt soun amourouso
Dins lei jardin, dins lei long courredou,
Dins lei viseto souloumbrouso,
Amoulounado e lagremouso
La rescontro à la fin au sant recatadou.

Ardènt, d'un long bais sus lei labro,
Eu la proufano; ardènt, éu béu sei plour.
Dins l'encèndi que l'amour abro
Blanco toumbo e soun amo alabro
Au foulige amourous si duerbe, ensin la flour

A l'eigagno que l'enfresquèiro.
— Ah! fugissen, fugissen, moun Gautié!
E s'embroucant ei sant de pèiro,
Souto la luvo que lei guèiro,
Franquisson lei jardin, souerton dóu mounastié.

Lei vaqui dounc, dins la nue claro,
Qu'à l'aventuro avançon souto boues;
Brulant, sei paraulo soun raro;
Coumo n'aurien de proun douço aro?
Amour, es de long bais, d'estregnemen que voues,

Es leis espaimè deleitable
Ounte doues amo dublidon d'alena!
Blanco e Gautié, chale iinejable,
Si poutounon insaciable
E si devourissènt toubon embessouna...

Luno amigo, blànqueis estello,
Astre argentau, velas vouesto clarour;
Aigo lindo, dins lei pradello
Cascaio plan; dins lei cimello,
Aureto, taiso-ti: treboulés pas l'amour!...

De la nue traucant la calamo,
Subitamen partedóu mounastié
Lou brut d'uno trouto que bramo
E tout-d'un-tèms un ami clamo:
— Au secours! au secours!... Es dre subran Gautié.

A-n-éu s'arrapo l'amourouso:
— O moun tresor, o moun ami fidèu,
Rèsto que luen de tu, paourouso,
Aro serié tròup malourouso,
Gautié, l'amigo tiéuno!... Eu s'encourre, crudèu...

Dins la clastro que treboulèri!
Ai! ai! l'evesque èro esta prevengu
Que fasièn fèsto au mounastèri;
—Pèr quau? es aqui lou mistèri,
Vertu vo jalousié! — Toujours èro vengu;

Ero vengu 'mé sa seguènci,
Canounge, prèire, ome d'armo noumbrous.
Lei chivalié pèr la vioulènci
A navon faire resistènci,
Quand éu, la mitro en tèsto, apara d'uno crous,

Entamenè la liturgiò
De l'escoumenjo e, lou tenènt d'à ment,
Tóutei restèron en sesiho
E lei mounjo, lei pàurei fiho,
Presentèron soun front au sant castigamen...

Gautié, qu'avié tira sa dago,
Coumo leis autre aguè de se liéura,
— Car lou repenti Diéu lou pago!
E veguè, dins la lusour vago
De tres pegoun fumous, bord-qu'aguè tenetra

Dins la capello tenebrouso
Ounte aro sian, veguè quicon d'afrous,
Tant que semblè mai doulourouso
Dóu Crist la figuro pietouso,
Dóu Crist, flanc dre dubert, qu'es aqui sus la crous,

E que subran dóu santuàri
Lou lumenoun s'amoussè d'esperéu.
Alor lou priéu capitulàri
Venguè prendre lei relicàri
Emé lei vas sacra; coumo èro en jun, peréu

Counsumè lei sànteis oustio;
Puei destuiè fin-qu'au mabre l'autar
E tout lou tèms lei letanio
D'escoumenja lei pàurei fiho
Que, vièsti espeindra, si toursien sus lei bard.

Dins acò leis estraio braso,
Mut, repentous, èron vengu pausa
E sei dagueto e seis espaso
Sus lou travès d'aquesto graso,
Mens fièr que lei Templié, valènt mouine crousa

Que, foundadou dóu mounasteri,
Avien basti lou pausadou mabrin
Pèr li veni, piòus e lèri,
Avans la guerro e sei misèri,
Faire beni seis armo en bouen fèrri azurin.

L'evesque alor, tenènt sei mino,
Ensin parlè: — Sènti l'iro de Diéu
Que tout-aro vous enfroumino,
O vous qu'avès trempa l'armino
Dins lou flùvi negras dei delìci catiéu:

Gentilome sènso noublesso,
Sigués mauidi! Maudicho e pèr toujours
Siegues aussi, fouelo abadesso,
Qu'à la lussùri, orro divesso
De l'abime, as dubert lou tèmpledou Segnour!

Vàutrei tóutei, fiho de joio,
Que lou tresor de vouesto pureta
L'avès esclapa dins la roio,
Vàutrei qu'avès roumpu, galoio,
Lou vot tant dous à Diéu, lou vot de casteta,

Sigués maudicho, maudicho aro
E dins lei siècle, o fiho de Satan!
Lei jour que vous soubron encaro,
Au dur Sant-Pèire d'Aumanaro
Leis anarés chabi; repentissès-vous tant

Que pouesque, la bounta divino,
Pouesque à la fin bessai vous perdouna!
Eici que lou pau e la mino
Deman meme couchon en rouino
Lou mounastié maudi qu'es esta proufana:

Vouéli que soulo rèste drecho
L'umblo capello!... E tout si faguè 'nsin...
Rèsto dounc la grand nau, estrecho,
Lou Crist emé sa plago à drecho,
L'autar, lou pausadou, lou releisset vesin

Que si li metien lei bureto,
Un tronc de pèiro; es en nous lei moustrant
Que Dóufe nous disié, paureto,
Coumo siguèron, lei moungeto,
Punido duramen pèr soun mancamen grand...

Acò vist, la pouerto augivalo,
Pèr la partènço, en sourtènt, nous metié
Souto la coupolo estivalo
De l'aubriho espesso e verdalo
Qu'ensournisse au pounènt lou front dóu mounastié

Quouro, en li sarrant la paletto,
Au brave gàrdi ensin Berto venguè,
Un brisoun roujo e tremouletto:
— Blanco, abandounado e souletto,
L'istòri ajusto pas ço que puei devenguè?

— Ah! sus terro, la malurouso
Noun trovè long, ai! las, soun paradis!
Devié, dins la nuechado afrouso,
Passa 'ncaro uno aigo aboundouso
Souto lou pouent d'eici. Darrié l'entravadis

Qu'emé l'èurre en bas s'embaragno
L'aigo rescontro un saut; dins lou cèu blu
Lou vise en long serpentas gagno
La cimo deis aubre, mai bagno
Soun racinàgi touert dins un gourg baumelu.

Ah! coumo acò fa gau de vèire,
Coumo es, acò, sòuvàgi e majestous,
Quand plòu e q'un flot boumbissèire,
Em'un brounsimen de trounèire,
Vèn plusiour jour d'à rèng si debaussa 'scumous!

Dins lou flot creissu pèr la plueio
La pauro Blanco avié cerca la pas,
Tristo vitimo, e dins la mueio
Trouvèron sa bello destueio,
Beisant sa crous d'argènt; à l'ouro dóu trepas

Diéu l'aurié-ti pas perdounado
Que desempuei, chasque an, pèr Sant-Martin,
Dins lei rouino, dins l'ensarriado
S'entènde, doues nue d'à filado,
De rire, de souspir, de plour jusquo au matin?

CANT IV

A l'assaut de Bartagno

Escalen! - Lei nais dóu Vese. - Lou gourg de l'Oulo. - Lei Crido e la Tourno: li sourgènto lou Fauge. - Jano e Pau. - Douço ravarié. - Lou baus trauca d'Aroun. - A la glaciero: lou grand pin. - La sourso dóu Pradèu. - Roco-Fourcado. - La grand Baumo. - Lei Maio. - Zóu! plus qu'un esfors! - Lei counsèu de Fèlis.. - Lou camin nòu. - Arriban au coulet de Bartagno en carrejtant noueste ai.

Oh! coumo dins sa draio blouso
Lou blound soulèu que mesuro lou tèms
Prèssò sa courso luminoso,
Quand la naturo generouso,
Nous moustrant sei tresor, nous pivello e nous tèn!

Aussi parterian à la lèsto,
Car despaciènt Aguste, menant l'ai
Ero vengu prendre la tèsto
De la caravano: — Es de rèsto,
Disié, de musa 'nsin, qu'arribarian jamai!

Parterian dounc à sa seguido,
Tóutei ravoï, tóutei plen d'enavans.
E lèu Martouno trefoulido
Coumo uno gaïo bouscarido
Emé lou brun Titin nous courrèron davans

Meme qu'erian proun en petugo
Pèr teni pèd; prenian pas de retard,
Ma fe, pèr cui de rapugo
E fasien giscla de belugo
Nouésteï soulié tacha, quand mourdien lou peïrard.

Si levavon pamens de visto,
Leis escamandre, ei coude dóu camin
E sounavian: — En que counsisto,
Pichot, de batre ensin la pisto,
Que bèn lèu pourrés plus sousteni: voueste trin?

Pas mai! toujours cambadejavon:
Au bord dóu Fauge, ounte mau-grat l'estiéu
Dóu Vese lei nais sourgentavon,
Lei marriassoun, zóu! s'amourravon,
Car toucant èron mai lou camin e lou riéu;

Mai Martouno aqui pèr sa maire
Si leissè prene, entant qu'au gourg veiren
Si miraiavo: aucèu voulaire,
As bèu de fugi lou cassaïre,
A l'abéuradou puei lou cassaïre ti pren!...

An! marchen, zóu!... Sian ei gipiero!...
La carreirado escalò, l'a 'n moumen,
E lei Rajolo traversiero
N'an meme eici fa 'no peïriero,
Quand s'avenon, l'ivèr, troup aboundousamen...

An! zóu! qu'auren marrido piado
Encaro mai dins de rode que l'a!
Caminen! La draïo es taiad
Entre lei mato esparpaiado
De planto redoulènto e fa gau d'escala!

Sus lou pendis ombrous dei Clapo
Dou tèms.qu'ensin mountan à pichoun pas,
Mai large, ei cimo, si destapo
Lou blu fiermamen e s'aclapo
Lou Fauge aprefoundi, pèr contro, aperabas

Souto l'inmènso muraiasso
Que davans éu fa lou travès d'Aroun;
Au founs, de roucasso en roucasso
Fin- qu'à-n-uno cafourno basso,
L'ivèr fa cabussa, furious, tombant en round

Sus un large ventau de roco,
Lou flumenet que coumo un bouïdou
Escumejo en dessouto e toco
De l'aubriho leis àutei broco
Dins sei respouc: d'acò lou founs debaussadou

L'an denouma lou gourg de l'Oulo,
Noum que lou pinto; alucas-lou davau:
Lou ro que la moufo coumoulo
Dirias- ti pas que li pendoulo
Coumo un vaste mantèu sus un negre fougau?...

Ah! tè, qu'en belant la naturo
Avèn vincu noueste proumié grimpet!
Un pau de plan subre uno auturo
Tant fa plesi! La jouventuro,
N'aproufichant, sautejo e canto e fa tripet,

Que lei cansoun emai la joio
Pèr camina nous rèndon plus lóugié...
An! dau! cantas, troupo galoio!
Acampas, acampas de voio
Qu'anan lèu tourna-mai mounta: vouéstei gousié

S'amudiran à la mountado.
Fiheto, eici l'on pòu cansouneja!...
Es ço que fan... S'à la vesprado,
L'estiéu, dins l'aubriho ramado
D'uno bastido, avès entendu piéuteja

L'innoumbrablo passerounaio
Que per la nue si li vèn recata,
Cansoun e cridadisso gaio
Emé lou rire que cascaio
En acò retrasien: èro bèu d'escouta!

Mai lèu moulà lou bresihàgi,
Puei si teisë: serpentous lou camin
Escalavo enca 'n còup arràgi
Souto lou souloumbrous aubràgi,
A travès argelas, garrus e roumanin;

Noueste ai, sèmpre tenènt la tèsto,
Fasié, tout fièr, dinda sei cascavèu
E, lou seguissènt à la lèsto,
Lei paure! avien plus tèms de rèsto,
Nouéstei bèu fouletoun, pèr juga dóu pivèu.

Es qu'emé fogo escarlimpavo
Mèste Martin! Oh! lou brave asenoun!
Meme se de fes resquihavo
Souto lou fais lourd que pourtavo,
Disié pas pèr tant pau, disié jamai de noun.

E 'm'acò l'avié soun menaire
Que pér acès renegavo entre dènt,
Car sus l'esquino dóu bramaire
La cargo tenié de bescaire
Quouro à dia, quouro iròu trantaiant e pendènt,

E quand la bèsti s'esparravo
Pèr escaia lou camin peirihous
O que de fes s'amoulounavo
Sus lei pendis que davalavo,
Leis eissàri courrien tout-de-long de sa crous.

Ah! pauro bèsti, es de manobro
Que t'avien dounc courreja leis arnés?
Aguste qu'es pas un fulobro
Em'enca Pèire avien proun d'obro
Pèr manteni la cargo en 'i fènt contro-pes

E s'Aguste alor sacrejavo
Coumo un roulié, li n'en voudren pas mai!...
Dei jouve dounc,—quand s'escalavo,
Cansoun e rire, tout calavo,
Puei la cantagno, au plan, reprenié tournamai.

Ensin, après un bouen quart d'ouro
De marcho mudo, erian de l'autre las
Dou coustau. Ah! qu saup seis ouro
Fau pamens qu'eici bade, quouro,
Coumo dins un jardin, trepejo lou sablas...

Si, de sablas dins la mountagno,
D'areno fino ensin qu'au bord de mar
L'oundo beisarello n'en baigno!
E voulès pas que la cantagno
Coutigue lou gousié, lou fague dinda clar?

Aplantas-vous: d'aquesto auturo
Qu'es lou frontau d'un bàrri escalabrous
Countemplas l'auto estampaduro
Dou Travès d'Aroun qu'encenturo
Davau un prat clafi d'arróumi souloumbrous;

Lei gènt d'eici noumon lei Crido
Aquelo founso, amor que soun ressouen
Es dei renouma: qu li crido,
La muraiasso estrementido
Plusiour fes, coup sus coup, li remando lou souen.

Aussi coumo lou Fauge bramo
Aperabas, quand s'aveno l'ivèr!
Dou grand boues roumpènt la calamo,
Soun rounfle dirias pas qu'es l'amo
D'un moustre gigantas que s'eisalo dins l'èr?

Au plus aut, dins la bouissounalo,
Souto un grand ro lou Fauge a soun sourgènt:
Uno figuiero si miraio
Dins l'oundo clarinello e gaio
Que de la conco puei s'escampo en brusissènt;

Lou baus iloungaru que susploumbo
D'un pan de sucre a l'aspèt blanquinèu
E, jusquo au mitan de la coumbo
Quand de roco en roco trestoumbo

Lou rajou escumous e blanc coumo la nèu,
Creirias qu'es la fouent de Vau-Cluso,
Vau-Cluso en brèu, Vau-Cluso en menusa!...
L'estiéu, quand la fouent seco e nuso
Es lou recès dei lagramuso,
Descèndre dins la faio es pas troup mal-eisa:

Miechouro, pèr mounto-davalo,
Quouro sus pèd, quouro de-rebaloun,
Eici dins uno fèndo óuvalo,
Pu luen dins uno longo salo,
Ei pouncho de roucas s'amoulant lei taloun

O bèn trepiant de sablo fino,
Miechouro au mens, sus cènt cano de long,
L'on si tirasso o l'on camino;
A la fin, dins l'escuresino,
Lou brut de vouéstei pas reboumbo coumo un tron:

Alor un grand gourg vous arrèsto,
Plen de secrèt, e vous pren lou fremin
D'ausi passa sus vouesto tèsto
Emé de quielet de batèsto
Lou voulatun de nue que trèvo aperalin

E que la pegoulado esfralo;
L'uei d'esperéu cerco au founs de l'escur,
Emé soun gat negre e sa graio,
Sa péu de serp à la muraio,
La masco qu'elo aussi li trèvo de-segur.

Mai l'uei destrié rèn: la nue sournò
Embéu tout, aigo e relèu dei paret,
Dins la founsour que lei desournò,
E, mistèri de la cafournò,
D'un lunchen couladis vous vèn lou chafaret.

Lei gènt que fan lei devinaire
Nous dien eiço: lei plujasso d'ivèr,
Que lei pendis de chasque caire
Fan davala dins soun terraire,
Dóu Plan-d'Aup en grand mar tremudon lou desert:

Or dins d'amplei baumo s'acampo
Aquelo eigasso e, lou rèsto de l'an,
Pèr dessouto en flùvi s'escampo
E dins de l'onguei gouergo lampo
A l'adré vers Sant-Pouens, à l'uba, souto plan,

Ei traou qu'Uvèuno li sourgènto.
Quand n'a puei troupe, eici l'a lou survès:
L'aigo aboundouso e proun violènto
Alor desboundo, brusissènto,
Pèr dessus lei redènt que li soun au travès.

Lou Fauge ensin s'aveno e toumbo
En espouscant lei grand ro blanquinèu;
E fin-qu'au mitan de la coumbo
Quand de roco en roco trestoumbo
Soun rajòu escumous e blanc coumo la nèu,

Creirias qu'es la fouent de Vau-cluso,
Vau-cluso en brèu, Vau-cluso en menusa!...
Mai davans soun tablèu, ma muso,
Tarden pas mai, que lou tèms fuso
E sabes que pèr vuei nous fau pas troup musa;

Sian deja lei darrié, ma bello:
Aluco un pau!... Ço qu'alor veguerian,
Moun amo encaro n'en barbèlo
E n'en aguè lei farfantello
Moun eimado mouié qu'ensèn caminavian;

E d'un dous record trefoulido:
— Aluco un pau! elo aussi mi diguè...
O remembranço benesido,
Coumo l'aviés enfestoulido!
Sentèri soun fremin au bras que mi prenguè...

Aro subran de l'auto couelo
La carreirado a quita lei pendis
Pèr la vau fresco ounte tremouelo
De-longo, au bais de l'auro mouelo,
Dei grand pin ramelu lou front boulegadis;

Au murmur sènso fin dei broundo
Leis auceloun entre-mesclon sei cant
E l'amo, dins l'oumbro prefoundo
Qu'eici de mistèri l'inoundo,
En raive amourousi s'enauro quatecant...

Dins la sournuro afrescoulido,
La caravano, en prenènt lei countour,
S'èro deja touto esvalido,
E destriavo plus rèn, l'ausido,
De sei cansoun, tant fa de tour e de bestour

L estré valoun que serpentejo
Entre lei ro. S'èro mens despacha,
Coumo lou jour acò clarejo,
Un bèu parèu qu'avié l'envejo
D'èstre un pau mai soulet e de n'aprouficha

Pèr si rauha quàuquei poutouno...
Es-ti, jouvènt, raubatòri mai dous
Qu'acquéu dei tèndrei caranchouno
Ounte qu pren emai qu douno
Trovon de benuranço un abounde touei dous?...

Ensin, perdu dins leis estello,
Jano emé Pau s'èron adarreira.
O bouenur! L'auro jugarello
Fasié flouteja lei trenello
Dei péu rous, e pèr fes d'un bais enamoura

A la voulado éu lei frustavo:
Bais innocènt, bais pur e deleitous!
E lou parèu sèmpre mountavo;
E l'amourouso s'acoutavo,
Pèr venei lei grimpet, au bras de l'amourous.

Mai quand la draiolo plus plano,
Aussi plus larjo, es un ouert poulidet,
Rode ounte dirias que l'andano
S'esperlongo dins uno plano,
Si tenien plus touei dous que pèr lou pichoun dèt

E, tau qu'en simplo proumenado
S'èron esta, balancavon lou bras
A la cadènci abandonado
Qu'à soun pas lènt s'èro dounado,
E tout en proumenant ravo que ravaras!

Vrai, de dóucei parauleto
N'en disien gaire e lei gai parpaïoun,
Qu'à soun entour fasien l'aleto
Pèr dessouta seis amoureto,
Avans d'entèndre un mot voulastrejavon proun!

L'amour de fes es pau charraire
E dins leis èr aimo miés vanega;
Aimo peréu... Lei calignaire,
La draïo aqui virant de caire,
Dins un pau mai d'oumbrun fuguèron ennega

Souto uno aubriho mai espesso
E d'un moum; en lei perderian deis uei,
Un court moumen sènso amaresso
Pèr l'amourous e sa mestresso,
Moumen qu'aurié dura sènso aduerre l'enuei.

Tre qu'intrèron dins l'escoundudo
Dóu camin touert, embriaga d'amour,
De soun amigueto esperdudo
Lou bèu jouvènt à la perdudo
Prenguè la taïo linjo e touei dous en coumbour,

Sen contro sen, labro sus labro,
A long cigau beguèron lou poutoun,
Lou dous poutoun que l'amo alabro,
Quand lou fue de jouvènço l'abro,
Crido pèr la gari dei sóurnei languisoun.

Mai qu bequè vòu béure encaro,
Tant la bevèndo es neitar sabourous,
E, coumo l'escasènço es raro,
Sus lei bouco emé sus la caro
Innoumbrable plóuvien lei beisat amourous.

Dins l'aubre lei pas d'un cassaire
Fan lèu cala lou jouious cascaiun
E fugi lei gai bresibaire;
Ensin nouéstei pas treboulair
Venguèron coupa net lou divin calignun

E Jano, coumo un glàri lèsto,
Em'un quielet de l'estregnemen dous
Si derrabo... Avian vist de rèsto,
Dins un eslùci, que sei tèsto
S'èron jouncho un moumen clins de bais arderous.

Oh! bello e rapido vesènço
Qu'en nouéstei couer remembrè lou passa
Reviéure de nouesto jouvènço,
Dóu tèms, deja luen, d'inchaiènço
Qu'à-n-aquéu rode aussi, proumés, avian passa!...

Ma tèndro mouié trefoulido
Em'estrambord dins mei bras si jité...
O remembranço benesido,
Coumo l'aviés enfestoulido!...
Coumo un regounfle dous en moun amo mountè!...

Tau qu'un lebrié qu'a fa pauset
E qu,e soun mèstre aro vèn de sibla,
Tau qu'un chot cassant de luset,
Tau qu'uno rapido alauseto
Davalant sus lou tèst qu'a vist lusi d'eila

Avié rejoun la caravano
Noueste parèu fougous e cambejant;
Mai devié coumo uno campano
Brounzina l'ausido de Jano,
Qu'uno esco aurié pres fue sus soun front flamejan;

E nouèn venguè mai roujo encaro,
Car noun pousquè, quand li diguèri puei:
— As panca vist, ma, bello caro,
Que si desparpello tout-aro
Lou vièi Aroun d'adaut per ti jita 'n còup d'uei?

Eu, l'a 'n gros moumen que t'a visto
Entre lei pin... - Marrit! elo mi fa,
Mita risènto, mita tristo;
E subran la manello esquisto
Emé sei detoun fin mi coupo lou boufa;

Mai moun bras, dins uno esclargido
De pin ramu, li fa vèire un trau round,
Uei cicloupen, vasto lusido
Qu'à travès la roco blesido
Beluguejo au frontau de la barro d'Aroun.

La leco ensin l'es desvelado
Ounte moun jue l'a facho trabuca
E, zóu! n'en ris coumo uno asclado!
De l'ausi nouesto troupelado
S'amoulouno un moun.en davans lou baus tranca.

Puei sèns lou mot de Santo-Claro
Tourna-mai mounto... Es rede lou camin:
Mai quàuqueis esparrado encaro
E ili sian: la pauso tout-aro
N'en sera que meiouro à l'oumbro dóu grand pin...

O pin gigant, pin seculàri,
De la fourèst lou decan e l'ounour,
Salut! Toujours ome e bestiàri
Souto ta ramo tutelàri
Sabon que trouvaran e repaus e frescour

Salut, salut!... La calourasso
Nous carcagnavo adès quand mountavian;
Aro l'oumbro de ta testasso
E nous refresco e nous deslasso:
Siés l'ouasis de Diéu que toutei belavian!

Un rèng de sèti t'encenturo,
To vo roucas, en round s'assetaren;
Espandiren la cuberturo,
S'avèn souem; niflant l'auro puro,
Manjaren s'avèn fam, e s'avèn set béuren:

Siés lou ramas de la Glaciero
Ounte àutrei-fes la sourso dóu pradèu,
Que fresco, aboundouso e lóugiero,
S'escampo vuei dins de sagniero,
Dounavo tout l'ivèr de glaço à canestèu;

L'aubre majour de la pinedo,
Siés lou signau que nous marques toustèms
Ounte es l'aigo que desassedo,
Ounte l'avé trovo uno cledo,
Ounte lou pastre pòu si gara dóu laid tèms.

Eici li fa rèn que dardaie
Lou caud soulèu, tu nous assoustaras;
Eici li fa rèn que varaie.
Lou gregàli vo que bataie
E rene lou mistrau, tu nous apararas;

Se plòu, se fa fre vo se nèvo,
Dóu pous glacant la bastisso es aqui,
E lou bouscatié que li trèvo
Li tèn lou boues se que ti lèvo
E s'en pòu rescaufa lou passant aflaqui.

Aubre amistous, aubre assoustaire
Qu'ivèr-estiéu nous largues tant de bèn,
Salut! Coumo lou vouiajaire
Qu'au desert rescontro un terraire
Eiga, verdous e drud, ti saludan countènt.

Ai! las, uno amaro pensado
Mi tavanejo: ausses bèn aut toun front,
E fièr, dins lei nivo estrassado,
Milo fes dins ta vido astrado,
Vincèire, as afrounta la tempèsto e lou tron;

Ta glori e toun estampaduro
Fan recula la destra: rèstes rèi!
Mai vou la lèi de la naturo
Qu'ague uno fin tout ço que duro
E fau puei mens que rèn pèr jita lou desrèi:

Uno belugo un jour s'escampo
E siés perdu: l'erbo seco a pres fue;
Empurado pèr la cisampo,
La flamejado crèisse, lampo
E mounte elo a passa lou roucas meme es cue;

E l'endeman l'aubo clarejo
Sus un brulat: ti cerco, li siés plus!
Toun pèd lamentable negrejo
Sus lou rous pendènt que tubejo
E Bartagno soulet doumino triste e nus...

Mai bord que vuei li siés encaro,
Assousto-nous!... Sus lou souple erbouran,
E s'estènt dins l'eigueto claro
Refresca lei poung e la caro,
S'es dejadòu lassùgi asseta lou fihan

E lèu caduno afrescoulisse
Sa labro ardènto ei goubelet terni
Qu'au fres sourgènt Pau li ramplisse
E de-countùni li pourgisse:
Em'un degout de fouert es un béure beni!...

Dóu tèms qu'ensin fasien la pauso,
Risènt, bevènt e trissant un moussèu,
Iéu, en pantai de milo causo
E d'assetoun sus uno lauso,
A despart, countemplàvi, amenaçant lou cèu,

Lei pue noumbrous que fan centuro
A la Glaciero. Au tremount rouginas,
Proufielant dins l'auto planuro
Sa roucassudo encrenaduro,
Roco fourcado fièro, ensin qu'un castelas

Que lou tèms la creba sei toure
E sei merlet, Roco-Fourcado ensin
Segnourejavo sus lei mourre
E iéu deja li vesiéu courre
De trèvo de la nue sus sei ro cremesin;

— D'efèt,dóu soulèu que trecouelo
Lei darrié rai nous enganon souvènt!
E pèr coumpli ma vesien fouelo
Li metiéu meme entre lei couelo
Tout un grouïn de pople à l'assaut dei pendènt.

Mai sabès proun coumo camino
Nouesto pensado en travai fantasti:
Lou lamp que suhran s'alumino
Es rèn à soun respèt, e clino
La tèsto a plus lèu fa, dóu tèms d'aro à l'anti,

Milanto fes lou tour dei mounde.
Dounc avié d'èstre un tablèu chanjadis
Que vesiéu, e pèr que s'inounde
De rai e de lus en abounde
N'a proun d'un vira d'uei: l'infèr es paradis!

Li viéu sèmpre un pople qu'escalo
Dins lei vau touerto: es jouious mai-que-mai,
Mesclant de cansoun prouvençalo
A la resplendour matinalo
Dou proumié dei dimenche enraïouna de Mai.

Tout Gèmo es aqui: Tounin Magno,
Soun gai pouèto, a mes dins sei cansoun
E lei joio e lei malamagno
Dou vilàgi e vuei la mountagno
Es pleno dei refrin ounte rejouncho soun

De l'an passa toutei lei gèsto.
Lou pople canto e mounto: que d'entrin!
De tout caire vias que de tèsto
E de fes rèn, car lei genèsto
Vers lou trau dei gribet aclapon lei camin.

Mai mounte va la foulo gaio
E perqué meno un eissame tout blanc
De jouveneto? Acò 's lei Maio
Qu'oublidant un jour sei jugaio,
Pèr festa lou retourdóu plus bèu mes de l'an,

Soun dei gràci que l'on encènso
E de l'amour l'inmacula simbèu:
Es lou gentun, es la jouvènço,
Es dei bèu jour la reneissènço,
Dei flour fresco expandido es lou parfum nouvèu,

Es lou regréu, es l'esperanço
Qu'en élei vèi lou pople, e lei cantant
Es un espèr de benuranço,
Esdóu cèu meme l'assistanço
Qu'aquéu pople saludo en seis arderous cant!...

Sourtènt dei blóundei genestiero
Dins un relarg bado lou caminet
E la flourido printaniero,
Souto Roco-Fourcado autiero,
A tremuda 'n jardin lou bouissounous planet

Messugo, blavet, carroulino,
Tréule sóuvàgi e pese de sentour
A l'agoulènço pourperino
Enliasson sei courolo fino
E l'argelas éu-meme a sa cargo de flour;

Suavamen tout acò 'mbaumo;
Lei roumiéu vite, enebria, de parfum,
Si l'arrèston, e la Grand-Baumo,
Que passo amount, souto la caumo,
D'uno dins l'autro vau, n'en vèi que quàuqueis-un.

La Grand-Baumodóu roumavàgi
Ero pamens la toco, mai tant bèu
Dins la baisso es lou païsàgi
Que lou pople s'assèto arràgi
Sus lou sou margaia d'aquel eden nouvèu

E lou courounamen dei Maio,
Zóu! que coumenço au mitan dei cansoun.
Doues ouro de tèms, frusto e gaio,
La pouèsio à flot cascaio,
Aussant l'amo souvènt ei doucei frenisoun

E troup lèu si trovo acabado
La bello fèsto. Alor lei group jouious
S'esperpaion pèr la dinado:
Leis un prenou la davalado
Sus lou traou dei gribet, sourgènt gaire aboundous:

D'autre, remountant l'esclargiero
Jusquo au pouset qu'es d'èurre encabana,
Meton taoulo dins lei brusquiero,
Dou tèms qu'uno valènto tiero
Mounto encaro plus aut, jamai lasso d'ana:

Lou cresten meme noun l'arrèsto;
Lou plan dei vaco en dous saut es franqui;
Puei, zan! la troupelado lèsto
Sus l'uba resquiho e fa tèsto
A la Sourso de Grau: que regàli an aqui!...

Ai! Ai! qu'un dindin de sounaio
A fa tout-d'uno esvali moun pantai!
Deja vers l'auturo s'adraio
De mei coumpan la troupo gaio;
Aguste e Pèire an mes leis eissàri sus l'ai.

Isso! fau quita la Glaciero!
Isso! Bartagno a 'ncaro soun frountau
Tout cacaloucha de lumiero,
Mai veiren sa testasso autiero
D'oumbrun envouloupado, avans d'èstre amoundaut,

Se nous pren uno pichoueto ouro
Noueste escalàgi: es lou tèms que faudra!
Cadun vitamen dounc s'aubouro:
Titin, enmouresca d'amouro,
Jito soun bram jouious que l'ecò redira:

— A la Santo—Baumo, zóu! crido
E, lou capèu d'inmourtao garni,
Parte proumié; à sa seguido
Lou fihan qu'a représ de vido
S'enfounso en cascaiant dins lou boues ensourni,

Talo uno couado fugidisso
De pouletoun, e dins lou camin touert,
Entre-coupant la cridadisso
Emé proun de zóu! d'ai! e d'isso!
Escalo vite aussi lou moulounet dei fouert,

Dei fouert que fan l'acoumpagnado
A l'ai carga de nouéstei prouvesien;
Avans lou bout de la mountado,
S'an de bouen sang dins la courado,
De n'en tira proufié van agué l'óucasien:

Uno estubado nous espèro
E lou grimpet nous sera loungaru!
Fa la caminado sevèro
L'aubrihoun deis amouro fèro
Qu'aboundous s'embaragno au pinsot brancaru

E mèste Martin que ribejo
Iròu, à dia, l'embrounco à tout moumen
Lou viéure nouestre que carrejo:
Sarron dounc pas éstei courrejo
E devren-ti pourta, nautre, lou cargamen?

Ah! paure! acò serié coucagno!
Aguste e Pèire es un pau ço que fan
Despuei Sant-Pouens e lei baragno,
Que de flour cuerbon la mountagno
Emai d'espino, aussi l'an grafigna lei man.

Acò 's pas rèn! Prenèn sa plaço
Eimé Jóusè, quand d'ana de-guingoi
De fes que l'a puei leis alasso;
E zóu! ausso, pouisso, tirasso,
I! Ja! tant fa camin lou viàgi, nis d'un goi!

Mai l'ami dei l'ongueis auriho,
Es que vou!drié, dins soun biais, si trufa?
Dins lei gandolo ounte resquiho,
En tèms de pluejo, la peiriho,
Eu nous buto, e creirian que va pren à pres-fa;

Aussito un escóurchi nous tènò
E plen d'espèr tout-d'un-tèms l'enregan,
Car soun intrado nous countènò;
Ai! las, la mountesoun es lènò
Dins l'estrecho draiolo, e n'en sian qu'au mitan,

Quand deja la nue souloumbrouso
Nous a d'escur tóuteis enmantela.
Noueste ai s'aplanto. O bèsti argnouso
Qu'à parti d'aquelo ouro afrouso
Pèr li fa faire un pas nous fau apountela!

I! ja! tiron sus la caussano
E leis auriho Aguste e tambèn Pau,
Qu'à nouesto crido a leissa Jano
E la poulido caravano
Pèr veni de ranfort nous pourta soun bouen pau;

Pèire alor s'arrapo eis eissàrri
Emé J'ousè; iéu, poussi pèr darrié:
Mai l'ai brando pas mai qu'un bàrri!
— I! Ja! faudrié pas qu'un catàrri,
O ronso, ti sequèsse?... Ah! canaio, faudrié

Qu'aguèsses nuso teis esquino!...
E tu, vequen, Fèlis, un còup de man!
Viés pas qu'uno part deis eisino
S'escampo... De la treboulino,
Tu, jamai petaras!... Se si pòu! que sang-plan!...

Fèlis bèn d'aise alor s'avanzo
E pèr darrié si groupant emé iéu
Ajusto touto la puissanço
Qu'anoungo soun auto prestanço:
L ase ensin fa tres pas souto un esfors plus viéu,

Mai Fèlis, éu, rèsto sus plaço:
— Oh! qun draiôu! l'avès proun mau chausi!
Nous fa puei sa voues deja lasso.
Anen! zóu! t'aplantes, cauvasso?
Dis Pèire; aro li sian, nous fau sourti d'eici!

Gagnan mai d'uno outro butado
Set à vue pas: — Fiche! Fèlis repren,
Si fara longo la mountado!
E coumo uno pèiro plantado
Nous regardo d'en bas, nous clamant soun segren:

Aquel escóurchi es uno engano;
Aurian degu garda lou dre camin!...
— Lou dre camin, li fas? — La plano
Es bèn vrai qu'a seis andano
Souvènt plus drecho! — Anen, un pau d'ajudo enfin!

— Li vau!... Dien que lei mesuraire
D'uno outro routo an deja fa lei plan:
Virant foueco, mai montant gaire,
Leissant la Grand-Baumo pèr caire,
Cènt countour de dabas en aut vous aussaran

Fin-qu'au pèd de Roco Fourcado;
Puei vers Roussargo, en tournant lou cresten,
La routo outra sa davalò
Sus Coutrouno... — Mai la mountado
Sabes quant durara?.. — Marchant poulidamen,

Despuei Sant-Pounes faudra doues ouro.
- E fin-qu'au daut lei toucas dentela
Seran la distracien majouro!
- Soun pas proun bèu? — Meme meiouro,
Aloungara, ta routo, en tirant pèr eila...

— Viéu qu'alongon bèn miés encaro.
Vouésteis escóurchi, e n'en sian pas au bout!
- Li serian meme pas tout-aro,
Pèire un pau rude ensin s'aparo,
Se tóutei cinq fasian coumo tu, subre-tout!

Fèlis a 'n moumen de vergougno
E zóu! noueste ai mounto encaro un brigoun;
Es qu'avèn tóutei boueno pougno
E bèn d'acord fèn de besougno!
Mai Fèlis pèr malur fa dous pas, puei n'a proun.

Brave! Pau li crido, aquéu saio!
Que vèngues pas d'un esfors ti fini!
Pamens quand la carço gaçαιο,
Que si desviro o que varaio,
Se poudiés d'uno man au mens la reteni!

- Aussi vias pas qu'uno bardello
Souto l'eissàri aurié bèn miés vaugu
Que vouesto cuberto? Es nouvello
Vouesto metodo embastarello!...
Mai vite Aguste ensin li touerno soun degut:

As resoun, mai toun bouen lengàgi
Auriés pouscu nous lou teni plus lèu,
Pèr lou mens avans l'embastàgi;
Es clar qu'en aqeste passàgi
Aurian besoun d'ajudo e pas tant de counsèu.

Basto! mai de miechouro encaro
Dins la nue sournou ensin bataierian;
Fèlis meme, bagnant sa caro,
Dei peno aguè sa part amaro;
Au coulet de Bartagno enfin avenguerian.

Nouéstei fremo, rassegurado,
De sei quielet noumbrous e fres e gai
Saludèron nouesto arribado
E plóuguèron, sei galejado,
De nous vèire mounta lou cargamen e l'ai.

CANT V

La chavano

Au couele de Bartagno. - L'angelus à Sant-Jaume. - L' ai s'encalo mai: li fau de lume!
- La davalado dins la nue. - A la Brasco. - La soupado. - La couchado: à la paiero. -
l'espetaclouso tempèsto. - Lou vièi nouguié afoudra. - La remaïssou. - Lou gau canto.

Enfin la mountagno es vincudo!
Sus l'aigo-vers avèn pausa lou pèd
E lei crudèlis esmougudo
Qu'à soun assaut nous soun vengudo
S'oublidon tout-d'un-còup' vrai, à soun aspèt.

Aro soun finido lei peno,
— Acò 's de crèire odou mens va cresèn,
E lou relàmbi vite abeno
Lou batemen de nouéstei veno:
Un suave chalun seguisse un mau cousènt!...

Uno frescour deliciouso
Nous enviroto; abaucamen divin,
Uno aureto meloudiouso
Entre la nue silenciouso
Aleno tout-bèu-just dins la como dei pin,

Quouro un dan-dan que nous trepano
Remeno à Diéu nouéstei couer arderous:
Es de Sant-Jaume la campano
Qu'au dessus dou Plan-d'Aup debano
Soun angelus, e fèn un grand signe de crous!..

Sian ravi; nouesto amo pantaïo...
Oh! bello nue!... Dins la fèblo lusour
Que sus lei cimo s'es;parpaïo,
Noueste uei tafuraire varaïo
En cerco dei ilot blu perdu dins la founsour,

Mai l'estelan que beluguejo
Sèmblo apiela sus la cresto dei mount
E plus luen qu'élei tout negrejo,
Tout, franc d'un rode que rougejo
Peralin dins la baisso, iei counfindóu tremount:

Aqui viho, espouscant soun lùssi,
La grando Vilo emé tout soun grouïn,
E de Planié que fa d'esclùssi
Nous vènon aquéleis eslùci
Que soun fare lunchen proumeno dins l'oumbrun.

Bèu Diéu! quento superbo visto
Aurian d'eici souto un soulèu dounant!
E serié 'ncaro mai requisto
Se fasian alor la counquisto
Dou roucas couloussau qu'es aqui douminant,

Car de la cimo de Bartagno
Incouparable e sènso entravadis
Es lou còup d'uei sus lei mountagno,
Sus Esterèu que la mar bagno,
Sus Canigou, Ventour, leis Aup, mount nevadis.

D'adaut la terro prouvençalo
Emai sa crous an lei proumié belu
De l'aubo alegranto e pourpalo
E sus la grand mar tourmentalo
Dóu marinié qu'aribo an lou proumié salut.

Mai lou sourne embéu la marino,
En aquesto ouro, e toutei lei valoun;
E tout-just s'enca si devino
Lou rode aqui qu'uno machino
Li fasié dins un tèms travessa lei carboun:

Dou Plan-d'Aup lei begno escalavon
Pèr un liban à-n-un tour estaca,
Puei vers Sant-Pouens lèu davalavon;
Dei bastisso ounte trecoulavon
Un pèd de chaminèio es tout ço que l'a 'nca

E davau lou viéu que pounchejo
Sus un vièi jas... — Anen, faudrié parti!
Uno voues ensin nous eigrejo:
Lou cèu sèmblo que mai soubrejo
E de vous estravia vous agradarié-ti?

— De qu'as pòu? A la davalado,
Coumo si dis, lei cougourdo li van!
— Mai li fau douna la butado!...
— E coumo a passa la goustado,
Siéu d'avis, iéu tambèn, de reprendre lou vanc.

Adiéu, pantai! lou vèntre bramo:
Adiéu, l'estàsi! Adiéu, prudènci, aussi!...
Sian pèr prene souto la ramo
Un camin larg, mai Pau reclamo:
— Coulègo, moute anas? Sera, plus court d'eici!

E lèu nouesto troupo oublidouso,
Prenèn à drecho, enrego un caminet,
Ai! las, uno draio escabrouso
Qu'uno cougourdo voulountouso
Noun pourrié davala, meme anant plan-planet,

E l'ai dins lou sourne s'aplanto...
Oh! feiniantas, es de recoumença
Nouesto penasso estravaganto?
La fringalo alor noun t'aganto,
Que vuei d'èstre à la grùpi as tant pau l'èr pressa?

— Zóu! de couràgi, cambarado,
E buten fouert!... Anen, Fèlis!... Pauloun!...
— Acò 's clar; à la davalado
Noun s'oublidara la mountado
De tout-escas!... — Eh! bèn, li sian, li sian: zòu dounc!...

E dins la draio souloumbrouso
Peniblamen gagnan quàuquei cènt pas,
Quouro nouesto piado doutouso
Embrounco uno roco gibouso
Que, plus voulountous meme, un ai sautarié pas;

La roco au bèu mitan mourrejo
E fa 'n redènt: coumo sian pèr passa?...
La ràbi alor nous pouchounejo,
Guste e iéu: noueste ai qu'arpatejo,
Iéu, l'arràpi à la coue, mi còti pèr l'aussa;

Pèr la maisso Aguste l'aganto
E d'un vanc, zóu! vague de l'autre las:
Sus sei cambeto trantraianto
La pauro bèsti tremoulanto
Fa proun de si teni, mai l'embastado, ai! las,

S'esparpaio au sòu touto entiero...
Ah! sian poulit!... Mounte avèn trabuca
Si destrié mau dins la sourniero:
Serian-ti pas à la crousiero
Dóu camin plus courous qu'adès avèn manca?

Basto aguessian aquelo chanço!
Alai pèr lou sou fau d'abord de-tastoun
Rabaia cuberto e pitanço!...
— Aurian pas talo maluranço
Em' uno bardo! — Ah! vai, Fèlis, sabèn lou toun!...

Tau qu'un cèrvi que s'abandouno
Quand tout un jour lei chin l'an secuta
E d'uno batudo ferouno
L'an coucha luen de soun androuno,
Nautre pèr la fatigo ensin sian acouta

Sènso bèn saupre en que paràgi
Avèn fa tèsto e lou desrèi nous pren.
Dins la founsour d'un boues sóuvàgi
Sian-ti perdu? T'envas, couràgi,
E lou couer lou mai dur d'uno angouisso es estren.

Meme Aguste rèsto en sesiho,
Un pau cregnènt; iéu mi siéu estèrni
Sus un lié rufe de peiriho
Tout-just d'un pessu de ceniho
Dins lou founs deis escafo uno brigo garni,

E lou bate-couer vounvounejo
A moun pous... Ai! de nous-autre pas un
A-n-aquesto ouro talounejo:
Lou mai fanfaroun bretonnejo
E l'amourous soulet noun maudisse l'oumbrun,

Quouro à soun bras soun amourouso
En tremoulant s'acoto, e d'escoundoun
D'uno caresso sabourouso
Eu rasseguero la paourouso
Qu'a gau de s'assousta dins un dous abandon.

— S'avian pèr trempa lei boutiho
Rèn qu'un pau d'aigo, eici tant souparian:
Iéu, lou vin pur taimbèn resquiho
Dins moun gargassoun... Eh! lei fiho,
Que n'en dias, pèr un coup?...Se nous istalavian?

Mai n'en siguè pèr sa chameto
Lou brave Aguste e degun respoundè:
Ah! sabien plus, nouestei fremeto,
S'ero enca siéuno soun armeto,
E dins l'alén,dei pin un plagnun si perdè.

- Fau pamens pas qu'ensin nous plegue
Un pau de contro! Auguste alor repren:
Lou, vin tira fau que si begue
E qu'a de piés fau que si vegue:
Adounc, un còup de man e d'eici partiren!

Avèn encaro uno estirado,
- Iéu, m'es avis, fin-qu'au pèd de l'Uba
E s'à la Brasco, cambarado,
Voulèn trouva la retirado
Coumo de va-de-nue couvèn pas d'arriba.

E dins l'eissàri que gounflejo
Pèire em'Aguste an leu mai tout rejoun
E nouson fouert couerdo e courrejo
Dòu tèms que Fèlis murmurejo
Qu'acò vau pa 'no bardo emé dous courrejoun.

- Atubo un pau de lume, Pèire,
Qu'oubliden rèn!... Mai lou fin lumenoun
Quand! dins l'escur nous laisso vèire,
D'esperéu, sèmblo pas de crèire,
Si mete à camina noueste brave asenoun!

Si, d'espéreu, noueste ai camino
D'un pèd segur!... Soun testardige, alor,
S'esplico e, dirai, s'alumino!
Es que cregnié l'escuresino
Noueste prudènt Martin e la prudènci es d'or!

Quand disiéu que dei pouerto-eissàrri
Avian la perlo!.. Un coup de vènt!.. Ai!.. Ai!..
Plus ges de lume!... E, noum d'un gàrri!
Lou vaqui mai que coumo un bàrri
S'aplanto sus sei pèd nouesto perlo deis ai!

Mai vite uno flamo nouvello,
Messo à la sousto à travès un journau,
Nous tamié sa lus palinello
E l'ai, sènso mai de chancello,
S'entancho de segui lou semblant de fanau.

Nouesto bèsti ensin nous leiçouno:
Qu bèn li vèi bèn camino e va dre!
Or l'oumbrino nous enviroouno
Souto boues; la luno, que douno,
Dei baus que countournan esclaro que l'adré.

Mai la davalado aro es gaio
E proun seguro à la fèblo clarta
Que sus lei peiro de la draio
Nouesto pauro viholo estraio
E la voues dei jouvènt s'es remesso à canta.

Oh! davalado fantastico,
Car, l'a 'n moumen, sèmblo s'amaliça
Un ventoulet que, magnifico,
Jougne à la nouestro sa musico
E si clinon lei pin pèr nous vèire passa!

E davalan: sus la cenho
Que soun encèns embaumo aquéstei lue
Lou pèd despachatiéu resquiho!
E lou tuert d'un peirard que briho
Fa fugi l'auceloun escoundu dins la nue;

E davalan toujours: la draio,
A drecho, à gaicho, en virouioun noumbrous
Sus lou pendis sombre varaio
Puei si desbousco e nous endraio
A travès un campas, ai! ai! proun clapeirous,

E zóu! que davalan encaro!...
Es dounc bèn luen e bèn bas aquéu plan?
Es pamens pas que musen aro,
Car dins la nue que nous mascaro
En seguido de l'ai sèmblo que roudelan,

E vague toujours de descèndre!...
Mai chut!... dan!... din!... Sian pròchi d'un troupèu
Que tounde au fres lou margai tèndre
E claramen vèni d'entèndre
Lou brut de sei redoun... Ai! ai! quent estampèu!

Soun chin, que nous a nifla, japo
E nous vèn contro em'un vanc esfraious
E vite un quielet nous escapo,
Mai dins lou sourne que l'aclapo
Lou pastre a vist de lume e d'un bst! nervïous

A lèu souna l'ardènt japaire...
Ah! lou brave ome!... Au ressouen de sa voues
Subran, — coumo d'un navigaire
A la fùri dei vènt bramaire
Quouro entre-vèi lou port, toumbo tout noueste ancoues

E li cridan: — Hòu! brave pastre,
Sian enca luen de la Brasco?.. Esto nue,
Pèr acaba noueste mal-astre,
Clarejon pas foueço leis astre
E recounouissèn mau la trevanço dei lue.

— Nàni, sias pas luen dóu meinàgi!
Que nous respouende; es aquito en virant
A dous cènt pas!... Oh! dous lengàgi
Que, ranimant noueste couràgi,
Nous fa tóutei de joio arpateja subran!

Ai! las,dóu meme refoulèri
Noueste ase es pres e sauto e, pataflòu!
Lou sautaire aurihu tròup lèri
Nous douno un nouvèu treboulèri
Car deja la mita de sa cargo es au sòu.

— Ai! bello santo Madaleno!
Clamo Jousè: noueste bouen requiqui!...
E, flòu! uno boutiho pleno
Emé lou rèsto si sameno
Just subre un roucassoun mourrejan peraqi.

Mai nous sousto la grando santo,
Que sus lou tap s'es amourrado plan
La bello fiolo roussejanto,
E l'estrambord que nous aganto
Nous fa, coumo d'ascla, rire e pica dei man.

Lou pastre nous vèn à l'ajudo:
— Lou mèstre, dis, sera pancaro au lié
E vous fara la bèn-vengudo:
La cargo emé lei man tengudo
Fara proun dous cènt pas, puei sias au petoulié!...

L'oustau siguè plen d'acuiènço
Coumo es toujours un oustau de peisan,
Car l'espitaliero avenèncò,
Se tout-aro en vilo sian sènso,
Dins soun biaisdóu vièi tèms trèvo encaro lei champ.

Dounc, à la franco margarido,
Dins un moumen siguerian agrouva
Pròchi uno sourso benesido
Qu'escampo soun aigo clarido
Dins un long pèd d'abet que lei pastre an cava

E tiravian de nouéstei biasso...
Es un chalun, quouro arribas tardiéu
Emé lou ruscle e cambo lasso,
De trouva coumo acò 'no plaço
Que dirias facho esprès dins un rode agradiéu;

Aussi fuguè longo e galoio
Nouesto soupado au clar e fin murmur
De l'aigo, e lou rire e la joio
Reviscoulèron nouesto voio
Autant que la pitanço e lei còup de vin pur.

Meme atacant uno roumanso,
Cantaire esquist, Pau vèn de s'auboura,
Quand, dins la sausetto que danso
Sus nouéstei tèsto e si balanco
A-n-un rounfledou vènt, lou cèu s'es escleira:

Dóu ressaut uno noto fausso
Coup subran lou cant entamena:
- Oh! tron d'un goi, crési qu'uiausso!
Fa lou cantaire, e cadun s'ausso
Pèr espincha plus luen lou plan alumina,

Car còup sus còup aro lampejo...
— Pòu! Fèlis dis, sera que de calour!...
Mai l'oste es aqui; cabassejo:
— Sàbi pas!... L'auro si fa frejo
E l'estelan s'enfango... Ah! sian pancaro au jour!...

Vias pas que Cassian, s'enmantello?...
Marco de pluejo!... Alor, proun soucitous,
Mau-grat qu'encaro leis estello
A nouésteis uei fuguèsson bello,
Dins la paio anerian cerca 'n repaus doutous...

Avès de fes à la paiero
Ea voueste souem?... Coumo de benurous,
Après sa jouncho journadiero,
Li douermon sa nuechado entiero
Lou gardaire d'avé, lou jouine pèd-terrous,

Mai nous-autre que de la vido
Leis aise vuei nous an afemeli,
Tant que subre un lié de caussido,
Dins la paio de-fres crussido
Pèr la pèiro d'eiròu, nous-autre, agroumeli,

N'en fèn de saut, de viro-passo,
E d'oui! e d'ai!... Lou cabrit nervious
Dins soun pasquié miés tèn en plaço,
Coumo au bèu pounchoun de la jasso
Mens gemisse lou gau sus soun aste rouious...

Em' acò s'un moumen lei rire
E leis escàfi o lei gème an pres fin,
De brut sutiéu qu'es pas de dire
Dounon l'esvèi, qu'un muou souspire
O qu'un gàrri s'encourre; e lei brut lei mai fin,

Lou frustamen d'un bout de paio,
Dins lou silènci e l'escur crèisson lèu
E treboulon: l'èr que varaio
Souspiro au trau de la sarraio
De plang misterious... e vai dourmi, moun bèu!

E douerme, tu, jouvènço bello,
Quand, sourdo meme ei vounvoun de l'escur,
Trèves au país deis estello
E que lou couer, ve! ti bacello
De sèntre pas troupe luen un alen dous e pur!

O; douerme, tu, jouvènço lèri!
Es, la nue sournò, amigo de l'amour
Qu'a pas cregnènço dóu mistèri...
— Houi!... Dins un subit treboulèri
Jano quielo aquéu hou! que s'arrèsto tout court...

— Houi! subran replico Martouno;
E sei dous hou! nous an fa tressauta...
— Qu'aribo à-n-aquélei pichouno?
Fan lei maire que destressouno
L'esfrai. — Moun front! dis Jano; un gàrri l'a frusta...

— Miau! fa Pèire... O bèn uno espigo!...
— Es Titinet, Martouno coupo aqui,
Qu'au mentoun m'a fa lou coutigo!...
— Oh! lou boustre! dis Pau... — Iéu? digo!
T'auriéu pa'n meme tèms crida; quiquiriqui?

Titin rebèco em'ardidesso
E cadun ris... - Oh! d'aquéu Titinet!
Ajusto Jano que, souspresso
Pèr lou dous tuert d'uno caresso,
Avié quiela proumiero e que doucamenet

Aro empresouno en sa man clauso
Lei det proun lèst de Pau, soun tèndre ami
E lou rire, qu'avié fa pauso,
Aro repren sus touto causo,
Fèlis aguènt soulet pas cessa de dormir...

Fèlis rounflo coumo uno basso
E sa musico a puei de crèis subit
Qu'es de saupre se la cauvasso
Pantaio pas e si repasso
Que buto encaro l'ai de soun pougnet ardit.

— Hoi! foume! dis Roso-Mirèio,
Qu m'a 'spousca d'aigo dessus lei man?
— Coumo la flour de la ninfèio
Sentiras bouen, car m'es idèio,
Ma bello, fa Titin, qu'adaut, au calaman,

A 'scala lou gàrri de Jano
E, iéu tambèn, m'a jita sus lou front
Seis espousc!... — Buai! tè!... — La chavano
Es pas luencho; la tremountano
S'enmaliço, vèn Pèire, e l'a 'n pau que lou tron

S'es mes, erési, de la partido
Pereilalin; m'a sembla de l'ausi...
Aguste apounde: — L'ai ausido,
Iéu tambèn, sa luencho brounsido
E l'a 'n moumen qu'adaut lei viéu pas plus lusi,

Leis estello que sus ma tèsto,
Entre lei téule, espinchàvi sei fue...
Dins la nivoulino celèsto
An dequ, paureto, à la lèsto
S'amoussa; vesès l'èstro; un four! fa negro nue!

— Es vrai: l'a plus ges de luno
E plus d'estello! alor faguèri, iéu,
Sus lou lindau vengu tout-d'uno;
Fa de gouto grosso caduno
Coumo un faiòu cocot: va plòure, sacrebiéu!

— S'avian au mens la candelouso
Que toujours gàrdi à la tèsto dóu lié,
L'atabarian. Ai! malurouso,
Contro lou tron, fa 'no paurouso,
Ni nouei dei tres cantoun, ni rampau d'óulivié!

— Que! Titin, es bèn d'aigo frejo
Que sus mei man ai senti tout escas!
Fa Roso-Mirèio... — Ai! lampejo!
Crido uno autro, e, pardiéu! blinejo
A travès dóu cubert coumo se l'èro pas!

— Sian poulit!... Iéu vite sourtèri
En entendènt sounaia de redoun,
Mai à l'entour dóu jas faguèri
Ges d'alòngui, car, per Sant-Cèri I
Aviéu jamai vist cèu tant sourne e tant feroun:

— Sian fres! Flamejon lei Beguino!
Sèmblo un encèndi, un immense volcan!
Lou pastre encastro; ourlo, sa chino;
Eu m'a di: - Lou vènt remoulino!...
Sàbi pas!... Sian pèr vèire un famous auragan!

E lei pastre si troumpon gaire...
— Noun! Avès vist lou mètstre de l'oustau
Qu'es esta proun fin devinaire...
— Ai! las, mai, nautro, qu'anan faire?...
— Anas prendre lou fres, poulido!... — Acò 's fatau!...

— Sera charmant, Roso-Mirèio,
Car faudra puei que ti metes au se
E pourrian vèire de mervèio...
— Sènso-sèn!... — Mai pas sènso-idèio!...
— T'ajudara, se voues!... — Fas bèn de dire se!...

Un tron subran coupo lei riaio...
— Jèsu! Maia!... lei fremo en si signant
Ensèn fan un bound sus la paio,
Puei silènci... Un brut de sounaio
E lou japa dei chin, pèr coup l'acompagnant,

Nous mounton, counfus, de l'estable
Ounte lou pastre estrèmo sei moutoun,
Mai lei cuerbe, aro fourmidable,
Lou rounflamen inalassable
De Fèlis que d'asard ausso encaro lou toun.

Chaurihan... Qu'un moumen si taise
Lou chafaret, un autre brut sutiéu,
Un cr,enihamen fin vèn d'aise
Zounzouna... Qu'un moumen s'amaise
Lou vènt que siblo e viro en de rebound catiéu,

E subran destrié, nouesto auriho,
Lou tuert menut que fa l'aigo en tombant
Dessus lei téule e sus l'aubriho..
Catacla!... Trono... Au lamp que briho
Viéu tóutei nouéstei gènt, d'assetoun, tremoulant!

Es verai, lou tèms s'enmalico...
Plòu... L'a de grèlo... Aro fa 'n brut d'infèr
La raisso dessus lei téulisso
E leis aubre ramu que trisso:
Es un aqueiramen de la terro pèr l'èr!

E catacla!... Lou tron estrasso
Lou fiermamen e l'emplisse de fue:
De coumbo en coumbo si tirasso
Soun brut fourmidable e, roujasso,
Sa flamo renadivo a fa fugi la nue.

Un lamp vèi l'autre e soun eslùci
Que tremoulejo es, dirias, sènso fin,
Que, se d'asard si fa 'n esclùssi,
Enluserna dei rai destrùssi,
L'uei persisto de vèire un rebat pourperin

E catacla!... L'a 'n terro-tremo!...
S'envendran bèn lei muraio dóu jas!
N'a pou la ratugno elo-memo
E deserto sei traui; lei fremo,
Ço que quielon, bouen Diéu! quand fin-que sus soun nas

Sauto uno rato fugidisso,
Car n'en a proun que fan lou vai-e-vèn,
D'aquélei bèsti courredisso,
Mesclant soun aigro cridadisso
Au tarabastdóu tron, de la raisso e dóu vènt!

Lei fremo, caro trevirado,
Cors tremoulant, ciho toumbant de plour,
L'uno contro l'autro sarrado,
Cridon à la desesperado,
Prègon, si desavien... Fèlis rounco toujours!

Leis ome élei-meme rien gaire:
D'aperadaut lei restanco an creba;
Sus nautre, nous plou de tout caire,
Dóu cubert, inmènse arrousaire,
E de l'intrado que, lei pouerto aguènt tounba,

Lou ventas li mando l'oundado
A cournudoun, coumo quand couesto rèn.
Iéu, lou plus prochi, es inoundado
La saco, de paustras boundado,
Qu'aviéu pres pèr cuberto e coumo paro-vènt;

Lei coulègo! élei, dins la paio
An fa soun traui: li nargon pluejo e fre,
Mai li soun en vivo bataio,
Car lèu pèr li faire ripaio
Un flo de niero en jun soun vengudo tout dre,

E sei couièntei mourdiduro
En mai-que d'un an fa de blaveiròu...
Cla!... Catacla!... S'aquéu tèms duro,
Bèsti, aigo e fre nous rendran duro
Nouesto nuechado, urous enca se pèr lou sòu

Lou ventaras e la plujasso
Emai lou tron, verin deis elemen,
Noun esternisson nouesto jasso:
Defouero es un flume que passo
E sei flot tourmentau baton furiousamen...

Uno pensado mi chirouno:
Que fa noueste ai? Souto un envans estré
L'avèn leissa: dins soun androuno,
Pauro bèsti, de-segur pouno...
S'a set, lou crespina, pourra béure de dre!

Emé sang plan respouende Pèire;
E tu, fava, noun ti sera mestié
Pèr soun abéuràgi, entre vèire
Lei proumié raidou jour risèire,
De ti derraba caud dóu moufle de toun lié!

Aquelo dicho truffarello
Amaino un pau lou negrun dei pensié,
Car la tristesso plourarello
Emé la joio cantarello
Vesinejon souvènt... e deja si risié...

Lou rire es un mau que si douno...
Lèu Jano vèn: — Aguste avié resoun:
Au pas que Bartagno courouno
Aurié faugu soupa!... — Mignouno,
Pèr tren?~pa noueste vin, d'aigo aro n'aurian proun!..

— Seriés esta, rebèco Jano,
Lou pu taloun, tu qu'ailles béure pur!...
— Auriéu tapa la damo-jano,
Fiche! Aguste repren; puei sano
L'àigo mi fa pas pòu e noun mi serié dur

De n'en béure, ve, poulideto,
Uno lampado, au founs dóu goubelet
S'aviéu d'ajougne tei bouqueto
Qu'ensin quand riés mi fan ligueto...
— Foume! vièi pau-de-sèn, poues chanja de coublet!

Que begues pur mi toco gaire!
— Tè! pren, lipet!... — E l'ami Pau, que dis?...
Mai, Pau dis rèn... Lei calignaire
Tendramen, à l'escur soustaire,
An sa man dins sa man e soun au paradis...

Ah! bèu rire! Deja s'óublido
Lou marrit tèms!... Ai!... Catacla!... Cra!... Cra!...
Un lamp, un tron, l'estrementido

D'un aubras que sa ramo ardidò
Tremouelo e vèn au sòu subran de s'amourra...

L'esfrai, nautre, nous desaleno...
Pas un plagnoun... Restan mot, aurihous...
Lou sang bate plus dins lei veno;
Nous sufoco, la narro pleno,
Uno vapour de sóupre; un fum misterious...

Dins lou vuide de l'èstro uno ombro
Passo... Es lou pastre: — Avès ausi? nous fa...
Si trufarié!... Mai noun, si noumbro
De tremoulun dins sa voues soumbro
Que nous dis: — Hoi! que furn! n'en sias pas estoufa?

- Es vous, lou pastre?... Quent auvàri,
Obro d'infèr, vèn ensin d'arriba?
Lei pàurei mouert dins soun susàri
S'eigrejantdóu souem seculàri
Auran di que lou cèu sus la terro a tounba.

— Avès ausi la caoussado
Dóu vèi nouguié qu'oumbrejava lou jas.
Oh! fa pieta!... D'uno uiaoussado
La negro nue siegue estrassado
E veirés, estèrni, soun. vaste capelas;

Tout es au sòu; fin-qu'ei racino
Lou tron ferouge a cura lou gigant:
Lei siècle l'an fa que doumino
Cèdre, piblo, tueis e sapino;
Un lamp passo e n'a proun: es plus rèn, éu tant

Ah! lou mètstre n'en sera 'n lagno!..
Fèlis s'estiro e: — Menas bèn de trin!
N'ous fa sa voues emé la cagno:
Que vous pren?... Lou rire nous gagno
E dei fremo remesso amaiso lou chagrin.

L'autre es pas countènt: de l'aurigi,
Ato! avèn bèu li faire lou dedu,
S'encagno e dins soun testardigi
Soustèn, coumo pres de fouligi,
Que galejan, car, certo, aurié proun entendu!...

Devinas s'an fini de rire,
Nouéstei fremeto, e se leis imitan;
Eu, pèr li prouva noueste dire,
Lou butan defouero; acò 's pire:
— Uno eigagnolo! dis en aparant la man.

E, zóu! que s'estrèmo à la lèsto
Tout bagnoussa, mai pas bèn convincu
Qu'aguen pas reva la tempèsto:
L'a 'nsin d'ami de la countèsto
Que pér vous dire noun, toujours noun, an viscu..

Dirias dins acò que lampejo
Plus raramen; lou tron s'es aluncha;
Plòu mens e la nue mens soumbrejo;
Sèmblo que l'èr mai si refrejo,
Mai lou vènt rounflo plus: lou matin l'a loucha.

- S'escarto alin vers lei Bequino,
A Sant-Cassian e sus lou Sant-Pieloun!
Dis puei lou pastre que si clino
Fouero de l'èstro e qu'eisamino
Lei cresten banaru qu'un long nivoulas blounc!

Subran si l'acroco e s'estrasso.
De nouesto angouisso acò serié la fin?
Sian lèu toutei ~lavans la jasso;
Fèlis, estendènt sa manasso,
Es triounflant: vrai, fa plus que quàuquei blin.

Mai, fiche! un astroulo badavo,
Lou nas en l'èr, e toumbè dins un pous!
Eici sian: l'aigo que rajavo
Furiouso esto nue, cavo, cavo!
A profunda lou sou pertout: avisen-nous!

De mai, coumo un gat dins de lano,
Dins lou brancundóu vièi nouguié sian pres;
Soun inmènso ramo encabano
Touto la court e, soubeirano,
S'en fugènt l'espoussan, nous a lèu mes au fres.

Ai! viras-vous! Tè! sus Bartagno,
Tè! sus Roussargo es tambèn estrassa
Lou nivoulun plen de magagno
Qu'ensournissié plano e mountagno;
La luno lou trepano avans de s'amoussa;

Pereilalin dins la marino
Avans d'ana perdre sei rai mourènt,
La luno paloto, azurino,
De tencho jauno e pourperino
Dentello leis acrodóu vèu s'esvalissènt;

De relarg clavela d'estello
S'estèndon lèu de toutei lei coustat;
Puei, tè! Cassian que s'encimello
De lusour roso e clarinello
E lou gau.matinié qu'alín vèn de canta!

CANT VI

Lou plan

Briho, soulèu, flambèu de Diéu! - La mar dóu Plan-d'Aup. - Lei Carbouniero. - Giniés. - L'eiròu. - La Tourno - Lei sourso de l'Uvèuno. - L'oustalarié dei paire. - Au prat deis Aurulen. - Racontedóu vièi Janet: la proucessien voutivo dóu dilun de Pandecousto. - Auruou en aio - Lei penitènt canton matino. - Nouesto- Damo de bouen viàgi. - Leis ome, pèd descaus, cargon la Vièrgi sus seis espalo. - La vau d'Aurengo - La sourso de Roussargo - Lou cors- sant arribo au boues madalenen - De pelerin vengu de toutei lei caire si jounon eis Aurulen - Après la prègo, la riboto.

Alin lou gau matinié canto:
L'eco redis sa pïouso cansoun,
Inne de gràci, ouresoun santo,
Salut à l'aubo caressanto
Qu'en tout ço qu'es vivènt mete de frenisoun;

E crèisson lei clarour proumiero;
Chasque cresten si courouno de lus;
Es vite un desbord de lumiero;
Peramount, sus lei cimo autiero,
Meravihous encèndi, ardeJo lou trelus

E tout d'un còup, tau que lou prèire
Dins lei perfum de l'ardènt encensié
Aussant sus lou pople cresèire
Lou sant-sacramen benissèire,
Lou soulèu sus lou mounde ausso soun fièr brasié.

O resplendour! Astre sublime,
Rèi de l'espàci, o majestous flambèu
Que nous alargues magnanime
Tei rai fegound e belissime, [bèu,
Couvant tout ço qu'es bouen, creant tout ço qu'es

Siés la man de Diéu que sameno
Espèr e vido en toutei lei nacièn;
Après la nue d'estrànsi pleno,
Que daures lei cimo sereno,
Pèr la naturo entiero es la benedicien.

Toun proumié bais béu l'eigagnolo
Que pènde ei fueio uno perleto d'or;
Lei flour ti duerbon sa courolo
E vite à l'auro courriolo
De sei tèndrei sentour an fisa lou tresor;

Planto, animalun, auceliho,
Tout ço que viéu sus la terro e dins l'èr
A tei caresso si reviho;
Oh! mounto dins l'azur e briho;
Briho, flambèu cie Diéu: siés la vido e l'espèr!...

— Hoi! regardas! quente espetacle!
Nous soueno Pèire; an chanjn lou Plan-d'Aup!
Aco n'es un, tè! de miracle!...
Acourrèn pèr vèire l'ouracle:
La plano vasto e nuso es un inmènse lau!

Es uno mar la grand planuro:
Tout si li perde, aubre, bastido, jas;
Lei couelo que fan bourdaduro
Li soun negado à miejo-auturo
Souto un flot mótounant e pamens tranquilas.

L'espinchan: es d'aigo o de lano?
Es l'oundo en fùri e de baus assauta
Souto lei coup de tremountano
E qu'uno forço soubeirano
Aurié fissa subran dins l'inmoubileta.

Sus leis aut pendis escaire
Lou soulèu clar escampo sei belu
E dins la pureta de l'aire
Lou boues madalenen, pèr caire,
Ausso contro lou ro soun domo capelu;

E la santo Baumo auturouso
Qu'es arrapado à dous cènt cano d'aut
Contro la roco escalabrouso
Clarejo, blanco e lumenouso,
En dessus dóu boues sant, soun large pedestau.

Nautre aqui belan lou countraste
Dei raïoun d'or sus lou toumple escumous,
Mai bouto à man fau que si taste
E l'uei furnant l'ourizoun vaste,
SounJant que fau parti, sian un pau soucitous.

— Oh! que d'aigo! Fèlis remeno;
Coumtàvi proun, aièr, dessus lou tard,
Que plourié, car luno sereno,
Souvènt si vèi, pluejo s'aveno,
Mai noun, pensàvi pas que toumbarié la mar.

— Bah! vous entendènt dins leis astre,
Serié pas vous qu'aurias fa plòure ensin?
Alor coupo en risènt lou pastre;
Lou mèstre es sot de soun mal-astre
E vous n'en voudrié proun, se sabié, macastin!

Brave! Fèlis soulet ris gaire.
— Prenès acò, digas, pèr la grand mar?
Repren lou pastre galejaire;
Li manco un pau de barquejaire
Emé dins sa grand vèlo un boufe de vènt larg!

— Coumo! dirias pa'no calanco?..
— Tèl! de Cassis?... Martouno e Jano fan.
— Emé de flot de lano blanco!
Revertegas- vous fin-qu'eis anco,
Zóu! lei fremeto gaïo, e courrès prene un ban!

D'aquéu pastre! Es pas rèn qu'ei plumo
Que fau juja la bèsti... — Anen, vias pas
Que ço que prenès pèr d'escumo
Es rèn qu'un lié d'espesso brumo
Que lei rai souleien auran bèn lèu lampa?

Tenès! lou lançòu s'esvalisse
E peralin, avans l'oustalarié
Que sa formo vite grandisse,
Viéu un estang que s'esclarisse
E qu'es bèn d'aigo acò; lou bèu ban que l'aurié!

Quand plòu, l'aigo aqui si rabaio
De tout lou plan: l'a'n embut, vaste traou
Que de roucas li fan muraio
E qu'au mitan l'a de grand faio:
L'aigo intro en tournejan emé de gargoui rau

E pèr acò li dien la Tourno:
N'aurié 'nca mai, viro que viraras,
Touto la raisso s'encafourno
Dins de baumasso founso e sourno
Que soun seguramen cavado aperabas;

Lei sourso de la Casteleto
E de Sant-pouens si l'avenon tout l'an:
Ensin l'Uvèuno virouletto,
Fresqueirouso, cascadeleto
E lou Fauge argentau nèisson de noueste plan.

Mai Fèlis frounsissié lei ciho:
— Se tournavian de mounte sian vengu!
Dis puei: vias pas? La plano miho.
— Ato! es fouele! cridon lei fiho.
- La Tourno, dis lou pastre, aura lèu tout begu

La terro es eici graveirouso;
Dins rènn de tèms li pourrés camina,
Emé la rajolo arderouso
Que toumbo; la nèblo lanouso
Vias, dins un vira d'uei, que vèn de s'enana.

Oh! si, que lou soulèu dardaio!
Brigoulejan, puei lèu: — Hòu! de l'oustau!
Adessias!... E lógiero e gaio
Nouesto troupo en cantant s'adraio
Vers lou plan: dins uno ouro arribaren, an! dau!

Sant-Jaume dre sus soun auturo
Nous vèi passa: sa campano plan-plan
Sus la baisso que l'encenturo
Escampiho lei noto puro
De l'angèlus; tant-lèu, temido, en tremoulant,

Dóu moungié vesin la campano
Soueno tambèn; la Santo-Baumo alin
Respouende dóu bout de la plano:
Au dindamen sacra tresano
Nouesto voio e si marchó emé 'nca mai d'entrin.

Nous arrestan ei Carbouniero
Tout just lou tèmms que Titin n'a besoun
Pèr jita 'n moutas de blanquiero
Au pous, e Jano, coustumiero,
Pèr si leissa rauba, dins la teso, un poutoun.

Puei veicito un rode encantaire:
Paisson de cabro à l'oumbro dei nouguié;
A la frescour d'aubre assoustaire
Lou meinàgi espèro, envitaire,
Emé sa doublo fouent rajant dins un pesquié:

Tè! ve, sian à Giniés!... — Mestresso,
Bèn lou bouen-jour!.. La mestresso es aqui:
- Ato! es vautre, bello jouinesso!
E coumo sian? nous fa l'oustesso;
Aquesto sero, es clar que s'anan pas languì!

E nous meno l'ase à l'estable.
— Bon! Avès la coumo lei caragòu!
Nous vèn alor lou mètstre afable;
A faugu 'n tèmms espaventable
Pèr que tant bouen matin nous faguessias babòu.

Nous toco amistous la paletto
E nous dis mai: — Lou poulit roudalet
Qu'avès, de charmàntei pouleto!
Anue, moute èron, tremouletto,
Quand si bevié defouero e sènso goubelet?

— Avèn trouva la retirado
A Ia Brasco... — Ato, em' uno ouro de mai...
— Ero tròup longo l'estirado
Jusquo eici; nouesto mau-parauado
Avié pres de tèmms... - Coumo?... — An pas pourta soun ai!

Acò demando uno enlusido...
Dóu tèms, au péd d'un rouve caloussu,
Entre tres pèiro bèn chausido,
Aguste a fa d'aigo bouïdo
E li jito emé souin de café pèr pessu.

Es, la bevèndo, deleitouso
E largamen nous duerbe l'estouma
Qu'an besoun d'èstre generouso
Nouéstei biasso... Marcho arderouso
E calour dóu matin nous avien afama...

— Bèn! se l'anavian, à la jouncho?
Lou mètstre dis à soun fiéu qu'es vengu
Vers nautre; zóu! proun de man jouncho!
Lou tranchet de la courbo pouncho
Que coupe e 'sternissen lei garbo à soun degut:

Vite adaut lou soulèu s'enausso
E lou grand-béure encuei pòu s'óublida;
Isso!... L'enfant voulountous s'ausso,
Dins l'eiguetto de la fouent sausso,
En passant, sa man cruso e lèu desasseda

Courre à l'iero, desgarbeirouno
E zóu! de garbo! e vague d'esterni;
De-longo un varlet li n'en douno;
Ardido la lamo redouno
Coupou lei liame e vite en rèng arredouni

Lei garbo d'or soun cabaussado...
— Mai, li venèn, la blesto petara?
— Ho! fa lou mètstre, a 'nca d'aussado
Aquéu d'amount; sa dardaiado,
L'aigo d'aquesto nue, d'un chiquet la béura;

E puei, qu'es tard, veiren de faire
Rèn qu'un eiròu, mai plus grand lou faren,
E, Leissant la rodo de caire,
Coumo au bestiàri avèn de traire
Tout l'an de paio trisso, à piodo caucaren:

Aqui n'a proun d'uno esternido.
Acò 's charmant; vian que segound lou vènt
Metès la vèlo... Alor rapido
La mandóu mèstre, atravalido,
Desliamo aussì de garbo e 'n round tau que counvèn

L'eiròu rous crèisse e crèisse e crèisse...
— Nautre, que fèn?... Degun m'a respoundu;
Li fau mai: — Voudriéu bèn parèisse
Au rode que l'Uvèuno nèisse
De la Tourno; qu vèn?... Tóutei soun estendu

Sus lou margai: pas-un boulego.
— Li vau soulet!... — Bouen viàgi! élei mi fan.
Pamens Janeto un pau si plego
Vers soun ami 'mé la petego
De l'entrina; mai Pau roudiho e rèsto plan...

De la fourèst seguènt lou dèstre
Eri d'abord de-long dei petelin;
Puei brusque, ai pres counsèu dóu mèstre,
Coupant à travèsdóu campèstre
M'aprochi fisançousdóu lusènt qu'es alin:

La Tourno béu leis escourriho
E viro e viro... Ai vite despassa
L'oustalarié mounte en famiho
Doumenican e sàntei fiho
Fan la boueno acuiènço ei roumiéu alassa.

Dins lou relarg uno fouent couelo;
Mi li refrésqui, e fili, fili mai;
Veituro e carreto de couelo
Qu'an carreja de bando fouelo
Soun aqui, campamen estràngi que-noun-sai.

Pàssi lei granjo e lei bastido
Que l'es douna la sousto au cavalin;
Dins lei peirado engarrussido,
Dins lei mountiho arroucassido
Escàli e Nans subran grisejo aperalin.

Un grand cièri plen d'avaussiho
S'aprefoundisse e bado davans iéu:
Davàli plan dins la peiriho,
Mi retenènt à la rapiho
Ei cade, ei genestié, à tout aubre de Diéu,

E mi vaqui puei dins la founso.
Oh! lou poulit, oh! lou gai valadet!
Un dous bresihadis l'anounco;
Dins un lié roucassu s'enfounso,
Puei reparèisse: ai gau de li trempa mei det.

Mai d'ounte aquelo aigo sourgènto?
N'en vèn d'eici, n'en vèn d'eila: qu'es bèu!
Uno rajolo brusissènto
D'amout degouelo boundissènto
Dins l'èurre, lou mourven, l'arróumi e l'arnavèu.

Fau bèn que végui d'ounte boundo.
Es d'adamout?.Anen, zóu! remounten!
S'es encabanado de broundo,
L'armounious cascai de l'oundo
Nous guidara bèn proun pèr que la dessouten.

Mai de ribeja la rajolo
En escalant, foume! aco's pas tout-un;
Trevado que dei parpaiolo
Souvènt si perde la draiolo
E meno faire tèsto en d'afrous sagatun.

Enfin dins uno tousco espesso
L'aigo dirias qu'entameno soun brut;
Eto, à.sa sourso aqui l'ai presso;
Uno roco sèmblo qu'es messo
Pèr mi barra l'intrado en un trau loungaru;

Un saut e siéu dins la cafourno;
Sus lou sablas m'avànci de-tastoun;
Mai, hou! que la baumeto es sournò!
Un rai de jour pamens s'enfourno
E subran entre-luse un gourg dins un cantoun,

Un gourg negras que s'aprefoundo
Dins la mountagno; ai just un courdelet:
Màndi uno pèiro coumo soundo
E dins lou gourg que douerme l'oundo
La pèiro enfounso, enfounso... Adiéu, moun coudoulet!

M'a 'squiha la fino courdeto,
Mai n'a proun di; terrible garagai,
Es bèn eici la Casteleto
Que dins sei cauno e sei crouteto,
Quand leis aigo soun basso, à milo bèsti e mai

Pourrié douna la retirado,
Mi diguè 'n vièi: lei plour madalenen,
Que la Tourno n'es abéurado,
Pèr de rigolo sousterrado
Si l'acampon au founs dins lei tèms ivernen,

E l'oundo fresco e lóugeireto
Que, libro, va, dins leis arróumi en flour,
Sauteja coumo uno cabreto
Es l'Uvèuno bello e clareto
Qu'umblamen à mei pèd vèn de prendre lou jour.

Coumo uno cabreto, sautejo
De roco en roco e dins toun lié moufous
Doucamenet rigo e lalejo,
Dins lei floureto serpentejo,
Eigueto lindo: ausi toun rire clar m'es dous.

An! davalò, puei fai pausetò;
En foulejant à tu van s'enliassa
Leis àutrei sourso. tei sourreto,
Que ti prenò à la brasseto:
Ensèn, iéu, d'assetoun, vous regàrdi passa.

Oh! filas, oundo jugarello;
Pourtas pertout vido, joio e soulas;
D'àutrei coumpagno riserello,
Coumo vous vivo e cantarello,
Vous espèron plus luen: em' élei davalas!

Sus vouéstei ribo afrescoulido
L'aubre verdejo e boutounon lei flour;
Li béu la terro trefoulido
E, gaio, de vilo poulido
Li fan la farandoulo, à l'oumbro, à la frescour.

Anen, filas! vouéstei caresso,
N'a de besoun, la terro, pèr sa car;
Li lei fau pouerge emé largesso;
Aurés samena de richesso,
Quand peralin, deman, vous perdrés dins la mar...

— Tè! lè! lou vaqui que pantaio!
Subran mi coupo uno brutalo voues...
La calandro lógiero e gaio
Sus un riéu plano e si miraio:
Un ploumb siblo e l'aucèu toumbo dins leis abroues:

Coumo se l'avien rout leis alo,
Subit ensin a toumba moun pantai;
Lou murmur deis aigo argentalo,
Lei souspir que l'aureto eisalo
Dins lou fuiun mouvènt dei piblo e dei grand frais,

Lou cascaiun de l'auceliho
M'an embruma dins un dous bressamen
E ni lei pas sus la peiriho,
Ni lei frustado de l'aubriho
De mei soungé an pouescu mi distraire un moumen.

Pèire e Titin, de mei pensado
Roumpènt lou fiéu, davans iéu soun planta.
Es vautre, bràvei cambarado!
Se m'avias fa l'acoumpagnado,
Aurias vist... Mai n'an proun de mi l'ausi counta.

Titin, éu, vou faire la pesco
Dei chambre... Hoi! hoi! que soun gai!... Puei
Sa lengo seco coumo d'esco, [sentènt
Vite s'amourro à l'aigo fresco
E n'en pren de cigau que l'envejo nous tèn

De béure à soun vèire: es un chale!...
Mai fau, ai! las, que tout bèn ague fin.
Mau-grat que lou fres nous regale,
Avans quedou cèu nous davale
De fue-gres, dóu retour fau prene lou camin...

A l'oustalarié fèn pausetto:
Vian lei chambroun e lei grand courredou
E la capello auto e lingeto
Ounte lei mounge e lei moungeto
La nue canton matino, e lei sants ouradou,

E l'ouerto e l'umple çamentèri
Qu'au souleias ausso sei crous de boues,
Claus sacra qu'après lei misèri
De la vido e sei treboulèri
De santas soun vengu l'abandouna seis oues.

D'ùnei brihèron dins lou mounde
Que douermon vuei au pèd d'aquéstei crous;
La memo terro leis escounde,
Lei coumbourisse e lei counfounde,
Plega dins l'umblo raubo, élei, leis auturous;

Elei, lei grand, sa mouert sereno
Nous douno eisèmples: an vincu sei passien!
Ensin faguè la Madaleno
Que de trento an de dùrei peno
Au flanc d'aquéu roucas paguè sa redemcien.

E vers la baumo que blanquejo
Aussan leis uei, counfourtissènt ensin
Noueste pensamen qu'amarejo...
Es uros que lou boues verdejo
Davans nautre e nous crido à l'ombro de sei pin...

Lei pin n'en fan que l'ourladuro
Dou boues ombrous e poussan de l'avans
Souto la vasto estampaduro
Dei plai courouna de verduro
Que pèr lei trepana lou soulèu rajo en van.

La draio mounto serpentouso
Dins la frescour, vers la baumo escalant:
E mounto, e mounto resquihouso
Souto la vouto souloumbrouso
E fa pauso de fes en de rode galant.

Nautre, l'aguènt vite leissado,
De la fourèst coustejan lei countour,
Mai lei draiolo entravessado
Que l'aubriho l'es enliassado
Nous fan faire à noun plus de tour e de bestour

Coumo au tèms qu'anant à l'escolo
Fasian la casso, ardènt tant que si pòu,
Ei dameisello de gandolo
O qu'aguènt rout la deneirolo
Un peirin nous jitavo, à tiro-péu, de sòu.

Nous faudrié meme un fiéu d'Ariano
En de moumen, pèr nous desembouia
Dei garlando d'èurre e de liano
Que la naturo a fa gardiano
Dei founs misterious: li sian vite estravia.

Pamens de la fourèst prefoundo,
Pèr alenado, un brut counfus nous vèn:
Es-ti la toumbado d'uno oundo
O lou boulegadis dei broundo?
La séuvo a ges de riéu; l'espàci a ges de vènt.

Nous leissan mena pèr l'ausido;
S'encapo, es clar, just sus noueste camin
L'endré que n'en vèn la brusido,
E nouesto auriho estabousido
Entènde crèisse lèu coumo un chavalarin;

S'ause de tout: de parladisso,
De cant, de crid, de rire, de quielet...
Vès! de la foulo mouvedisso
Mouato pariero cridadisso
Ei jour de fiero!... Es vist que seren pas soulet.

Nous vaqui bèn dins l'esclargiero
Que cercavian: espetacle poulit!
S'entre-durbènt, l'aubriho autiero
Centuro uno verdo pradiero
Margaiado de flour: l'a 'n pople enfestouli...

Prochi la sourso que trespiro
En un cantoun, lei gènt soun asseta:
Qu canto, qu ris, qu souspiro;
Sus l'erbeto un douerme, un s'estiro;
Lei biasso soun duberto e cadun l'a pita

- Hoi! que de mounde! Titin crido.
- Pòu! li fa 'n vièi, faudra veni deman,
- Pichot! Dins la prado flourido,
- Caucant blavet e margarido,
Vuei, segur, l'a 'n jouvènt que soun vèire es charmant;

Mai deman, s'ournant de floureto,
Quant seran mai leis eissame jouious!
Deja vuei, a plen de carreto,
De nouesto jouvèncò alegreto
Avèn adu la mouestro en mourroun radious;

- Mai deman, lou jour de la fèsto,
Lei granjo auran pèr lei carrejadou
Pas proun de pluço, malo-pèsto!
Veirés de tèsto emé ile tèsto
Que n'auren l'aigo ei bouco, ai! lei regardadou;

Puei quand faudra cerca la sousto
Pèr fouleja, rire, reprendre alen
E gaiamen roumpre la crousto,
Coumo au dilun de Pandecousto,
L'aura de pople eicito au prat deis Aurulen,

Autour de nautre, en fènt lou brando,
S'èro acampa quàuquei gai fouletoun:
— Hoi! paire Janet, lèu demandò
La plus ardido de la bando,
Es eicito aquéu prat que dien tant galantoun?

Lou vièi respouende: — O, poulideto;
Troyes bessai que soun renoum es faus:
Un relarg d'erbo e de floureto
Que de-longo baiso l'aureto
Entre-mitan dei tueis, deis agast e dei fau?

— Oh! fa la roujo pichounello,
Es bèn poulit e poulit es soun noum,
Mai d'ouente vèn?... A l'anjounello
Que sa petito es clarinello
Coumo un carboucle, ensin lou vièi respouende:— Ah! Noun,

Gaire de nautre an poussu vèire
Leis estrambord que faudrié vous counta;
Alor pioussamen lei crèire
Que nous venien de nouéstei rèire
Eron pèr la jouinesso encaro respeta.

En aquelo epoco cresènto,
Pèr Pandecousto Auruou trefoulissié
E l'endeman, l'aubo neissènto
Quand, sus lei cimo frenissènto,
Emé sei rai de fue, plan-plan s'espandissié,

A brand sounavon lei campano;
Soun gai councert, balalin! balalan!
Jusquo à la mèuio vous trepano
E la jouinesso que tresano
Es lèu pèr ouerto... Ensèn l'a d'ome dei péu blanc,

De vièi qu'à soun amo ravoio
L'antico fe redouno pèr un jour
Un pau de jouinesso e de voio;
L'a de vièio fresco e galoio
Que d'encian souveni reviédou soun ardour;

L'a, leis uei gounfle, uno marmaio
Que piéuto e ris coumo un nis de quinsoun;
L'a de gènt de tout iàgi... e gaio,
La voues dei campano esparpaio
Dins l'èr fres dóu matin sa brusènto cansoun...

Lei penitènt dins sa capello
A miejo-nue si soun mes à canta
Vèspro, matino e la sequèlo,
Mai quand Magalouno la bello
S'amouesso au fiermamen, lou cant s'es arresta.

La foulo es aqui barbelanto;
Emé sa crous vènon lei penitènt,
Dins sei grand capo blanquejanto;
A la primo lus clarejanto,
Vènon, fifre jugant e tambourin batènt,

Dóu courtège prene la tèsto...
La proucessien si formo, à bódre un pau:
Lei jouine que fan uno tèsto
Cambejon davans à la lèsto,
E lei vièi que d'un vot gardon lou rituaou

Tènon la fin emé lei prèire...
Lou tour de vilo es fa, puei, dins lou champ,
Entre lei pendis prou7n~etèire
Que frucho e blad li, fan bèu vèire,
La proucessien camino, alerto, en saumejant...

De Nouesto-Damo la capello
Que tout l'an douerme à l'orle dóu camin
S'es revibado bloundinello,
Engarlandado e riserello
Emé soun porge à brand e sei lume argentin.

La proucessien aqui s'arrèsto:
Sièis penitènt si meton pèd descaus
E lèu de la Vièrgi celèsto
Gargon sus seis espalo lèsto
Lou cors-sant venera... L'a 'nsin proun de repaus;

Un cant meloudious s'aubouro
E restountisse: Ave, maris stella!
Acò 's superbe en aquelo ouro
E mai d'un vièi tresano e plouro
De la douço emoucien, de l'estrambord que l'a!...

N'en pouédi parla, iéu que l'èri
Tóutei leis an dins moun urous jouvènt;
E de fes, mau-grat l'iàgi lèri,
L'avian tambèn, lou treboulèri...
L'a bèn quàuquei cènts an, m'es esla di souvènt,

Que pèr merita l'acabado
D'un flèu terrible, Auruou faguè lou vot
D'ana coumo acò chasco annado
Emé la Vièrgi courounado
Au boues madalenen... Respectous o devot,

Tres siècle, Auraou dei rèire sàgi
Tenguè lou pache, e vuei... diguen pas mai!...
De Nouesto-Damo-de-bouen-viàgi
Reparte dounc lou roumavàgi
E dins lei camin touert e dins lei flour de Mai.

Hòu! leis aubespín dei baragno
Plen de parfum vous fouiton à tout coup
E soun balans lougié vous baigno
Dei perlo fino de l'eigagno
Dóu tèms que sei fuioun s'escampon pèr lou sòu...

E lei gènt van cacalejaire
E cantadis: lou camin passo plen;
Leis enfant sauton de tout caire,
Mai de vièi, prudènt caminaire,
An en bouco un brout verd pèr li pausa l'alèn.

Es que la marchó si fa rudo
En escalant Vèdo, leis Infernet,
La Vau-d'Aurengo roucassudo,
De-long dei gandolo moussudo
Que l'aigo li davalo em' un brut clarinet

Si fa rudo, la marchó, e lènto
Dins lei grimpet, dins lei camin peirous,
Mai la fe, la fe trelusènto
Empuro la foulo valènto
E mounto, lou cors-sant, sus de bras vigourous;

Avans d'èstre las, lei pourtaire,
D'autre deja lei ramplacon, e, dau!
Dins lei blound genestié que l'aire
N'en brèssò l'encèns embaumaire,
La proucessien escalo, escalo eilamoundaut.

La visto alor un pau s'alargo
E lou blad nouso en carrat verdejant;
Uno mato d'èurre encro e largo
Marco la sourso de Roussargo,
Mai encuei fau fugi soun repaus engajant;

Lou soulèu mounto e s'enviourno
De resplendour; la foulo dins soun vanc
Pa 'n moumen de pauso si douno:
Adiéu, Roussargo! adiéu, Coutrouno!
Adiéu, Sant-jaume! Au boues, zóu! s'aribo: en avans!

E lou vièi, de sa man frounsido,
Acò disènt, caresso lou front lis
De l'enfant qu'escouto, ravidò;
E nautre aussi, dei causo auvido
L'interès nous suspènde à soun bèu paraulis.

— E veici dounc que lèu s'aribo,
Repren lou vièi, au rode mounte sian:
De l'Uvèuno seguènt lei ribo
O dóu Peiruei leis àutei pibo,
Nans e Sant-Zacarié de brusènt musician

An manda 'ici 'no moulounado;
Sant-Meissemin e Brignolo e Rougié
E Tourve, pèr lei valounado
De pin e d'éuse encabanado,
De boueno ouro an manda de jouious messagié;

Entre lei broussò dei flour roso
Roco-Broussano a fa veni lei siéu;
Mèuno, que lou Gapèu n'aroso
Lei baisso ounte lou lausié-roso
Escounde dins un nis l'abadié de Mount-Riéu,

Signo, que la bello Clareto
En soun castèu li tenguè court d'amour,
E lou Bausset qu'un pau moureto
Sei fiho soun proun alegreto
E Cujo que tout l'an a sei tapeno en flour,

E lei lue que l'Uvèuno bagno
Sei vèrdei prado e sei pendis fruchau,
An manda soun jouvènt; Aubagno,
S'a pas fa 'n tóutei la coumpagno,
Es qu'aquéu jour fa fèsto en ajust dimenchau.

L'a dounc uno foulo noumbrouso
Que, gaio. espèro eici la proucessien:
Prochi la sourso fresqueirouso
Lèu li fan plaço, pauso urouso,
Mai courto, e pèr la messo e la benedicien,

A travès de boues, vers la baumo,
Pren lou mounta tout aquéu mounde ensèn...
Doues ouro après, quand sus lei Caumo
Toumbo un soulèu que vous empaumo,
En pleno joio eici revènon mai lei gènt,

E tout lou jour vous fan riboto,
Car Auruou pago e lou buou e lou pan;
Oh! pèr lei soucit, adiéu, boto!
Vous an carga miejo-lignoto,
Paure! d'ùnei que l'a, quand lou vèspre s'envan..

Lou paire Jan un pau s'arrèsto,
Puei à Titin, li frustant lou mentoun:
— Mignot! li dis, deman es fèsto:
Revène eici; veiras de tèsto
Que seran dei poulido e de gai fouletoun,

Car faudra bèn cerca la sousto
Pèr fouleja, rire, reprendre alen
E gaiamen roumpre la crousto:
Coumo au dilun de Pandecousto
Deman l'aura de pople au, prat deis Aurulen.

CANT VII

Lou boues

Aguste en trin d'alesti la bouiaco. - La cauco e leis ajudarello. - Lei frago de Jano à la vineigreto. - Lou coutelet dóu pastrihoun. - La cadeneto. - Lou clouchié de boues e sei quatre bas-relèu: la cuïdo dei cerèio; la meïssoun; lei vendùmi; leis óulivado. - La majestouso fourèst. - Lou rèi Louis XIII li canto: Janeto. - Lou canapè. - A la fèsto de Diéu. - Lei coumpagnoun dóu tour de Franço. - La roco fendudo. - La fouent de Nans. - Escalen mai!

Ai! fau quita parié regàli!
Adiéu, jouïnesso!... Es lèu plus qu'un vounvoun,
Soun estrambord, souto lou pàli
Dóu boues ombrous, e lou gregàli
Qu'aleno plan l'embéu dins sa gaïo cansoun;

E nouesto draïo viro e viro
Dins lou perfum dei flour que caucigàn...
— Tè! de frago!... E Titin s'estiro
Pèr n'en cueïe, e, tristoun, souspiro
D'ensaunousi sei det ei cade, en trafegant...

Mai lou leïssan à sa cuïdo;
L'es pas soulet: d'entre lei bousquetoun
Nous vèn, perlejant, à l'ausido
Lou rire clar d'amourousido
Qu'acamon tout-d'un-tèms de frago e de poutoun...

Em' acò 'no alegro chinaïo
Nous fa d'acuei: sei saut e soun japa
Nous ensignon la boueno draïo
E lèu un ressouen de sounaïo
E de fouit nous a di qu'anan èstre acampa.

Souto lou vièi chaine assoustaïre,
Inalassable, Aguste aro fa fue
Au cuou d'uno oulo un pau de caïre
Sus lei tres pèïro e l'a dins l'aire
Lei vapour d'un civié qu'à pouein semblarié cue.

Lou cousinié tasto sa sausso,
Sus sei taloun en dous double asseta;
Es fin lipet: pebro e mai sausso;
Puei, en nous viant, lentamen s'ausso,
Tout risoulet, barrant seis uei gris à mita.

— Fiche! sènte bouen ta bouiaco!
— Eh! eh! si pòu! veirés acò! nous dis;
Bèn adoubado uno macaco
Veirés coumo ei rougnoun s'estaco!
E de tóutei sei dènt, en rebecant, nous ris.

- E nouéstei gènt, lei fouletouno,
Courron bourrido e t'an leissa soulet?
—Eto! leis auses pas? M'estouno!
Sus l'iero, eila, Roso e M'estouno,
Emé de crid d'aucèu, vous fan lou viroulet...

Vé, qu'à-n-un muou Roso s'embrounco!
—Hòu! lou pougau! lou mèstre de l'eiròu
Li crido, e la bèsti que brounco,
D'un còup de fouit adrè que rounco,
Eu la redrèisso lèu que resquibe pas tròup.

Au mitan de la paio trisso
Qu'en roussejant moutouno à soun entour
Coumo l'oundado fugidisso
Davans la proue que l'enmaliço,
Lou mèstre, em'uno fermo e prudènto vigour,

De sei tres couble tèn lei guido
En sa man rudo e sus tout l'eiròu blound
Proumeno sei bèsti e lei guido
A travès la blesto crussido,
Chanjant souvènt de plaço, éu, lou cèntré dóu round.

Au tesa de sei tournadouiro,
Souto un desbord escumous de susour
Que de seis esquino regouiro,
Avuglado dei tapadouiro,
Aurihouso, lei bèsti, ensin que dins l'encroure

D'uno nue d'ivèr sènso estello,
Van d'un pas gai, mai pamens pau segur;
La voues dóu mèstre que rampello
E la sounaio clarinello
Que brando lou courdié lei menon dins l'escur.

Davans élei, lasso que lasso,
Van de-countùni: — I! ho! Falet!... Cli!... Cla!..
Dins l'aire en fue peto la chasso;
Quand la pouso, la calourasso,
Lou lassùgi an rendu lou bestiàri un pau fla,

Lou còup de fouit que subran peto
Lèu li reviéudo un regiscle d'ardour;
E chaurihant e boulegueto
D'uno abrivado lougeireto
Lei bràvei bèsti fan en courrènt quàuquei tour,

Puei mai s'amainon... Leis aresto
Dei dur sabot resquihous e lusènt
Trisson, chaplon la fino blesto
Que coumo un tra de l'aubaresto
Tout à l'entour dei muou espousco en crussissènt

E l'espigo que s'enfroumino
Laisso escampa lou bèu gran precious;
De jouvènto qu'an boueno mino
Souto un foulard de mousselino
Qu'ourleto de péu fin un coutet nervïous

E lei varlet de caro bruno
Viron l'eiròu 'mé sei fourco de boues;
E la paio en l'èr revouluno
E lou blad d'or que si desgruno
Toumbo emé lou pastras... Dóu gèste e de la voues,

Lou mèstre règlo tout e guido
Gènt e bestiàri à soun coumandamen...
Dounc nouéstei coumpagno ajuguido
Eron vengudo, à la seguido,
Vèire cauca: d'abord tenien rèn que d'à ment;

Puei voulountouso e jugarello
Prenien la fourco e l'escoubo de mi;
Mai lèu, pàureis ajudarello,
Lei plus jouineto, riserello,
En si fènt lei coutigo, — Ai! Roso, laissez-mi!

Dins la paio fresco s'ajoucon:
Emé de rire, emé de viéu quielet,
Puei si tirasson e si remoucon,
Puei si redrèisson, puei s'aboucon;
Zóu! de cascadeleto! e zóu! de viroulet!

Zóu! lou brando!... La paio bloundo
S'es pendoulado à sei péu fouletin:
Sèmblo un flot rous que leis inoundo
Coumo Vènus sourtènt de l'oundo
Quouro la cenchon d'or lei rai pur dóu matin.

— Hòu! lou pougau! repren loù mèstre;
Aviso-ti de faire endaumaja
Ta pelugno! Gardo toun dèstre,
S'entiero e poulido voues èstre!
Es que Falet, lou boustre, a jamai trepeja

Garbo tant bello e tant... granado!...
Roso s'aubouro e la migrano en flour
Es pas mai roujo; es, sa senado,
Gounflo d'esmai, desalenado,
E soun rire em' un pau si tremudarié 'n plour.

— E puei, li fau, es resounable,
Sènso abitudo e tèsto nuso ensin,
De si leissa rousti lou rable
Pèr lou soulèu... — Es inmanable
Qu'an deja dins lei mouelo un de sei rai malin

Pèr qu'au-jour-d'uei siegon tant fouelo,
Nouéstei pichouno! ensin Claro dis lèu;
Mai dins uno brassado mouelo
Martò li fa: — De nouéstei mouelo,
Em' un pau d'aigo, vai, tiraras lou soulèu!

— Eto, iéu fau, n'a proun d'un vèire
Dins un toupin emé tres grum de sau!
- Coumo! Auriés pas l'èr de va crèire?
Claro mi coupo; mai, risèire,
Aguste qu'es vengu: — Que! chanjen de missau!

Se mi cresias, dis, lei tendrino,
Vendrias à l'oumbro; acò 's proun travaia
E ma fricasso si rabino!
E lou mèstre que tèn sei mino:
— Puei vous espèri, ajusto, après pèr espaia!

Au pèd dóu vièi chaine qu'oumbrejo,
Contro la fouent que canto en soun pesquié,
Cadun s'assèto à soun envejo
Sus lou germe e vous brigoulejo
Que l'ome dóu fournèu, ravi, senoun inquiet,

Si demando de sa fricasso
Se n'aura proun: acò 's tant sabourous!
Fa pas d'alongui: esquicho, empasso!
E quand nouéstei maisso soun lasso,
Lou cousinié regardo em' un sourrire urous

Nouéstei rouito que soun lusènto:
O Sant Crebàssi, ensèn de nautre e d'èu
As lei gràci recounouissènto!
Càspi! la narro fernissènto
Niflo que lou dessèr sera goustous peréu!

— Si soun pèr nautre amadurado
Aquéstei frago! Esquist es soun parfum
E sa coulour quàsi daurado!
— Nous leis a-ti pas vineigrado,
Aquéu moustras d'Aguste? Oh! m'a fa prene un fum!

Nàutrei qu'avèn boula l'eigagno
Pèr lei cuï! Sera 'n poulit manja!
Bello, agues pas tant de magagno!
Aguste dis; pauso ta lagno:
D'aprèst tant melicous n'as pas ges vist deja!

Souto l'eigrour que l'entameno
La frucho sanno e soun jus cremesin
Autant viéu que lou sang dei veno
Emé lou sucre que s'abeno
Formo vite un neitar; lei rèi n'an pas d'ensin.

Escouto: à l'oumbro fresqueirouso
Quand de-matin, dins la vasto fourèst,
Cercaves la plaço óudourouso
Que li pouso plus aboundouso
La fragueto dei boues, ti fasien-ti d'arrèst

Dins lou plesi de la cuïdo
L'aspre arroumias o lou cade pognènt?
Oh! pas mai que la man arclido
Cenchant ta taïo alangourido
O que sus toun coutet doues labro si jounènt!

— Ço qu'aquéu gusas mi va dire!
— Escouto: ensin que pèr lou mau d'amour
L'a proun dóu contro pèr qu'empire,
Lou vinaigre, acò 's pas pèr rire,
De la frago goustouso eisalto la sabour.

— Es Jano d'aquélei perleto
Que nous a fa cuièto dins lou boues?
— Eto! — Oh! mai l'èri pas souleto!
— Qu ti demando acò, pouleto?
Tóutei va sabèn proun, va de-vinan, se voues!

Pau sourrisié; la pauro Jano,
Elo, èro roujo autant qu'un tulipan.
Sa maire alor: — Marrido grano!
Nous fa subran; un sant si dano
De vous ausi! Iéu, que, la seguiéu pan pèr pan!

— Quaucun t'aurié di lou countràri?
Sabèn segur que pèr li teni pèd,
A ta calandro e soun canàri,
As fa d'esfors pas ourdinàri:
Siés lou mouele dei maire e ti pourtan respèt.

- Digo, aquelo grosso, es iéu, Pèire,
Que l'ai cuïdo!... — Alor l'ères tambèn,
Martouno? Eh! bèn, seriéu pèr crèire
Que leis amoureux pèr li vèire
Mancavon pas de lume! — Ah! barro, pas-de-sèn!

En galejant d'aquelo souerto
Lou rejouchoun pauc-à-pau prenié fin...
Entandóumens, dessus sa pouerto,
Cavant uno racino touerto,
Lou fiéu dóu meinagié fasié 'n travai dei fin.

Emé soun coutelet de pastre,
Fasié plan-plan de tai e de retai
Dins un souquilloun d'óulivastre
E d'entre sei det óupignastre
Ero, ço que sourtié, l'oubreto d'un pantai.

L'amour, de sa divino flamo,
Tant lou jouvènt semblavo afeciouna,
De-secur li fuitavo l'amo
E guidavo l'adreacho lamo
Dins soun travai patet, menu, atenciouna.

E la lamo escrincelarello
Sabèsdóu boues ço que fasié sourtié?
Uno doublo tiero d'anello
Liso, linjo, tóutei pu bello,
E mouvedisso en plen; plus souple serié-ti,

Vous pensavias, s'un fabre abile
En m,etau fin avié tout façouna?
E dins un couer qu'es difficile
De trouva dessin plus sutile
Lei doues tiero d'anèu venien s'embessouna;

Puei la cadeno countuniavo...
E lou coutèudóu jouine pastrihoun
Dins sa man lóugeireto e siavo
Em' un gàubi rare taiavo
D'àutreis anello... Aqui li venguerian en round:

— Mai sabes que siés un artisto
E qu'es famous lou saupre-faire qu'as?
— Uno escrinceladuro esquisto
Coumo aquesto l'ai jamai visto
E dins uno racino! — E coumo acò, que fas?

- Va vias, fau uno cadeneto
Qu'acabaraì pèr un crouchet menin.
- Foume! e pèr uno jouveineto
Sera, ta liéurèio fineto?
— Farié pèr mei cisèu! li venguè Roso ensin.

Oh! nàni! de sa voues candido
Faguè lou jouve. — As de front, Roso, tè!
Es pèr sa mestresso poulido.
— Oh! nàni! de sa voues temido
Faguè mai lou jouvènt, mai soun front s'enrouitè.

— Aquéu nàni! vèn de la tèsto
E noun dóu couer: si vèi dins toun uei viéu.
L'amigo que li voues fa fèsto,
La renègues?... Mai éu, l'a lèsto:
- Sant Pèire, pèr tres fes, reneguè bèn soun Diéu!

Brave, pichot! Toun amourouso
Pòu si flata de ta coumparesoun!
Mai, digo: ta man arderouso
Ounte a pres soun adrèssou urouso?
— Ounte lou roussignòu aprenguè sei cansoun:

Meiour mèstre que la naturo
Si trovo-ti? Dins l'estiéu, dins l'ivèr,
Au se vo bèn ei bagnaduro,
Dins lou campèstre o la verduro,
Quand gàrdi lei móutoun, escóuti lei councert

De l'armouniouso auceliho
Vo bèn alùqui emé grando afecien
Lei bèuta que davans mei ciho
La terro de-longo escampiho,
Mai sias sadoule puei de souen e de vesien:

Alor moun coutelet retipo
Dins un coulas ço qu'ai souto leis uei,
Uno bestiolo, uno tulipo,
Moun chin, un pastre abrant sa pipo,
E coumo acò moun gàubi es neissu de l'enuei...

Mai lou paire es deja sus l'iero:
— Hòu, pichot! crido, es tèms de fa vira!
E dins uno curso lógiero
L'enfant parte. La meinagiero,
Qu'èro à l'escouto, vèn, fièro, de s'auboura:

— Tenès, nous dis, se voulès vèire
Lou bèu clouchié que fuguè lou pichoun!
E douçamen presènto à Pèire,
Coumo un relicle souto vèire,
Un superbe travai de goust e de façoun.

Es uno torre loungarudo
Que pren soun pèd sus quatre bas-relèu.
Dins l'un, bourda de flour menudo,
Vias uno terro ribassudo
Emé sei cereisié qu'escaisson, tant soun bèu

De sa recordo trelusènto:
De gènt noumbrous sus leis aubre quiha
Cueion la frucho redoulènto
E dins un caire uno jouvènto
Cercò dins soun senet un brout qu'a resquiha

Dins l'autre, entre de l'onguei tiero
D'aubre fruchau, un grand plan de blad rous
Oundejo à l'auro matiniero
E lou soulèu que sa lumiero
Saludo tout-bèu-just lei baus escalabrous

Trovo à l'obro lei travaiaire;
Oulame e dai toumbon lei blad madur:
Lei meissounié, fièr rusticaire,
Coupon, coupon, mai parlon gaire,
E lei liandro, jitant soun rire dins l'azur,

Acampon la sauro gavello,
La nouson, zóu! souto un còup de ginous,
E vague eila! De campanello
Un jouve à-n-uno jouvencello
Semounde un bouquetoun em' uno roso au nous.

Sus l'autre paramen, l'artisto
Nous represènto un riche vignarés:
De poumié de la frucho esquisto
A l'ourizoun barron la visto
E s'alongon, lei vigno, eilalin dins lou gres;

Touto uno troupo atravalido
Ris, cacalejo au mitan deis autin
E quand lei gouerbo soun clafido
De grapo d'or ensaunousido,
Ei cournudo s'adue lou precious rasin;

Ensin a vuja soun eisino
Aquelò bloundo: ai! subran un jouvènt,
Quichant dins sa man sóuvagino
Uno dei grapo cremesino,
A l'après l'a parti, parti coumo lou vènt:

A lèu arrapa la crentouso;
Sus soun mourroun ardènt e risoulet
L'a freta la grapo saunouso,
Puei baiso la plaço moustouso;
Elo, dirias aqui, dirias: pouso un quielet!

Enfin sus la darriero fâci,
Garlaban fièr, un pau segnoureiant,
Ausso soun front nus dins l'espàci,
Soun front que dóu mistrau, Diéu-gràci!
Aparo lou campèstre enclin au souleiant;

La naturo sèmblo endourmido;
L'an despuiado, ai! las, lei proumié fre;
Mai dins leis óulivié la vido
Es gaio enca pèr la culido
De l'ouливо boudenflo; ensin que sus l'aubret

Si pauso, au matin, l'auceliho,
Dins lou brancàgi e sus l'escalassoun
A mounta l'eissame dei fiho;
Tout acò travaio e babiho,
Si boufant sus lei det pèr gara la couisoun;

Elei, fan lei baisso, lei maire;
Sus lei flourié, monte li plou, la grand
Rabaio à canestèu; pèr caire,
Au sou que cavo soun araire,
Un peisan tardiéu fiso encaro quàuquei gran.

Dins touto l'escrinceladuro
Lei gènt soun viéu: dirias que van parla!
Lei bèu presènt de la naturo
Meton la gau sus lei figuro
E pouedon, lei campano, alègre trignoula.

Es ço que sèmbelon faire, certo!
La torre mounto: entre de tourrihoun
Lei quatre ausido soun duberto,
E viradisso, e coumo alerto,
Lei campano de boues souenon lou carrihoun.

— Eh! bèn, à la maire galoio
Fèlis venguè, qu sounjarié pamens
Qu'un pastre a fa talo beloio?
Poudès vous flata, sènso croio,
D'agué 'n fiéu que soun biais merito coumplimen!

— E soun aguio dentelado
Que finamen courouno lou clouchié!
— Sus lei campano, escrincelado,
De la Prouvèncò bèn-astrado,
D'Ais, Marsiho e Touloun, tè! ve, leis armarié!

— Tè! ve, lei gargouio lengudo!...
Mai uno voues nous coupo aqui subran,
La voues dóu mèstre: — Que! lei mudo!
Sias lèsto à faire la batudo?
Es l'ouro d'espaia, sabès: vous esperan!

Coumo un vouele de cardarino
Que tout-d'un-còup de drole an aqueira
Dins un bouissounas d'aubespino,
Coumo s'envouelon de galino
Quand lou chin lei coursejo au mitan dei gara,

Nouéstei jouino à la voues dóu mèstre
Prenon lou vanc, em'un long cridadis,
A travès de l'ardènt campèstre,
E, zóu! travaion à grand dèstre,
Mai s'amaino puei lèu soun gai boulegadis.

Leis entèsto ta calourasso,
O soulèu d'or! Pouso, tu! pouso, iéu!
Sus lou cavau fres toumbon lasso
E tant es douço la radasso
Que si li fan un nis ounte bravon l'estiéu.

Mai s'uno d'élei penequejo
Dins sa bressolo, ai! de-garapachoun
Sus sa bouco que risoulejo
Uno outro lèu sènte l'envejo
Em' un brout d'espigau de li faire manjoun

O lou gai jouvènt que travaio
Emé la palo o l'escoubo de mi
Sus sa tèsto vite l'estraio
Uno brassadeto de paio:
— Ato! sias dounc vengudo à l'iero pèr dourmi?...

—E s'à la Baumo, plan-planeto,
Escalavian? Aguste a prepausa;
Mai Roso ni meme Janeto
Respouendon rèn; lei jouveineto
Soun pas curiouso vuei: aimon miés si pausa...

— A la Baumo, emé ço que toumbo!
Claro dis puei; mi li veirés pas, iéu!
L'a dins l'èr un fue que vous ploumbo!
Se l'afrontavo, uno paloumbo
Vous toumbarié roustido, e proun bèn eici siéu!

— Vuei l'a pas degun à la Baumo,
Ajusto uno autro, entremen que deman...
Mai sus lou coup Aguste empaumo
Soun bastoun e, coumo uno paumo
Souple e reboundissènt, saludant de la man,

Vers lou boues souloumbrous s'adraio;
Sei brut de pas d'un repaus aflaqui
An destressouna la chinaio
E fan s'enfugi la poulaio:
Poudèn, Pèire emé iéu, tout-bèu-just lou segui...

O séuvo fresco e majestouso,
Emé delici intran dins toun oumbrun;
D'uno baselico ufanouso
Coumo quand la foulo piouso
Intro souto lou porge, avèn, nautre, cadun

Un tressalimen dins nouesto amo;
Souto toun domo estela de lusour
La misteriouso calamo,
Coumo en intrant à Nouesto-Damo
Pèr un matin de Mai, quand pounchejo lou jour,

Nous pren, nous esmòu, nous trepano;
E teis aubras, que de toun tèmple astra
Soun lei coulouno soubeirano
E n'es la grand nau soun andano,
En noueste èime fan nèisse un ravimen sacra.

Eici, pèr gràci miraclouso,
Pren, la naturo, un autre vestimen
Coumo se deis Aup auturouso
L'avien, de fado generouso,
Adu soun mantèu verd qu'es un encantamen.

Lou faiard loungaru vesino,
Fin-qu'à la vouto, emé l'óume gigant,
Lou tueis dei perlo cremesino
Que flocon sa dentello fino,
E la verno lusènto e l'agast elegant;

E dins lei prefoundour inmènso,
Tau de pilastre apielant l'arcounsèu,
Mouton, gounfle de vido intènso
Mau- grat lei siècle e seis óufènso,
Mouton fièr dins l'espàci, escalon vers lou cèu

Mèle embaumaire, aubo afielado,
E cèdre autié, e rouve majestous,
Abet de la ramo argentado
E tihòu dei flour perfumado,
Tout de pège superbe e noble e sanitous.

L'èurre, l'aubo-vit, la lambrusco,
Autour deis aubre en garlando nousa,
S'arrapant à l'aspre dei rusco,
S'enausson, puei dei mèndrei busco,
Pèr d'innoumbràblei fiéu estrechamen crouse,

Pendoulon sa ramo fougouso,
Lustre gigant que coumo d'encensié
De- longo à la vouto fuiouso
Si balançon, l'auro amistouso
Lei bressant lentamen de soun alen lóugié;

E l'auro de milo floureto
Raubo en passant lou respir embauma:
Ginèsto, agoulènço, jauneto,
Agradello, brouso, vióuleto,
De caduno à soun tour l'espàci es perfuma.

Tambèn, séuvo meravihouso
Ounte lou féuse e la moufodóu sòu
Fan la piado silenciouso,
Ta calamo misteriouso,
En intrant dins toun ombro, autant-lèu nous esmòu

E marchan d'abord en silènci,
E pantaian... Nouéstei pantai, que soun?
Ai! paure! L'estrango enfluènci!
Davans tant de munificènci
Aguste entouno pas uno vièio cansoun?

La bello Janetoun,

Deri-deroun!
Au boues de Madaleno,
Dereno! Dereno!
Cercó de buscaioun,
Deri-deroun!

N'a la faudado pleno,
Deri-Dereno!
N'a la faudado pleno
E n'a pancaro proun!
Deri-deroun!
Doun! Doun!

Davans un parié re foulèri,
Iéu emé Pèire avèn coumo un tressaut;
Nous sèmblo qu'un pïous mistèri
Es proufana, mai toujours lèri;
Aguste, zóu! repren sa roundo que plus aut:

La bello Janetoun
A rescountra 'no meno
De poulit parpaioun
Que fa sa boueno aubeno
Dei floureto en boutoun.

La Bello Janetoun
Alerto si proumeno
Seguènt lou fouletonn:
— Que fas, bello sereno?
Li crido un pastrihoun.

La bello Janetoun
Si n'en mete pa 'n peno:
— Cèrqui de buscaioun
Jusquo eici mi meno
Un poulit parpaioun

La Bello Janetoun
Escouto la voues leno
Dóu gracious pichoun

Que manèu entameno
Lei pu tëndri resoun.

La bello Janetoun
Un pau simplò e sereno
Toumbo lèu d'assetoun
E vite à bouco pleno
Si fan de dous poutoun.

La Bello Janetoun
Que l'amour desaleno
A puei lou couer tristoun:
Saup que troup mounte meno
Un poulit parpaïoun!

La bello Janetoun
Enfin si rassereno
Qu'à soun souple detoun
Meton vuei pèr cadeno
Dei nòvi l'aneloun.

Mai lèu remés de la souspresso,
Emé lou mato avian fa chòrus, tè!
E de la noto d'alegresso
La cadènci vite estènt presso
Marchavian d'un bouen pas, quand lou cant s'arrestè

E l'acaberian dins lou rire...
Mai quent esmai, quand Aguste sutiéu
Aqui l'entenderian mi dire:
— De Mount-Mourànci siés lou sire,
Pèire es Du d'Espèrnoun e lou Rèi Louis es iéu!

Pèr nouesto court, foume! à la paio
L'avèn leissado!... E lou panto risié.
Mai nous faguè mau sa risaio:
—Es qu'aurié 'no asclo à sa sounaio
Ai! ai! chascun de nautre en dintre si disié.

Eu devinè nouesto pensado:
— Sabès dounc pas, nous dis en guinchani l'uei,

Que de-longo, quand s'es pausado,
Renèisse l'istòri passado
E que s'es deja vist ço que vias au-jour-d'uei:?

- Tè! Rèi Louis, sus aquelo roco
Entrono-ti, li fa Pèire, e lèu-lèu
De tei mot desvèlo la toco.
Nautre, sus l'erbetò que toco,
Ti bevèn: de limbert que béurien lou soulèu!

—Es acò; prenès-vous un sèti,
E counvendrés, s'avès un pau de goust,
Que dóu rode mounte m'assèti
Au creudou fau dire plèti:
Un palais pèr brava leis encèndi d'Avoust!

Alucas la vasto coutolo
Qu'es adamount toucant lou fiermamen
E leis aubras qu'en girandolo
L'èurre emé la liano courriolo
Si li mouson lóugié coumo un fin ournamen.

Alucas puei la triplo tiero
Dei roucassas que la moufo a cubert;
Lou féuse e lei flour mountagniero
Que cercon l'oumbro e la fresquero
An jita de pertout soun large tapis verd;

Davans l'aubriho seculàri
L'amo autant-lèu es presso de respèt:
Vous sentès dins un santuàri!
— Tè! sian à l'archibanc, macàri!
Fa Pèire, e souple qu'es li dien lou canapè!

—Acò 's soun noum e n'en poues rire!
Mai sounjo un pau: pèr la fèsto de Diéu,
Quand jusquo adaut brulon lei cire
E que tout un pople en delire
Canto en clinant lou front e que sus lei roumiéu,

Entre leis encensié, lou prèire
Soulennamen ausso lou sant-soulèu
E fa lou signe benissèire,

Ah! digo-mi s'as poussu vèire
Dins tèmple plus grandas plus sublime tablèu!

Emé lou piés flouca de ganso
E lou bastoun engarlanda de flour
E de riban dei tres nuanço,
Quand venien, dins soun tour de Franço,
Lei valènt coupagnoun, prene eici sei coulour,

Quand li venien, à moulounado,
D'an que l'avié, teni soun grand counsèu
E que, sesiho debanado,
Aussant sei cano enribanado
Cantavon soun salut, cresès pas qu'èro bèu?

E lei felibre de Prouvènço
Se li venien, emé sei tambourin;
Mena de fes rejouïssènço,
De quento pouësio intènso
Serien-ti pas empli soun èime e sei refrin!

- Lou sejour certo es encantaire!
Iéu li faguèri... — Aqui vouéli veni!
L'autre recoupo: lou creaire,
Samenant lou bèu de tout caire,
Eici fuguè proudigue, as de n'en counveni.

Aro si conto de la sorto:
Lou rèi Louis trege, un còup qu'èro vengu,
Si trouvant luen de soun escorto,
Emé sei dous ami pèr orto,
Davans talo esplendour siguè tant esmougu

Qu'anavo en revant plan-planeto
E tout-d'un-tèms, emé sei famihié,
Entounè: Janeto! Janeto!
Avèn représ sa cansouneto
E fasian tout-escas ço qu'un grand rèi fasié?

— Basto! nous voudriés faire encrèire
Qu'un rèi de Franço eicito a vanega?
— E mai que d'un n'an vist lei rèire;

E de rèino e de prince, Pèire,
E de papo tambèn li soun vengu prega:

Escrì dins lou maubre, à la Croto,
Veiras sei noum... Mai, zóu! musen pas mai!..
Coumo dins l'aire pur quand floto
Un fin parfum de bergamoto,
S'èro leissado ana, moun amo, au dous esmai

Dei flàmei vesien evocado,
Quouro aquéu zóu! li faguè 'n viéu ressaut
S'aubouro amount l'auto roucado
Que la baumo l'es entraucado;
Serié tèms, es vrai, de li douna l'assaut..

Es amoundaut que, fourmidable,
Ausso lou front lou baus madalenen,
Bàrri gigant, bàrri imbrandable,
Que dins soun flanc invulnerable
Gardo la baumo santo; es amoundaut: anen!

De la mountado escalabrouso
Un vaste ro qu'en dous es refendu
Marco lou pèd: roco famouso!
Si dis qu'à l'ouro souloumbrouso
Que Jèsus sus la crous, mourènt, èro estendu,

Lou diable eici fasié pausetto,
Richounejant d'agué mai triounfa.
Or sabèn que nouesto planeto
Loungamen siguè tremouletto
A l'istant bèn precis que lou Crist aguè fa:

Satanas mau-grat soun audàci
De l'espavènt sus lou còup ressauté,
Virant de ràbi vers l'espàci
L'orro grimasso de sa fàci,
E souto éu, en dous blot, la roucasso petè.

Dounc la mountado escalabrouso
Parte d'aqui: nouéstei bastoun ferra
Mouerdon la pèiro resquihouso

E d'uno butado arderouso
Mountan, oh! lentamen e noun sènso esparra.

L'esfors un pau nous desaleno,
Mai la naturo, em'un souin benesi,
En aquéu rod,e que li meno
Touto draio, ges sènso peno,
A vougu dei passant prepara lou plesi

E dins lou relarg amirable
Ounte de Nans rescountran lou camin
E qu'un grimpet dei redoutable
Mounto au Sant-Pieloun venerable,
Elo a plaça 'no fouent dóu murmur cristalin.

Dins la vièio conco moufudo
Ivèr-estiéu rajo galouianmen
Uno aigo claro; espesso e drudo
L'erbo-de-bouen-fege es vengudo
Si l'abéura, parant leis abord richamen.

Lou cascaiun jouious de l'oundo
E sa frescour, e l'endré que fa gau,
E lei tèndrei souspir dei broundo
Mountant de la séuvo profundo,
Tout envito à la pauso e s'amaine la caud!...

Cadun si refresco la bouco
Emé prudènci, e lou front e lou pous;
Coupa d'un degout de la souco
Lou béure un pau fres vous embouco
E redouno de voio ei jarret vanelous.

Tiran dounc nouesto capelado
A l'ouradou que sa rouino à mita
Es aqui d'èurre encabanado
E sa nicho au sou derrunado,
E d'un pas mai ravoï reprenèn de mounta.

CANT VIII

La Madaleno

Un dur grimpet meno davans la baumo. - Superbe amiradou. - La croto escuro e frejasso. - Mai de trento an la Madaleno l'a viscu. En Palestino, la vido pamens l'avié tant sourris. - Sa bèuta; sa richesso; sa lussùri. - Sa counversien; soun repenti. - Sei doulour à la passien e à la mouert de Jèsus. - Emé lei meiours ami dóu Mèstre es liéurado à la fùri deis elemen. - Es jitado sus lou ribeirés prouvençau. - Emé soun fraire Lazàri, evangeliso Marsiho. - Vèn puei espia sei peccat dins aquesto baumo sevèro.

Contro la paret fourmidablo
Que nous tresploumbo, o Diéu, que sian nanet!
Davans la masso espaventablo
Aussant sei tèsto respetablo,
Leis aubras seculàri, oh! que soun pichounet!

Au front de l'autissimo peno
Lou souleias de seis ardènt belu
Coucho dins soun trau l'alabreno
E nautre d'en bas vian à peno,
Coumo dóu founs d'un pous, un estras dóu cèu blu;

E leis aubroun qu'an pres racino
Dins lei fendasclo e redènt dóu roucas,
S'abéurant que dei perlo fino
De l'eigagnolo diamantino,
Sèmblon qu'un pessu d'erbo au mitan d'un campas.

Mountan en clinant leis espalo
Coumo s'anavo à-n-un còup cabussa
La muraiasso couloussalo:
Uno frenisoun glacialo
Vous pren lei mèuio, ai! ai! rèn que de li pensa!

Lou caminet, que viróutejo,
Ei flanc dóu ro s'encastro en escalant;
Lou grimpet lentamen s'eigrejo
Retaia dins la pèiro frejo
Pèr lou biais prevenènt dei pïous mounges blanc.

Oh! fuguè 'n tèms que li trevavo,
En aquéu pas, que lou souple chamous,
Un tèms qu'en resoun deis entravo
E dei pendènt si l'asardavo
Soulamen lou ferun o lou dragoun famous,

Lou dragoun que, soun alenado
Empouisounant tout l'aire d'alentour,
En uno pesanlo voulado,
Coumo fan lei rato-penado,
Escalavo lou bàrri ounte avié soun sejour,

E quand venguè, la Madaleno,
Li recerca lou perdoun e l'óublit
Dins la soulitudo sereno,
Coumo aurié-ti vincu la peno,
S'avié pa 'gu, la pauro, un secours angeli?

Mai lou pèd dei foulo piauso
Despuei de siècle a que mai cade jour
Gausi la graso resquihouso:
De parabando audaciouso
Lou cisèu e la tiblo an garni sei countour,

SANTO-BAUMO

E la mountado, rudo certo,
Sènsò dangié vous meno plan-planet
Jusquo à la croto qu'es duberto,
Sioun intrado d'èurre cuberto,
Entre dous oustau nòu, sus un brave planet...

Ah! leissas-nous que l'on respire,
Que dins lou sang si pause la calour;
Leissus qu'un moumen l'on amire,
De qunte caire que si vire,
La séuvo à vouéstei pèd, lei mount dins la lunchour.

Oh! l'espèctacle pivelaire
Que devistan dóu flame badarèu!
- Digo! quant faudrié de segaire,

Demando Aguste galejaire,
Pèr sega 'quelo prado? Es dei bello, carèu!

— La troupelado fantastico
Dei ventouloun si l'apasturo, ve,
Tout l'an! Pèire vite replico.
Dóu Mistrau la daio magico
Soulo n'en sego puri quàuquei calous, ma fe!

D'efèt uno inmènso verduro
Oundejo en bas e fin-qu'aperalin:
Dei grands aubre es la vestiduro
Qu'espinchado de nouesto auturo
Sèmblo bèn un grand prat bourda de petelin.

— Tè, vejo, amount la Bugadiero,
L'autre repren, qu'estènde sei lançou!
E soun det mouestro lei neviero
Qu'au front lunchen deis Aup autiero
Blanquejon dins l'azur coumo uno tèlo au sòu.

Dóu Mount-Venturi l'auto cimo,
Darrié l'Oulimpe, e lou gigant Ventour
E lei Ceveno bellissimo
Aubourant sei tèsto sublino
Dentellon l'ourizoun d!e sa richo esplendour

E regardan lei meraviho
Que davans nautre en noueste ajoucadou
La naturo à bódre escampiho
E parpelejon nouéstei cihò
Denoumbrant lei trelus dóu vaste amiradou.

E l'on pantaio, e l'on s'enauro
Ei pensamen que nous parlon de Diéu:
Es pas d'asard que tout si dauro
E beluguejo à la lus.sauro
Dóu grand soulèu mouvènt que n'es lou recalieu;

Es pas d'asard que la nèu toumbo
Sus leis aut mount qu'enmantello de blanc
E que soun aigo dins lei coumbo

Vèn desasseda lei paloumbo
E puei l'erbo dei prat e puei lei làrgei plan;

Es pas d'asard que lou grand rouve
D'un simple agland a trachi majestous
E que, tout fragile estènt jouve,
Avans que lou vieiun l'agrouve,
Afrounto leis aurasso e lei siècle outrajous;

Es pas d'asard que l'arbouriho
Emé sei frucho e sei milanto flour
Greio d'uno infimo graniho;
Es pas d'asard que l'auceliho
Tiro d'un uou menin sei noto e sei coulour;

Es pas d'asard que la matèri
Tradue sa forço en ate pensatiéu
Dins lou fournet qu'es l'ome... Arlèri,
Esplicas tout d'un mot: mistèri!
Quand tout,pèr milo voues,vous murmurejo: Diéu!...

Un vounvoun de voues angelico
Nous fa subran revira: serié-ti
Lou ressouen dei suau cantico
Que lei couorto serafico
Dins l'azur tant de fes faguèron restounti?

Nouesto amo, en de raive bressado,
Serié 'qui pèr va crèire, e mete un tèms
Pèr descèndre, nouesto pensado,
Dei cimo mounte s'èro aussado,
Tant s'arrapo à noueste èime un soungé que nous tèn.

Mai la baumo a dubert sei pouerto
E dins l'escur clarejon soulamen
Quàuquei lume e lei voues plus fouerto,
Dins la prègo que recounfouerto,
Enauron vers lou cèu seis acord vierginen.

Es un eissame d'ourfanello
Qu'en roumavàgi au lue sant an mena:
E canton coumo d'anjounello,

Tristouno un pau e palinello
Dins sei raubo d'estame e 'mé sei péu trena.

Puei quand la pregaio es finido
Prenon soun vouele em'un fres cridadis...
— Ai! dins sa vido achavanido
Soun amo, pecaire! avanido
Vèi pas tóutei lei jour un troues dóu Paradis! -

S'envan lóugiero... Ensin, à l'aubo,
La compagnié de gai perdigalet
Vengudo au riéu, souto leis aubo,
D'un còup s'enfuge e si derraubo,
Se lou pas d'un cassaire a frusta 'n ramelet...

De la cafourno negrinello
Passan lou porge: uno lourdo frescour
Quàsi subran nous enmantello
E l'imprudènt, meme, trampello
Que de la mountesoun noun a pausa l'ardour.

Entremen que sus nouesto espalo
Lou fre subit toumbo e la fa plega,
Sus nautre sèmblo que davalò
La vouto basso e couloussalo,
E si courbo d'istint noueste cors fatiga.

Oh! coumo sias pau cavo, arlèri
Qu'avès lou front de vous crèire gigant!
Venès eici: dins lou mistèri
S'esvalissènt tout refoulèri,
Lèu founde vouesto croio en de sounges embrigant.

Regardas: richo de jouinesso,
Aguènt dóu cors tóutei lei resplendour,
Poudié si crèire uno divesso,
La Madaleno, e, segnouresso,
Pèr sei gràci tenié l'empèri de l'amour,

Quand proumto la santo belugo,
Flamo divino, en soun amo a giscla:
Sa supèrbi es uno barrugo:

La derrabo e, pauro messugo,
Vèn eici toumba flour coumo un brout qu'a nebla...

Ah! se levan pèr la pensado
L'autar de maubre e lei sèti de boues,
Lei frejo e blànquei balustrado
E lei lampeso escrinçelado,
Sian plus que dins un trau que nous douno l'ancoues;

E tu, n'aviés fa ta demouero
Mai de trento an, rèino de Magdala!
Ai! rudo vido que demouero
Noueste atupimen, tant es fouero
Deis aise d'un bèu cors jusquo alor cajoula!...

Tout un luen passat mi repasso
Davans leis uei: dins l'esprit pantaïant
Lei vesien ei vesien fan plaço,
Coumo, la nue, quand l'amo lasso
Toumbo d'un raive gai dins un raive esfraïant...

Oh! lou bèu païs que s'estènle
A moun regard! Souto un cèu linde e pur
Dei grand mount d'alentour descènde
E d'estanco en estanco pènde
Pèr veni lentamen beisa de flot d'azur:

Sus éu la naturo proudigo
A de tout caire escampa sei tresor:
En Jun deja gouton lei figo,
E lei panso, blóundeï boufigo,
Rebaton dóu soulèu lei pampaieto d'or.

Roubin, toupàsi, de la souco
Espilo un jus qu'es un neitar divin;
La flour d'arangié si remouco
E pèr vous embeïma la bouco,
A l'autoun, l'oulivié douno soun òli fin.

Lei planto lei mai redoulènto
De sei parfum emplisson l'èr sutiéu,
Flour que sei coulour resplendènto

E sei courolo ravissènto
Fan lou chale de l'uei, frucho qu'ivèr-estiéu

Dei fin palai fan lou delìci,
Douço ramiho, oumbràgi precious
Que soun à la pauso proupìci,
Quand, majestous fue d'artifici,
Toumbo lou recalieu dei dardai souleious.

E de tout coustat l'arbouriho
Dins soun fuiun es pleno de cansoun:
L'auro douçamen li bresiho
E li respouende, l'auceliho,
Au cascai dei valat courrènt dins lou gazoun.

Dóu sòu la richo vestiduro
Davalò ensin enjusquo au ribeirés:
Soun immaculado verduro
Vèn pouna dins leis aigo puro
Que pouerton, lou bressant, un souple barcarés;

Lei risènt que bagnon la ribo
Soun just poussa pèr un dous ventoulet;
Un rai de pèis lusènt qu'aribo
Sus leis oundo semo fa gibo
E si proufielo en or sus lou founs verdoulet.

Oh! mai, que fàgui uno remarco:
Meme à la mar vèn béure lou margai
E viéu s'encabana lei barco
Souto un long sause que s'enarco
E mau-grat l'èr salan verdejo fres e gai!

Es pas la Prouvènço divino,
Aquéu païs?... Nàni, mai tant vaudrié,
Si dis!... Sian dins la Palestino,
E la mar d'aqui si devino
Lou lau de Tiberias qu'es un pur beluguié.

Sus lou bord deis aigo pasiblo,
Dins de nisoun que lei dirias d'escrin,
Ounte en. aboundànci indiciblo

L'a toutei lei gràci poussiblo,
De vileto e de bourg menon soun urous trin.

Aqui l'a de richei famiho
Que fugissènt, l'estiéu, Jerusalèn,
A-n-Azarot, à Betulio,
A Madaloum, à Betanio,
Vènon, pèr quàuquei mes, li pèndre soun calèn.

D'autre, tout l'an, si laisson viéure,
Coumo de rèi, dins sei grand tenamen,
A la gràci dóu cèu, deliéure,
S'abandonnant coumo lou siéure
Au cours dóu flot que passo, e vivon largamen.

De gènt ensin l'a 'no oustalado
Qu'à Betanio, o bèn à Magdala
Sus l'autre bord, touto l'annado
Laisso courre à la davalado
L'aigo e lou tèms emai lei sòu, de còup que l'a.

Fau qu'eici resoun siegue messo:
Es pas que, tè! noun l'ague de gouvèr,
Car la fiho einado es mestresso
D'oustau, mai l'a 'qui 'no diablesso
Que farié foundre l'or emé sei pichouns èr

E sabon pas à sei caprici
Faire restanco: es pas lou cago-nis?
Puci la béurias dins un calici!
D'èstre un pau faroto es pa 'n vici!
Es la maire que, fèblo, en l'aparant, va dis

E Miríam a lèu pres d'alo.
Oh! grand malur! Anas puei redreissa
Lou plant que de travers escalo
E qu'en toursesduro inegalo
Un tèms a pouscu crèisse e si li ranfourça!

N'aurés plus lèu roumpu la fibro.
De Magdala laisson trachi l'enfant
En tout capriciouso e libro

E soun armeto lou mai vibro
Pèr tout co qu'es belùri: ai! mounto mau, lou plan!...

Vous a lèu fa 'n chaple lou matre,
Quand pòu, la nue, sousprendre un galinié:
Lou mau-sort sèmblo ensin s'abatre
Sus la famiho e rèston quatre
Lei quienze bèus enfant que la meisoun tenié;

Puei soun mouert lou paire e la maire.
Lou gai diabloun a tout just sei sèt an:
L'autourita de soun grand fraire,
Lazàri, la soucito gaire,
Pas mai que de Martoun l'apreissamen coustant

De li marca la boueno draio:
De tóutei dous es gastado, va saup;
Soun outro souer, Mioun, travaio
Toujour en silènci e s'esgaio
De sa faroutarié autant que de sei saut,

Sènso mai li metre de vici.
Mirïam dounc en gràci em' en bèuta
Crèisse encaro qu'es un delici,
Mai seis istint e sei caprici
Soufron sèmpre que mens d'èstre mau-countenta.

Certo, vouéli pas trouva 'scuso
Ei courrentiho, ei levènti de vuei,
Mai se la fiho fa la guso,
Se l'enfant bassamen s'amuso,
Es-ti pas que sei gènt an troup plega leis uei?

Mirïam s'es facho superbo,
Mai lou travai li gasto pas lei det:
Sa croio qu'avèn vist en erbo
Vuei la gounflo e la rènde acerbo
Pèr Martoun que sus elo a plus ges de poudé;

E quand lei bèn de la famiho,
Sus sa requèsto, enfin soun partaja
Entre soun fraire e lei tres fiho,

Elo lèu quito Betanìo
E dins un oustau siéu plus luen si va louja.

Ai! ai! pèr la tròup boueno Marto
Quento doulour e pèr Lazàri aussi!
Soun ànci cade jour s'enarto!
Sa belete d'élei s'escarto
E pren lei camin touert: oh! lou mourtau soucit!

Mioun, elo, à l'acoustumado
Prègo e dis rèn; la servènto Sara
Sus la mestresso bèn-:eimado
Gemisse; encaro mai pimado,
L'umblo e douço Marcello, elo, la seguira.

E vite es anado, Marcello,
A Madaloum ounte es lou bèu castèu
De Mirïam, mai, caspitello!
A sa servènto tròup fidèlo
Aquesto a fa 'n acuei qu'es gaire en diant crudèu.

Marcello à.sa jouino mestresso
Temidamen respouende pèr de plour,
Mai li mete tant de tendresso
Que lei paraulo d'amaresso
Dins Mirïam fan plaço à-n-un pau de doulour

E lei doues jouvènto s'embrasson:
Mirïam plouro; a puei pas lou couer dur;
Li sènte de fiéu que s'estrasson
E lei passien que la tracasson
L'estoufon mau, pèr coup, un glatimen escur...

Au païs de la Palestino,
Douge an n'a proun pèr madura 'no enfant:
Aquesto a de formo poupino
Em' un senet que si devino
Pèr lei bais amouros un nis dei plus charmant.

Uno richo cabeladuro
Que sèmblo tèisso en blound rai de soulèu
Cencho un miracle de figuro

E l'óupulènto estampaduro
Jusquo eis anco s'en fa coumo un reiau mantèu.

Tau qu'un cascai de perlo fino
Lou rire esclato entre sei blànquei dènt;
D'uno belugo s'ilumino
Soun vistoun linde, e, cristalino,
Sa voues que vous trepano a de tèndreis acènt.

Oh! la jouvènto si saup bello:
Soun miraiet tout lou jour li va dis;
E puei l'innoucènto Marcello
Li remeno qu'es uno angèlo
Vengudo bèn segur tout dre dóu Paradis.

Lou mau es que leis uei bevèire
Dei galantin li va cridon tambèn
E qu'elo es urouso de vèire
Que de sei charme proumetèire
Foueço soun pivela: Diéu! va saup que tròup bèn

E li trovo proun jouïssènço:
Après soun ban de parfum amelen
Es plus d'un regard d'innoucènto
Que reluco emé coumplasènço,
Dins lou metau pouli, soun bèu cors vierginen.

Pèr crèisse encaro la richesso
De sa persouno, oh! de bouen! facho au tour,
Vougnon d'òli de grand finesso
De soun péu leis anello espesso
E l'atifon de lèuge e precious atour,

Qu'en sourtènt dei man dei servènto
Es uno rèino... Ai! quouro à la lus vèn
Lou parpaioun, la flamo ardènto
Lèu crèmo seis alo imprudènto:
Qu juego emé lou fue si li brulo souvènt.

Lou bais que d'escoundoun si douno,
Oh! coumo es bouen! Oh! suau frenimen!
E la vièrgi si descourouno

E, l'uei claus, manello, abandouno
Soun cors souple à l'ardour dei dous embrassamen.

Oh! vergougno! La couquihado
Vèn de beca, fouleto, au pan d'amour
E n'en rèsto touto enebriado
E tardo pas, l'endemouniado,
De faire pèr sa roio escandale à l'entour.

A soun castèu l'a que de fèsto:
Gourrin, gourrino an jouious rendès-vous;
Miriam, pauro! es à la tèsto
D'uno gusaio toujours lèsto
A la danso, ei festin, sabourun amoureux.

Es lou tèmple de la lussùri,
Soun Madaloum, e lou pople sousprés,
Blessa de l'autiero belùri
D'aquelo insadoulablo lùri,
Li dis: la Madaleno, en terme de mesprés.

A Betaniò, oh! que de lagno!
Mai Miriam si trufo de sei gènt
E lei tèn luen emé magagno.
Ah! vau-ti miés que sei coumpagno
Qu'à l'amour se si douno, elo, es pas pèr l'argènt?

E, quatorze an, d'aquelo vido
A pou scu viéure uno superbo enfant
De toutei lei bèn prouvesido,
De toutei lei gràci enlusido!
D'èstre à l'ounour dóu mounde aurié-ti mai d'afan?

Noun, es jamai estado urouso,
Car la paureto a 'gu lou couer barra;
Quand Mioun, la silenciouso,
Mourè, pa 'no tristour pïouso;
Lou rire faus soulet en soun èime nafra!

Souleto la douço Marcello
De fes asardo un counsèu, afrountant
De remouchinado crudèlo,

Mai saup, la servèto fidèlo,
Qu'à Marto fan grand gau seis esperfors coustant.

Un jour dounc à la Madaleno
Marcello a di: - Dóu proufèto judiéu
Counouissès pas la voues tant leno:
Se proufitavias de l'aubeno?
Sus la mountagno, eici, deman vèn; li vau, iéu!

Jèsus de Marto e sa famiho
Ero l'ami, mai jamai Miriam,
Eu, l'avié visto à Betanìo
E souvènt de la pauro fiho
Marto l'avié parla, dins sei lagremo en diant:

- Oh! garissès-nous-lo, bouen Mèstre!...
Sus la mountagno ensin dounc es vengu
Lou pople de tout lou campèstre:
Madaleno, astrado de l'èstre,
Escouto frenissènto, e 'n soun couer esmougu

Toumbo la semenço divino.
La pecairis escampo bèn de plour;
L'ourrou de sa vido malino
La trepougne coumo uno espino
E va lèu s'espandi coumo uno agusto flour...

Dóu repenti purificateur
A Madaleno es vengu lou bouenur.
Ah! de plus urouso n'a gaire,
Car Jèsus, de sa santo maire,
En li parlant bèn dous, l'a douna lou noum pur:

- Perqu' avès foueço eima, Mariò,
Foueço tambèn vous sera perdouna!
E lou Sauvaire, à Betanìo
Venènt un jour teni sesiho,
Elo rèsto à sei pèd e, lou cors prousterna,

Countèmplo sa divino fàci.
Marto si plagne, estènt que si fa tard:
— Elo fa rèn, dis, iéu m'alàssi!

— Marto, Jèsus respouende, gràci!
Es elo qu'a chausi, vuei, la meiouro part!

Oh! coumo si tremudo l'amo
De Madaleno! A perdu sa fierta;
Plourant toujours sa vido infamo,
Aro demando la calamo
Au travai de sei det ardènt de carita.

Mai l'escandale de sei vici
Dóu pople encaro empacho lou respèt:
A bello à faire sacrifici
De tout ço qu'èro sei delici,
Soun franc reviramen rèsto en tóutei souspèt:

Uno fes meme que champèiro
Emé sei gènt pèr ausi presica,
La foulo en ràbi la couchèiro:
— Li jite la prourniero pèiro,
Dis Jèsus douçamen, qu'jamai a peca!

De la pecadouiro es sincère
Lou pentimen; lou Sauvaire va saup
E dounc l'aparo, jùgi austère;
S'es rendudo, e d'un biais sevère,
S'a, d'en proumié, la pauro, agu qu'àuquei ressaut.

Jèsus es pas d'asard que douno
Soun afecien à la grand pecairis
E de soun passat la perdouno:
Saup que l'ufanouso courouno
Que li trenon sei plour meno ei camin d'Alis

E l'aimo; o, l'aimo... Tau lou pastre
Qu'avié perdu sa fedo dins un boues
E la cercavo au clar deis astre,
Quand l'a ramenado à l'encastre
Ause emé mai de gau sa tremoulanto voues,

Ensin Jèsus aimo Mariò.
De longo dato a soun grand couer dubert
Pèr tóutei, certo, à Betanìo;

Entre élei pam.ens fa 'no triò:
Es pèr l'amo en trebau qu'à pèr èu mai s'oufert,

E souvènt n'en douno la provo...
Sus l'oustalado a pica vite e fouert
Lou tuert dei terrèstreis esprovo:
Dóu tèms que Jèsus luen s'atrovo,
Lazàri malautejo; es au plus; ai! es mouert.

Just dins soun obro apoustoulico
Jèsus es pres e tardo de veni:
Mau-grat leis erbo aromatico
Lou cors sènte: à la toumbo antico
Deis àvi fau l'aduerre enfin, à l'embruni...

Souto lou curbecèu de pèiro
L'a quatre jour que lou paure es coucha.
Vès, leis apouesto! S'adarrèiro
Jèsus, e Marto que lou guèiro:
— S'eria 'sta 'qui, li crido en lou viant aproucha,

Mèstre, serié pas mouert moun fraire!
La fe trespairo en ço que Marto dis.
Si taïso d'abord lou Sauvaire;
Plouro, puei de mot assoulaire
S'escampon de soun couer, soumés e pregadis:

- Qu mouere ensin nèisse à la vido
E vèn d'intra dins la glòri dóu cèu!...
Mai quand Mario adoulentido
Marco à soun tour, elo escarido,
Emé la memo fe, meme regrèt crudèu

E li dis: — S'eria 'sta 'qui, Mèstre,
Serié pas mouert moun fraire! boulega
Jusquo au fin founs de tout soun èstre,
Vers soun paire aussant soun bras dèstre
E soun front suplicant, e lou ginous plega,

Jèsus prègo; au trau funeràri
Si fa mena; prègo encaro un moumen,
Puei coumando: — Souerte, Lazàri!

Aqueste, espoussant soun susàri,
Repren vido e s'aubouro au brèu coumandamen.

Marcho lou mouert!... Quuno espavènto!
La foulo crido. Ai! s'enfuge mens lèu
Lou cabrit que si despoutènto,
Soun liame rout... Recounouissènto,
Marlo, elo, es en plour dins lei ple de soun vèu...

Es lou tèms sourne que lou Criste
A de sa fin predi l'evenimen
E de toutei lou couer es triste,
Mai pas degun que si countriste
Mai que la Madaleno en de grèu pensamen.

Ai! fau que mouere lou Sauvaire!
Dins lei soufrènço, auboura sus la crous,
Ai! fau qu'espire coumo un laire!
Es juste?... — Ço que vòu moun paire,
Jèsus a respoudu, fau que nous siegue dous!

E tout pamens dins la naturo
Crido l'espèro e la vido: ei bouissoun
Lou printèms fa 'no vestiduro
De flour suavo e de verduro
E dins lei boues fougous renèisson lei cansoun.

Marlo à l'entime si lagno:
Dei flour nouvello elo si trufo bèn!
La tristour cade jour la lagno
Que mai e deja la magagno
A cava de long ple soun front pale e doulènt.

S'enva pèr orto, sounjarello,
En caucigant sus lou bord dóu camin
Viuleto fèro e citrounello
E pèr de draio virarello
Si trovo, saup pas coumo, à la vilo, un matin...

Aro pouerto uno jarro pleno
D'òli de nard, parfum tant precious
E rare que n'a 'gu l'aubeno

Qu'à pes d'or: — Tè! la Madaleno
Que revèn, si dis vite, à soun lùssi ourgueious!...

Juèse, à la demouero ufanouso
D'aquéu Simoun, lou ladre, qu'a gari,
Pèr uno ceno doulourouso
Acampo la tiero noumbrouso
De seis apouesto e vòu, avans que de mourir,

Li marca la toco suprèmo
De sa dóutrino: autant-lèu de sa fin
Sa paraulo douço pren tèmo
E predis lei soufrènço estrèmo
Qu'an de purifica l'ouloucauste divin.

E lei plour ei ciho perlejon;
An l'amo en dòu, lei disciple; n'a qu'un,
Judas, que seis uei beluguejon
E que senistramen roudejon.
Ah! destrias sa pensado: aurés de frejoulun!

Mai uno fremo, tèsto clino,
S'es avançado e sei péu desnousa
Coumo d'uno mantiho aurino
Vèlon sei bras nus, seis esquino
E lou moufle dei sen de senglout tabasa.

Mudo, toumbo ei pèd dóu Sauvaire:
Leis a bagna de plour e de parfum
E dóu biais menin d'uno maire
Lei seco dóu flot caressaire
De sa cabeladuro e lou voun parte en fum.

Puei lentamen la pauro fremo
De la litocho a, tristo, fa lou tour,
E li mesclant mai de lagremo
Escampo sus la tèsto memo,
Sus lei péu bloundinèu, sus lou front dóu Segneur,

D'òli coumo d'or fin roujastre,
Lou nard cremous, lou baume redoulènt,

E dóu bèu vase d'alabastre
Au sóu toumbon lei troues. — Mal-astre!
Que de denié! si crido, ai! n'a mai de tres cènt,

Mes au degai, qu'à la pauriho
Aurien pou scu lei traire à soun proufié!
Mai à Judas qu'ensin rouviho:
— Qu'anas faire un comte d'arbiho?
Jèsus li dis; de paure, ai! las, que voulountié

Déurés l'aléuja sa misèri,
N'aurés toujours; iéu, bèn lèu m'aurés plus.
Acòubre lou treboulèri
D'aquesto fremo e lou mistèri
De soun ate piòus a de jita de lus:

En mi vougnènt de sa man leno,
A prepara moun ensevelimen;
Adounc li fagués ges de peno,
Que pertout de la Madaleno,
Prechant moun evangèli e meis enseignamen,

Si dira co que vèn de faire...
Puei un grand chut: Juèse intro en ouresoun...
Judas, l'infame, coumo un laire
Pau à pau si tiro pèr caire
E, zóu! courre alesti sa negro trahisoun

Es aro facho l'obro ourriblo!
Signe d'amour qu'ei labro fas mounta
Lou mèu de nouesto amo sensiblo,
Vuei à la mouert la plus terriblo,
O bais aguste, vuei, escàfi e lacheta!

As liéura la santo vitimo!
L'agnèu divin, de sacrilègei man
L'embruton sa fàci sublimo;
Vuei la cridadisso unanimo
D'un pople ingrat l'insulto, — ai! las, acò 's uman!

Quand ièr lou pourtavo en triounfle;
La capounié de prèire verinous
E d'un jùgi d'ambicien gounfle,

L'iro avuglo boufant à rounfle
Dins la foulo, lou van clavela sus la crous.

E tu, l'amarello fidèlo,
Emé sa maire as soufert sa passien;
E, quouro avèn l'ouro crudèlo,
Souto sa mourènto parpello
Pèr tu sèntes encaro uno benedicien...

Es mouert; ta doulour es afrouso;
Mai lou sepucure a pas garda lou cors
Que l'an fisa de man piouso
E quand vanegues, lagremouso,
Qu'en cerco dóu cadabre abenes teis esfors:

— Mariò! amistous ti murmuro
Un jardinié que rodo peraqui;
E devistant sa caro puro:
— O Mèstre! fas; e sus la duro
D'à ginous toubes; mai sus toun front aflaqui

Jèsus pauso sa man divino:
— Mi toques pas! sa douço voues ti dis;
E soun det, marcant ta car fino,
Li laisso uno emprento evourino,
Un sagèu miraculous que sera duradis...

Soun coumplido lei proufecìo:
Vuei Crist es mouert! Crist es ressuscita!
A mounta 'u cèu, vuci, lou Messìo
E, dins soun amaro patriò,
Sei disciple pertout soun, vuei, persecuta.

Mariò, as dins toun couer eimaire
Espèr e fe: que ti fa de soufri?
Soufrènço e plour ti peson gaire;
Soun, leis ancoues, purificaire
E seras, à toun ouro, urouso de mourì...

Ah! noun, fau pas que s'expandisse
Lou samemat! si soun di lei Judiéu:
Noun, fau pas, lou gran, que trachisse,

Mai fau que vitamen perisse
Touto gènt temougnant que Juèse es fiéu de Diéu!

Pèr que noun la meissoun si lève,
Fau esturbi lei valènt meissounié!
Fau plus qu'un disciple eici trève!
Souto lei pèiro toumbo Estève,
E Jaque pèr la dago es mes à l'agounié.

E vautrei, ta souerre e toun fraire,
Emé Trefume, Estropi, Meissemin,
E la fino flour dóu terraire,
Lei plus francs ami dóu Sauvaire,
Marcello e Marciau, Sidòni e Savournin,

Cleoun, lei doues Marìo e Saro
E Jousè qu'a dóu Criste sus la crous
Descendu la despueio e qu'aro
Coumo vautre autamen declaro
Sa fisanco en Jèsus, lei creirias-ti plus dous

Lei destin que vous alestisson?
A vouesto perdo an bèn troup d'interès
Lei vièi catau e s'enmalisson:
Cregnès que vous aprefoundisson
Dins lei flot tout-d'un-còup? Acò 's pas soun arrèst.

Vous vòu de plus lònquei tourturo
Sa marridié: — Soun Diéu lei tirara
De soun angouissantò pousturo,
S'es ben mèstre de la naturo!
Ensin, richounejant, a, lou priéu, empura;

E mai ourriblo es la sentènci:
Dèvon lou fre, lou souem, lou set, lou fam
Ensèn vous chabi l'eisistènci,
Se deis elemen la viólènci
Vèn pas metre pu lèu terme à voueste malan;

Priva de tout, de l'aigo memo,
Sus un veissèu vous an enmoulouna,
Vièio barcasso sènso remo,

Sènso vèlo, e sus la mar semo
Que vous brèssò d'abord vous an abandouna.

Pàurei gènt, avès la preguiero
Pèr soulo empento, e lei flot bressarèu
Vous aluenchon de la coustiero;
Quand puei va toumba la sournierò,
Sias perdu, l'a long-téms, entre l'oundo e lou cèu.

Mai es mèstre de la naturo
Voueste Segnour; vous v'an di, renegant.
Veraï: sus! 'inmènso planuro
De moutoun courron; es mens puro
La lus deis astre: acò 's de pluejo e d'auragan.

Lei niéu vous jiton d'aigo douço:
N'avias besoun! L'afrouso brefounié
Sentès, vioulènto, que vous pouso
Mai semblarié que dins sa couso
La barcado óubeïsse ei man d'un timounié!

Quo esfraïouso travessado
Dins tout acò! La nau, quouro ei cresten
Dei lóngueis erso encourroussado,
Quouro en sei founsei cabussado,
Va s'espeça: — Diéu bouen, nous pouerto; souvèn-t'en!

Certo, vouéstei prègo fervènto,
Diéu leis entènde: un levant miracloùs,
Dins un vanc que vous espavènto,
Lampo sus la routo mouvènto
E vous buto en tres jour sus un bord savelous.

Subran, prousterne sus l'areno,
Adouras Diéu, rendès gràci au Segnour;
La terro espitaliero e leno
Que l'a touca vouesto careno,
La beïsas tendramen e l'arrousas de plour.

Es-ti pas un troues de Judèio
Que rescountras emé seis óulivié?
A travès engano e sadrèio,

Vias alin de muraio vièio:
Es Arle la roumano emé sei cativié.

Soun pople vous fa d'acuiènço
E li dounas l'ensignamen sacra
Dóu Crist, puei la bello Prouvènço
Vous òufre uno expandido inmènso,
Mai avès, leis ami, de vous dessepara.

Vas, tu, Madaleno, à Marsiho
Emé Lazàri: à la richo ciéuta
Que poumpousamen si souleio
Dins soun gou, metès en poutiho
Seis idolo e li dias lei gràndei verita.

Mai tu, bello enca de jouinesso,
Dins lou regrèt de tei fauto d'antan,
Cregnes dei foulo l'alegrosso;
Dins uno vido de rudesso
Voues puni toun bèu cors qu'un jour miraves tant.

As franqui lei mountagno drudo;
As fugi luen, dins un large desert
Cencha de couelo roucassudo
E l'as trouva la soulitudo,
Subre un boues souloumbrous, entre la terro e l'èr,

Dins aquesto baumo badanto
Coumo lou nis d'uno aiglo e qu'un dragoun
N'avié fa sa cauno esfraianto;
Avié, la bèsti menaçanto,
Plega souto lei còup d'un vouele d'angeloun.

Ti nourrissènt que de racino,
Tu qu'àutrei-fes viviés dins lei festin,
Aguènt pèr tapa teis esquino
De toun péu d'or que l'oundo fino,
Tu qu'aviés àutrei-fes de mantèu de satin,

Trento an faguères penitènci,
Eici, lavant tei pecat dins lei plour;
Nous dien proun que ta repentènci

Toucavo Diéu, que sa clemènci
Sèmpe sus tu vihavo e que sèt fes pèr jour

Seis àngi esmougu ti mountavon
Au Sant-Pieloun, t'aussavon dins leis èr,
Sus lei valoun ti balançavon
E que long-tèms ti li bressavon
Pèr ti li faire ausi lei celèstei councert;

De toun cors pamens nous pertoco
Lou long martiri; e eici qu'as maca,
Trento an, tei ginous sus la roco,
Qu'as begu l'aigo...

Uno man toco
Moun espalo e mi fan: — Anen! vènes panca?

CANT IX

La fèsto

Retournan à Giniés pèr la soupado. - Leis enfant juegon sus l'iero: Mèste Catarra; lou cougourdié pourri; pijoun, vouelo! lou gàrri. - Oh! bello nue! - A l'aubo arribo de nouvèu roudalet. - Bouen-jour, patrouno! - Diéu vous lou doune! - La revihado. - Tout un pople dins lou boues. - Leis aubre seculàri an bèn vist d'àutrei councours de gènt: lei papo; lei rèi; lei prince; lei prelat; etc. - Si parte pèr la fèsto. - La croto deis uou. - La toumbado mal-astrouso: sèt an d'espero avans de si marida. - La pauso au Canapè. - Roso-Mirèio li rescontro soun amiguet. - La fiero - Zóu! à la baumo!

— Eh! bèn, salut, patroun Bello-Ouro!
Perqué l'erias, falié plus reveni!
— Tè! ve! la maire de Diéu plouro!
Quand veniéu de manja d'amouro,
Estènt pichot, ma maire, un vèspre, à l'embruni.

Mi faguè pariero acuiènço,
Em 'un gautos signant lou coumplimen:

Aqui ma gauto... Mai l'oufêso
Pèire l'acueie emé plasênço,
Car vite sa mouié l'a 'mbrassa tendramen.

— Si languissian, ajusto Berto,
E sian vengudo alor vous rescountra,
Dóu tèm̄s que lei pichouno, alerto,
Sus l'iero de paio cuberto
Juegon coumo de fouelo à Mèste Catarra.

Un brut de voues jouino e galoio
Nous fa sounja qu'arriban à Giniés
E vian lèu de nouéstei ninoio
La troupo jouiouso e ravoio
Que dóu rire e dei saut li bacello lou piés.

Elei, dins sei virado ardènto
Nous aguènt vist, nous vènon au davans,
La caro roujo e susarènto,
De paio à sei treno pendènto,
La peitrino duberto e l'alén li mancant.

— Tant foulamen se si pòu courre!
Anas pesca, pichouno, un marrit mau!
Iéu li vèni... Mai d,e discourre
Ai pas fini, que lou fin mourre
De Martouno m'afroun.o e 'm' un biais que ta gau:

— Alor fau plus que si boulegue!
Mi dis: lou gàrri, alor mounte a passa
Fau plus que si cerque e si veque?
De-longo alor fau que si plegue
E que lou gàrri escape?... Anan pas s'alassa!

— Mai que tron aqui mi barjaques
Emé toun gàrri — Eh! bèn, pèr l'arresta
Fau ti pas qu'en courrènt l'ataques
E dins tei brassado l'estaques,
Se lei favo soun cuccl?o e se lei voues tusta?

— Bon! Entre-viéu, ço que voues dire,
Vai, de toun jue, sènso mai de leiçoun!..

Urouso enfant, aimes de rire
De pau de causo!... Iéu, lou pire
Es qu'a passa lou tèms que sabiéu toun jargoun!...

Arriban coumo acò sus l'iero:
Baisso lou jour; I'espetacle es poulit:
Touto uno jouinesso galiero,
Sus la paio souplo e lóugiero,
Crido, canto e sautejo, eissame enfantouli;

E l'iero meme es pas proun grando
Pèr acampa touto la coumpagnié:
L'a-ti pas de jouiousei bando
Qu'en-bas e qu'en-aut fan lou brando
A l'abri dei platano e dei grand castagnié?

Es que, l'a deja quàuqueis ouro,
De chourmo novo arribon en cantant:
Soun lasso proun, en part majouro,
Marchant despuei sàbi pas quouro,
E, pauro, creson bèn de v'escoundre en sautant;

Mai soun pesanto sei cambado:
Coumo, esto nue, tout acò va dourmi!...
— Avans qu'en plen siegue arribado
La sournuro, bèu cambarado,
Devrian ana soupa; pichouno, escoutas-mi!

Eh! bèn, jamai coumo aquéu sero
De moun vejaire èron esta lei gènt:
Tóutei filon coumo de vero,
Mai Titin, que d'un brout d'aubero
Mourdié la rusco amaro, es lou plus diligènt,

L'amarour qu'es aperitivo
L'aguènt, proubable, acampa grosso fam;
L'a sènso acò, deja proun vivo!
Avèn la dènt despachativo,
Tóutei leis autre aussi, grand gènt, fiheto, enfant,

E fèn ounour ei cousiniero:
Nous toco pas, verai, lou gargassoun
Uno espetaclouso soupiero,

E la superbo meissouniero,
Que n'an fa tres sartan, s'enfuge en gros taioun.

— Tè! vau miés vous carga, coulègo,
Que vous rampli, meme Aguste qu'es gras
Coumo lou crucifis dei Grègo!
Dis Claro. —E pamens jamai prègo!
— De tei prouvèrbi alor quand puei mi parlaras!

— Tè! la luno que vous regardo!
Respouende Aguste en riant e guinchant l'uei;
Si trafo de vautre e vous gardo,
Dins l'uias blave que vous dardo,
Quaurarèn de l'envès; sias deja touca, vuei!

— N'as menti! tout-d'un-tèms lou coupo
Uno auto voues que nous vèn de l'eiròu.
Aguste es dre, lou vènt en poupo...
Mai de nouésteis enfant la troupo,
Qu'a coumprés ço que n'es, a parti sus lou coup.

Quant n'as cui? vèn la replico;
Puei l'autro voues: — Lou cougourdié pourri!
Hoi! fa Guste qu'alor s'esplico
Ço qu'a pres coumo uno critico;
La luno, es iéu que toco? E coumo un paure ris...

Eila, sus l'iero, à Pijoun, vouelo!
Jugavo un group; un autre, au cougourdié!
D'autro, en round sus la paio mouelo,
Riant e cridant coumo de fouelo,
Fasien courre lou gàrri, e tant lèu que poudié

Lou moucadou nousa viravo
A soun entour: ai! ai! garo dei còup,
Se mai d'un tour puei s'arrestavo!...
— Diàussi! lou meinagié cridavo;
Coumo mi lou metès, esto nue, moun eiròu!

Mai deja plegon la parpello
Mai d'un jouvènt contro lei garbeiroun;

Nautre, dóu seren deis estello
Qu'anouço la nuechado bello
Nous anan, dins lou jas, assousta 'n un cantoun...

Oh! bello nue!... L'aigo cascaio
En soun pesquié; s'entènde rèn de mai:
Pa 'no fueio d'aubre gaçaio
E dins l'èr pausadis varaio
Un deleitous parfum, tout coumo au mes de Mai.

Dins soun argentalo lumiero
La luno embéu leis estello; lou plan
Douerme en soun espendido entiero;
E lei tousco de pin, autiero,
Soumihon, tranquilasso, ei bais de l'estelan.

Sènti lou ravimen dóu pastre
Que dins la nue, cavant l'immensita,
Ei milanto clarour deis astre,
Cercó l'invésible pilastre
Que dins lou fiermamen soustèn tant de bèuta;

Sènti de soun amo óupressado
L'adouracien pèr lou divin autour
Que leis a dins l'espàci aussado;
Sènti l'esmai de sa pensado
Davans sa pichoutesso ei pèd dóu Creatour...

E dins lou raive l'ouro passo,
L'ouro a passa dins la countemplacien;
Uno campano, coumo lasso,
Pico eilalin, en terro basso,
Sei douge còup: lei mouine intron en devoucièn.

Mai eis en-fouero grand silènci;
Plus ges de brut: Oh! la sublimo pas!...
Pamens dins la magnificènci
De sa prefoundo sounnoulènci
La naturo endourmido, à travès lei campas,

Arribo de fes que souspiro...
Es que l'auriho, à forço d'escouta,
A la fin s'alasso e deliro?

Noun!... Es bèn lou plan que respiro,
Es la fourèst qu'aleno, es l'èr qu'a tressauta.

Uno fèblo aureto vanego,
Frustant la ramo impercetiblamen;
Es rèn qu'un péu d'èr: noun boulego
La mendro jitello; noun plego
Lou pecoulet dei fueio; es lougié veramen,

Mai vous adue, provo qu'eisisto,
De luen en luen, un pau mai de frescour;
Alor soun alenado misto
Meté, sutilo viólounisto,
Dins leis aubre un vounvoun d'uno estrèmo douçour

Es plus fouert lou brusimen d'alo
D'un mouissaloun; es mens armounious
Lou chiéu-chiéu prim dóu zui qu'escalo;
L'eigueto lindo, que davaló,
Mens plan courre e lalejo en soun lié resquihous.

Aquéu murmur, de moumen, crèisse;
De la fourèst es coumo lou respir;
Es la vido que li renèisse
E la luno au tremount li tèisse
Uno aureolo au front, d'argènt e de safir.

La bouscarlo qu'es matiniero
Jito un quielet; un troupèu dins lou plan
Esbrouto l'erbo sesouniero;
S'ause seis esquerlo lóugiero;
Soun chin japo, e lou pastre, éu, s'espaço en siblant.

Brihon leis estello sereno:
Calon lei brut dins l'aire beisarèu;
Mai toujours passo l'auro leno;
Mai la fourèst toujours aleno,
E lou cors s'assoupisse au murmur bressarèu...

L'aubeto en roso capelino
Tout just pounchejo amount: — Hòu!de l'oustau!
Fan de voues gaio e mistoulino:

Coumo, en bando, de cardalino,
Un flo d'enfant s'amourro au pesquié de cristau.

Es lei jouious avans-courrière
D'un roudelet que, parti bouen matin,
Sautant d'abord, cantant, risèire,
Puei s'alassant de pau li vèire,
Vèn de Sant-Zacarié pèr de marrit camin.

— Hòu!... Hòu!... li respouendon de l'iero;
Lèu counouissènço es facho entre jouvènt;
Aqui souerte la meinagiero:
— Hoto! sera boueno la fiero,
D'abord que lei marchand deja s'acampon! vèn.

N'a que li dien: — Bouen-jour, patrouno!
— Diéu vous lou doune, elo fa, meis enfant!
E lèu un mounde l'envirouno;
Ço que mi fa plesi, pichouno,
Es que m'afrontés pas, coumo tant d'autro fan.

Lei gènt, vrai, coumo à ta vilo
Soun educa! L'a plus ges de respèt!
Talo que vous sèmblo gentilo
A pa'n bouen-jour, fraso inutilo,
Quand dins lou vouestre, eici, vous marcho sus lei pèd!

Dins la tradicien prouvençalo
Ero pa 'nsin: tout passant dóu draïdu,
Vèsto vo blodo sus l'espalo,
D'uno paraulo freirenalo
Toujour vous saludavo, ajustant: se Diéu vòu!

Aro avèn perdu l'avenènço
E la fe...Mai vaqui proun de sermoun;
Vous fau d'àutrei rejouissènço;
Cantas, sautas, bello jouvènço!
L'aubo de Diéu parèisse adaut subre lei mount.

Sant-Cassian, en efèt, s'aubouro
Au bèu mitan d'un regiscle de fue;
Lou front deis aubre s'encoulouro;

La plano, sènso luno, es l'ouro
Que si desembrunisse e rougejon lei pue.

La naturo en gau si revihò;
De la fourèst a cala lou murmur;
L'aucèu sauto dins la ramiho
E: dins l'eigagnolo bresiho,
Espoussant seis aleto au frusta de l'èr pur.

Mai es lou jour, vuei, de la fèsto
E dins lou boues n'a qu'an passa la nue:
S'entènde deja sa cridèsto,
E dins lou plan de bando lèsto,
Jouiouso e cantadisso, arribon de tout lue:

S'ause lou brut dei carriolo...
Ausso, o soulèu, toun disque esbléugissènt:
Tout t'espèro: la courrejolo
T'òufre l'eigagno en sa courolo
E l'espri soun perfum, e lou pin soun encèns,

E lou gau sa cansoun galoio!...
A la paiero avien pas mau dourmi
Nouéstei gènt: — Aubejo, pèr moio!
— Si fau leva? — Leven-nous! — Soio!
Ei proumié rai dóu jour, avien di leis ami.

Emé de paio en sei trenello
E leis uei gounfle e de badau brusènt,
An lèu naseja, nouéstei bello,
A la frescour reviéudarello
Parant emé chalun soun front rose e lusènt;

E vivo, que dirias un vouele
De perdigau, acourron à la fouent:
Vite an redreissa lou péu fouele
Qu'arràgi l'ombrejo lou couele
E vite an repara lei maqueiroun dóu souem;

L'aigo fresco que leis esgaio
Li mete ei det de perlo de cristai
E Jano, en uno douço raio,

N'en bagno Pau que si miraiò
Dins seis uei e si perde en deleitous pantai...

Titin dins la conco versanto
Jito un bacèu qu'an leissa peraqüi
E fa giscla, beluguejanto,
Uno espouscado perlejanto
Que tóutei n'an sa part: Ai! ai! noun a franqui

Dès pas, lou paure troublo-fèsto,
Que l'an sesi, brutalò, ùnei dès man
E que tout-d'un-còup, fermo e lèsto,
Dins l'aigo l'an saussa la tèsto
E lou remeton trempe e dre, lou sacamand;

E lou pauret qu'a plus lou rire
Courre au soulèu si li faire seca,
Mai ço que li sèmblo un martire
Es que Roso e Marto, en delire,
Si trufon de lou vèire amplamen refresca.

N'en voues de quielet e de riado!
Ensin toujours l'un plouro e l'autre ris!
Lei pichouno, coumo enrabiado,
Si viéuton de gau demasiado
E fau un long moumen que s'amainon sei cris.

— Zóu! Titin, fagues plus la fougno!
Vène teta 'n degout de cafetoun,
Qu'acò 's, moun bèu, d'òli de pougno;
E pèr ti gara de sei mougno,
Tu, bèn gentilamen pouerto-li-lou, Martoun!

E sus aquéu prepaus de Berto,
Lei dous enfant, risoulet, fan la pas
E dins sa brassado duberto
Jougnon sei tèsto escalaberto,
Dóu tèms qu'au caffè caud nautre aussì fougnan pas...

O séuvo misto e sounjarello,
Es proufanado, encuei, ta majesta!

O calamo coungreiarellò
D'ètei pensado assoularellò,
As fugi, pèr un jour, toun tèmple viólenta!

O dous pantai de la jouvènço,
Dins lou mistèri eimas de prendre vanc
Pèr lei mirifiquei vesènço
D'uno amourouso endevenènco,
Mai vuei d'aleteja v'assajarias en van.

Ah! certo, au tournant d'uno draio
Rauba 'n poutoun, acò tant si pourrié,
Mai lou bèu parèu que varaio
Au mié dei crid e dei risaio,
Voulès que s'abandoune ei lònquei ravarié?

Or, souto la ramado espesso
Vuei s'encafourno un pople brusissèn:
Pertout de quielet d'alegresso,
De rire e de cansoun; souspresso,
L'auceliho a fugi lou trepeja dei gèn.

Dins lei cimello mouvedisso
Si pòu que l'auro ague enca de murmur,
De la bouscarlo trevadisso
Que s'ause enca la piéutadisso,
Mai soun dous chafaret si perde dins l'azur.

Souto la vouto souloumbrouso
L'a que vacarme... Oh! pas mai clantissè,
La fourèst, d'ourrouir souspirouso,
Emé sa chinaredo afrouso
Quand lou marescau Bruno, un an, l'envahissè...

Leis aubre dès fes seculàri
N'an vist ensin de grand councours de gèn:
Jour d'alegrio, jour d'esglàri,
Vièsti espeia vo soumtuàri,
Tóutei clafissien l'èr de sei crid rufe o gèn.

Quouro em'uno e.scorto ufanouso
De vièi canounge, evesque e cardinau,
Darrié 'no proucessien noumbrouso

De clerc en liéurèio poumpouso
Que pourtavon crous d'or, bandiero e grand fanau,

Quouro entre sa gàrdi impausanto
D'alabardié grandas e moustachu,
Parti d'Avignoun triounflanto
Vo bèn de Roumo dóuminanto,
Sus soun cavalot blanc, souto un pàli pounchu,

Lei grand pountife, lei sant papo,
Mau-grat leis an, mau-grat lei pensamen
Que soun fais souvènt leis aclapo,
Mau-grat lei plus rùdeis estapo,
A la Baumo venien prega soulennamen;

Quouro, arribant de la crousado,
Lou rèi Sant-Louis venguè si prousterne;
Quouro cinq tèsto courounado
Venguèron, la memo journado,
Emé Roubert-lou-sàgi, umblamen si clina:

Quouro, aduènt de sei guerrié flòri
Lei plus valènt, venguè, Frances premié,
Rèndre oumàgi de sa vitòri
E remercia de tant de glòri
L'amigo de Jèsus, " Damo dei chivalié ",

Quouro, emé sa maire regènto,
Venguè lou rèi Carle nòu tout jouinet
E lei dous Enri que, sanglènto,
Devié, l'astrado trelusènto,
Faire rèi, l'un soun fraire e l'autre un cousinet;

Quouro, dins lei Ceveno ardènto,
Lou rèi Louis trege, aguènt regla la pas,
Eici, l'amo recounouissènto,
A l'assoustarello poutènto
De seis armo, venguè rèndre gràci bèn bas;

Quouro la rèino Ano d'Austrio,
Qu'avié proumés eici de reveni
Se pèr sauva la dinastio,

Lou cèu li fasié 'no famiho
E li dounavo un fiéu, l'espèr de l'aveni,

Quouro' regounflo d'óupulènci,
— Em' aquéu fiéu, Louis quatorze de noum
Deja 'n pleno magnificènci,
Elo enfin' en reminiscènci
De soun vot, revenguè pourtant lei plus bèu doun;

Quouro de prelat, de mounarco,
E de princesso, e de prince, e de du,
Gènt de noblesso e gènt de marco
E capitàni de remarco,
Venènt de tout païs, eici si soun adu,

Poussa pèr la recounouissènço
O pèr la fe, pèr la curiosita
Tambèn, pèr la divertissènço
O pèr touto outro counvenènço
Que, grand coumo pichoun, tóutei n'en sian buta.

Cresès que la longo couorto
De courtisan, de pàgi, de sourdat,
Ome e capo de touto sorto
Que seguien lou mèstre pèr orto,
Avié tout-just d'alèn pèr, mudo, escalada?

Cresès que l'ufanouso foulo
Dei segnouresso e dóu jouine fihan
De la marchò èro proun sadoulo
Pèr qu'uno gaio farandoulo
Jamai leis enliassèsse ei segnouret brihant?

Ah! mi sèmblo coumo de paure
Que devien rire en sautant e cantant,
Dei règlo sènso troup s'enchauere,
Picant dins sa couifo un brout saure
De genèsto, un blavet, uno rulo entre-tant!

Que voulès? A sei refoulèri
E seis ardour, tout coumo lou coumun,
Ço que dian lou grand mounde, e lèri,

Au clar jour vo dins lou mistèri,
Saup, oublida proun fes lei bèus us impourtun:

N'an vist de verdo e de maduro
E n'an ausi de crid, de bramadis,
D'inne pious, de dicho impuro,
Lei fièrs aubras que soun auturo
Encurbecello tout dins l'oumbrun estadis...

E vuei que de la Madaleno
Es lou bèu jour e que nous fa 'n tèms d'or,
Lou pople a pas manca l'aubeno
E l'amplour dóu grand boues es pleno
Dei siéule urous dei gènt, de sa joio en desbord...

Lèu Titinet à la brasseto
Emé Martouno an pres l'aspre camin
E touto uno bando alegreto
D'àutreis enfant s'es, lóugeireto,
Butado à sa seguido en fènt chin-nana-chin.

E, talo uno noueço menino,
En sautejant escalo lou grimpet
Que meno au boues: la boueno mino
De la farandoulo enfantino
Dounant lou vanc, Aguste aussi fa soun tripet,

— Lou péu gris es pas la sagesso!
E tóutei nautre avèn pas mau d'entrin;
La foulo dei gènt es espesso
Que tambèn mounto em' arderesso,
Puei s'enfounso emé gau souto lou fres oumbrin...

Aguste, en guinchant, risoulejo;
Es qu'a 'no idèio, idèio de boun sèn?
Pas segur! que lou tavanejo:
- Titin, crido lèu, as pa'nveio
De prendre d'uou au nis? Vène, l'anan ensèn!

Au pèd d'un óume venerable,
Dins un relarg coumenço un raspaïoun
Qu'escalo à drecho, just tenable:

Aguste l'abordo, imbrandable,
Menant, emé Titin, de jouine un bataioun:

Coumo quand lei touero barbudo
Fan en Abriéu sa longo prouciessien,
Dins l'abouriho fuiarudo
Bèn lèu en tiero loungarudo
La jouinesso s'enfournò e mounto em' afecien,

Meme que de seis esparrado
Ausèn lou brut: que de rire e de crid!
A travès dei broundo fourrado
Uno voues nous vèn: — Cambarado!
Hóu! nous esperés pas!... Vès, sèmblo de cabrit!

- Au plan camin lei leissa courre
Serié daumàgi!... Au pèd dóu grand nougié
Si reveiren!... - Diéu lei secourre!
Li vas faire roumpre lou mourre!
Ato! au pas de la cabro, aquelo countarié

Que calèsse un rai de cabreto
E de cabrit!... Dins la founsour dóu boues
La dicho, deja pas bèn neto,
Si perde e la tranquilo aureto
Just s'enca nous adue l'esclat de quàuquei voues.

— Anen, resten pa 'qui, mei bello!...
Martò emé Roso an représ autant-lèu
Lou camin, quand, proun fougnaarello,
Nous vèn uno voues que trampello:
— Mounte menon alor nouéstei pàureis agnèu?

— Vouéstei... cabreto, voulès dire?
Li dèvon faire, adaut, ma boueno grand,
Uno óumeleto... — A voueste aubire,
Pensas qu'es lou moumen de rire?
— A la croto deis uou, senoun, que li faran?

- La croto deis uou!... Nis barroco!...
Que pòu bèn èstre?.. — Alor va sabès pas?
Aperamount, au flanc dei roco,

Un trau en formo d'uou s'acroco,
S'enfounso en davalant, puei la tûni au dabas

S'alargo e d'uou de grosso meno
Lou tuve dur l'a garni lei paret;
Si dis qu'un jour la Madaleno
La troubè de vipèro pleno,
Que d'un signe de crous, coumo dins un fournet,

Lei troussé fin-qu'à la darriero,
E que despuei s'es jamai plus revist
Serp verinouo dins lei féusiero,
En fourèst bèsti carnassiero,
Dous benfa que la Santo ensèn nous a counquist...

— Es aqui nouesto pichounaio?..
— Eto, ma grand!... — Aro van retourna?
— Nàni, qu'uno estrechouno draio,
Qu'adaut serpentejo e varaio,
Souto la grando baumo après lei va mena...

Souto la vouto souloumbrouso
Avançavian gaiamen; si risié;
Si cantavo: jouinesso urouso!
Roso-Mirèio, souspirouso,
Sèmblo que la travaio un pau de fantasié
E soun uei pensatiéu roudiho;
Soun pas es las; soun silènci estouant
De soun ourdinàri babiho
Nous chanjo un pau. Marchant coutrio
Emé la souer de Pèire, an seis èr discourdant,

Car Lisoun parèisse en estàsi:
Pèire e Jousè fan em' élei camin
E Jousè 'm' uno gaio enfàsi
A Lisoun: — Permetès que tràsi,
O bello, a di, moun bras à voueste bras menin?

E la bravo fiho es ravidó...
Ai! ai!... Saurrés, e sènso estounamen,
Qu'emé soun amigo poulido
Pau vèn après, e trefoulido

Lei man de Jano e d'èu s'enliasson tendramen.

Van tóutei dous, l'amo enebriado,
E sautejant; ah! ti cercon pas mau,
Foulas, mounte meton sei piado
E sa cambo, coumo enrabiado,
Dóu meme biaïa afrounto e lei gibo e lei traü.

Fiche! la draïo es pas bèn plano,
Coupado qu'es de racinàgi touert,
E, dins un sautet, à la bano
D'un vièi soucau s'embrounco Jano
E subran, la paureto, a 'n mourimen de couer.

Va s'esterni, desfourtunado!
Trantraïo, crido... Es qu'es pas lou moumen,
Pas lou lue d'uno debanado!
Serié lou sort d'uno danado:
S'estransina sèt an d'amour, de languimen!...

Em' un quielet Jano trantraïo...
Jiton, seis uei, un regard d'espavènt...
Que mal-astre, se toco!... Estraiïo
Sei bras;... coumo l'arrapo ei braïo,
Jousè que l'es davans à prepaus la soustèn.

- Diéu bouen! elo fa triounflanto,
Ai pas touca!... Mai Jousè qu'es sousprés
De la butado, ai! ai! s'aganto
Au bras de Lisoun tremoulanto
Que, tròup fèblo, subran plego souto lou pes.

Lisoun sus Roso s'escagasso:
— Ai pas touca! s'escrido sus lou còup,
Deja drecho, e, paquet d'estrasso,
Roso-Mirèïo, la pauraïo,
Mudo d'atupimen, mourrejo pèr lou sòu.

Leis outro lèu l'an rabaiado:
— As ges de mau?... Vau miés que siegue tu,
Li fan, que ti siés estraiïo;

S'iés jouino e de ta varaiado
Miés que iéu poues brava la crudèlo vertu:

Car, sabes, qu dins lou boues toumbo
Rèsto sèt an, ve! de si marida...
Pauro Roso! lou couer li boumbo:
Es pas mai flacò la paloumbo
Que lou ploumb d'un cassaire au sou vèn de manda.

Sus sei cambo Roso tastejo
E, flour mourènto, aqui s'ajouco mai,
E, quand peniblamen s'eigrejo,
A sei lònquei ciho perlejo
Uno lagremo amaro: oh! lou crudèl esmai!

Resta sèt an!... Jouino que jouino
Deja soun amo a fa de pantai dous
E soun espèr subran s'arrouino...
Sèt an!... Ai! la paureto souino:
Lou tristun de seis èr n'es que mai pietadous!

— Sèt an!... murmurejo doulènto,
Si remenant lou senistre ditoun.
Crudelamen coumpatissènto,
Jano li fa: — Quno innocènto!
Faras lou castelet tout-aro au Sant-Pieloun!..

Hoi! que 's l'espèctacle qu'arribo
Aperamount? Tè! lou flot bressarèu
Que sus lei roucas de la ribo
S'escraso, aquéu qu'entre lei pibo
Passo e que subran trovo un redènt toumbarèu,

Lou vènt subit qu'avans-courrière
Fa brandouia lou fuiun dei valoun,
Lou ressouen lunchen dóu trounèire,
La raisso que, flèu destrusèire,
A, dins un vira d'uei, estern!ei meïssoun,

L'a 'n pau de tout acò dins l'aire
Counfusamen, adaut... Vite, escalen!...
Que vian!... Ardènt e boulegaire,

Un pople, alègre, galejaire,
Au Canapè souspiro e pauso soun alen.

N'es vengu de toutei lei draio
E dins l'ampLOUR dóu vaste pausadou
D'ùnei fan que passa; s'estraio
La maje part sus la roucaio,
Si ventoulant lou front emé soun moucadou.

De l'auto coupolo ramouso
Lou gai soulèu escampo de rai d'or
Qu'estrasson l'oumbro fresqueirouso
E, ravidou, la foulo urouso
De sei rire e sei cant marco soun estrambord.

Ah! qu'acò 's bèu! Es un delire!
Es un charme! Es... Tè! Roso, es pèr acò
Qu'adès tristouno la vian rire?
Ero proun gounflo, e meme pire,
Tant que dóu chafaret avian que leis ecò:

Aro seis uei jiton de flamo...
- Bon! siés aqui!... — Venèn jusf d'arriba!...
- As caimina de nue!... — Oh! flamo
Ero l'arpatejado!... — Ah! l'amo,
Iéu, mi sèmblo plus miéu, quand de nue fau tuba!...

- Charlot diregissié la bando
E n'a d'uioun, sabes, coumo lei gat.
Puei dins Signouro, roundo e grando
Coumo uno poumpo de coumando,
La luno fasié lume à nous embarluga;

E quand Roussargo dins la founso
A pareissu fasié deja grand jour...
— Vuei, Roso, au bèu lou tèms s'anounço,
Parai? Jano en riant li prounounço
Aquel escàfi: as plus d'eigagno eis uei, ma mour!

Aviés lou làngui?... Rouginello,
Vite a fugi Roso emé soun Louiset,

Qu'es segur que la pichounello
Es pas rèn que pèr coup d'estello
S'adès a rescountra soun bèl amourouset..

Ti li fa lei gros uei, sa maire:
L'a plus d'enfant!... Va faudra vèire au clar...
Elei dins lei group vanegaire
Si perdon... Roso, au calignaire
De dire soun segren, a pas fa de retard,

Qu'en lei jounènt à la mountado
Ausi Louiset que dis: — Ma bello, as tort!
Coumo voues qu'uno resquihado
Siegue uno talo mau-parado?
Veiras que saurren proun counjura lou mau-sort.

E, la man dins la man, escalò
L'urous parèu... Que de mounde que l'a!
Quand dins un champ, douço o brutalò,
Lei balanço l'auro estivalò,
Pas mai espesso soun leis espigo de blad!

Sian dins un estré prat de fiero
Que mounto e mounto. Ei ribo dóu camin
Dei marchandoun la longo tiero;
Si trovo de tout: de bandiero
De tóutei lei coulour, jauno, bluro, carmin:

La Madaleno dins sa baumo,
Sus soun roucas, l'es pintudo dessus:
Souto soun long péu fa la paumo
E pèr li poupla sa calaumo
Uno tèsto de mouert, uno urno, sènso plus.

L'an tambèn, sus de grands imàgi,
Couchado au sòu, au pèd dóu Sant-Pieloun,
E pèr viéure de racinàgi
Es proun poupu soun dous visàgi
E sa tèsto es à flour de la cimo dei mount.

Basto, l'an messo en touto sausso:
Sus de coucoun, de bouito, de saquet,

Dins l'argènt fin, la corno fausso,
Lou canoun que davans l'uei s'ausso
Pèr li vèire dedins, e dins foueço juguet.

Si vènde, emé la grando Santo,
De benechié, de chapelet, de crous,
E de medaio, dei gibanto,
Dei cavado, mato o brihanto,
Dei roundo e dei lounguet, em' un riban au nous.

L'a de tout: touerco, bounhouniho;
Pèr leis enfant, chivau de boues, tambour,
Fifre, troumpeto, jue de quiho,
Baudufo; e pèr lei jóuinei fiho,
Miraïet, fanfarlucho e flasquet de sentour.

Mai la misèri en lue s'óublido:
De malurous vous aparon la man:
Tout de matrassa de la vido
Que, mèmbe rout, visto blesido,
Si soun tirassa 'ici pèr demanda soun pan;

A mita mouert, sabon pas quouro
Finira tout l'ultimo garisoun.
Moun Diéu, la fin, quand vèn soun ouro,
La plus rapido es la meiouro:
Un còup de fre, de gràci, e de tres jour n'a proun!

Mai li tenèn, à la vidasso,
E fèn d'acuei toujours à l'enguentié
Que nous la vòu, lasso que lasso,
Faire dura... Tè! fai de plaço:
Emé sa gouerbo aqui n'a vun qu'a pèr mestié

De vèndre d'erbo sanitouso,
— La man de Diéu, que vous lèvon tout mau.
— Dins la fourèst, dis, soun noumbrouso
Planto e racino miraclouso.
Vès, pèr vouéstei vint sóu, vous n'en dóuni un bouen pau!

L'erbo-dóu-fùgi, lou mentastre,
La majourano e lou calamandrié,
Lou bouioun-blanc, erbo-dóu-pastre,

Lou toussilàgi de l'emplastre,
Tout acò 's lèu chabi: de bauco? N'en vendrié.

— Lou bouen nougat! Qu n'en demando?

Nous fa 'no vièio em' un èr gracios.

— Pèr lei groumand, pèr lei groumando

Lei coudoun cue! crido uno grando;

Fron sus l'aubre aièr! Vès, soun delicious!...

Mai l'a Guste emé sa marmaio

Qu'au vièi nouguié nous espèro, aplanta.

— Ah! fiche! vèn; sias pas en avo!

La, campano adamount gaçαιο:

L'a 'nca 'n long escalié; si fa tèms de mounta!

CANT X

Au Sant-Pieloun

L'oufici soulenne. - Cantico à Santo-Madaleno. - La predicança. - L'aigo miraclouso.
- Tóutei medaia! - L'amiguet de Roso e seis ami van à Sant-Meissemin. - Roso es
tournamai tristouno e Jano la counsouelo. - Lou dejuna à la Fouent de Nans. -Zóu! au
Sant-Pieloun! - A l'assaut dei pendis. - La capello dei Parisen. - Sian arriba. - Oh! la
bello visto! - incoumparablo vesien de la mar dins la nue. - L'aubo de Sant-Jan sus lei
cresten. - Cuïdo dóu trescalan pèr l'oli rouge. - Lou Sant pieloun. - Lou fèrri de chivau. -
Lou trau de Gaspard de Besso. - Lou castelet. - La davalado. - Lou grand chaine de
Santo-Madaleno. - La darriero benedicien.

O santo, o grando santo,

Avèn en tu recous!

Dins la vido angouissantou,

O grando santo,

Assousto- nous!

Ensin à plen de voues cantavo

Lou pople qu'èro avans nautre arriba

E dins la baumo largo e cavo

Despuei d'ouro s'amoulounavo:

Un oufici èro à mand deja de s'acaba.

Calè l'armounio piouso
Dou sant cantico e, dóu pourtau badié,
Emé lei vapour capitouso
De l'encèns, la foulo jouicuso,
Tau l'avé de sei cledo, en grand prèssou sourtié.

Nàutrei que boufavian encaro
De la mountado e reprenian alen,
Lou front bagna, roujo la caro,
Pensavian que serian tout-aro
Dei proumié sus lei banc: lei devian trouva plen.

Veraï, sus la vasto expandido
Proumenavian un uei meraviha,
Sus la fourèst que de la vido
L'avian trovado tant poulido,
Sus lou plan, sus lei mount alin ensouleia;

E lou tèms passo... Fau tout dire:
S'an, nouéstei vièio, envejo de prega,
Lei jouine aimon bèn miés de rire
E sèmblo, acò, proun li sufire,
Tant que dóu bèu-vesé soun gaire estoumaga.

L'a-ti plus bèu que de l'amigo
De countempla lou sen round, lou front lis,
Lou tout que douno l'enterigo
De noun pousqué bais o coutigo?
Lei prepaus lei plus sot em' acò soun esquist.

Subran restountisse l'ourgueno
E la campano a fa lou rabaiet.
Intren lèu: la baumo es mai pleno;
Lou grand ófici s'entameno
E si vèlo l'autar coumo d'un fum bliuet:

Lei diacre, en viro-vouto espesso,
Brulon l'encèns, puei de prèire noumbrous
Soulenamen canton la mессo
E la foulo bèn vite es presso
D'un sant recuimen au souen dei cant piouss.

— ITE! nous canto puei lou prèire,
Mai nouéstei gènt sabon pas lou latin
E rèston, d'autant mai qu'à rèire
Dei lumenié carga de vèire
S'aubouro sus lou coup un councert celestin.

O santo, o grando santo,
Avèn en tu recous!
Dins la vi do angouissanto,
O grando santo,
Assousto-nous!

Dóu tèms que touto l'assistanço
Redis la prègo, un bèu doumenican
D'un pas lènt, majestous, s'avanço
Davans l'autar e sa prestanço
Fa 'no impressien... Ensin countuniavo lou cant:

Santo Madaleno,
Dins sa pas sereno,
Touca de tei plour, Diéu t'a fa mounta:
La gènt pecadouiro,
Umblo, si doulouiro:
Fai jita sus elo un rai de bounta.

Mai coumo la voues serafico
Fa 'no pausetò à la fin dóu couplet,
D'un signe coupant lou cantico:
— Oh! si, lou pople ti suplico,
Clamo lou paire blanc, car pòu rèn tout soulet.

As soufert coumo éu, grando santo!
Vuei, ti suplico: escouto, escouto-lou!
Baio toun ajudo puissantò
Pèr que la fedo foulejanto
Crussisse pas deman souto la dènt dóu loup!

Es en trin: pròchi de miechouro,
Soun verbe ardènt nous fa bouï lou couer:
Veici, bèl iéli que desflouro,
Veici la Madaleno quouro
Si viéuto dins la fango e pren lei camin touert;

Veici qu'au just mesprés dóu mounde
Elo tèn pèd; veici sa redemcien!
Veici dins lei plour en abounde
Que, repentèto, elo si founde;
Veici qu'emé Jèsus subisse la passien.

Puei nous depinto sei soufrènço,
Sa soulitudo en aquéu trau negras,
E dóu vieiun souto l'ófènso
Nous fa vèire sa descasènço;
En dous double la vian s'aluncha perabas:

Va recebre lou pan de vido
Encaro un còup dei man de Meissemin;
La vian quouro toumibo avanido
E quouro soun amo ravidó
Si deliéuro dóu cors sus lou bord dóu camin.

Alor tout lou cèu es en fèsto
Pèr saluda l'amigo dóu Segneur:
Vuei sa puissanço es manifèsto
E soustendra nouéstei requèsto,
S'avèn pèr soun Jèsus un pau de soun amour...

Mai a fa, l'ardènt presicaire,
Proun longo jouncho e, ma fe, n'en pòu plus:
Si pauso,... puei vers lei cantaire:
— Cantas un pau! li dis... E l'aire
Ause la douço voues que lèu mouno au trelus:

Mai-que-mai poulido,
Ta marrido vido
Dins tout lou païs fasié sensacien
Sus tu, la gourrino,
La gràci divino
Vujè sei tresor de benedicien.

Toun ardour impuro
Pèr la creaturo,
La pourtères touto à toun creatour:
Toun amo lavado
E purificado
Si dounavo touto au divin amour.

Dins aquesto baumo
Cercant la calaumo,
Toun cors s'es, trento an, en plour counsuma:
Juèse avié di: Fremo,
Seco tei lagremo:
Restara, toun noum, perqu'as foueço eima,

Tant de penitènci
E de repentènci
Soun pèr lou Segnour de titre agradiéu:
Mistico amourouso,
Siés vuei pouderoso:
Ta voues es ausido au trone de Diéu.

— Dounc recebon sa recoumpènso,
Repren aqui lou bèu presicadou,
De nouesto santo lei soufrènço
E lei plour... Sa coumpatissènço,
Amor d'acò, la gardo ei pàurei pecadou.

E de la santo en grando tiero
Lou paire blanc nous conto lei benfa...
— Pèr lou regrèt, pèr la preguiero
Auren dounc soun ajudo entiero,
Se coumo elo sabèn de nautre triounfa!

D'un signe de crous benissèire,
Lou paire acabo aqui sa dicho... — Amen!
Respouende lou pople... e, cresèire,
Prègo coumo l'a di lou prèire;
Dou cantaire suau lou cantico repren:

As douna la glòri emé la vitòri,
Quand t'avien pregado, ei famous guerrié:
Au founs de soun amo,
Ti disien sa damo,
En ti remerciant, lei fièr chivalié.

As douna fisanço
E toun assistanço,
Dins sa duro esprovo, à de malurous;

As rendu la vido
Bèn mens amalido
E la santa memo à de malandrous.

Pèr sa fe prefoundo,
As rendu fegoundo
De maire de rèi e de pèd-terrou,
Souspirdóu couer qu'aimo,
Ta favour l'embaimo:
Ause lei doulènt e leis amourous!

Aquéu darrié mot l'esperavon
Lei jouinei gènt: emé seis uei couquin
Roso e I ouiset si regardavon,
Jano emé Pau si pessugavon
E toutei 'mé que couer anèron au reTrin!

O santo, o grando santo,
Avèn en tu recous!
Dins la vido angouissanto,
O grando santo,
Assousto-nous!

Es acaba lou sant ófici
E nous fa gau de retrouba l'èr pur.
Que de mounde!... Es un artifici,
Dirias, que lou divin servici
Ague pouescu 'nfourna tant de gènt dins l'escur.

Davans lou porge l'esplanado
Es touto negro... e fau un bouen moumen
Pèr que la foulo, abandonado
Plus qu'à sei plan de la journado,
Pèr lou grand escalie s'escouele lentamen...

— Embarcas-vous emé lei fremo,
Dis Pau, serés pancaro pèr parti!
— Diés pas que soun toutei lei memo?
Es pièji, acò, qu'un terro-tremo!
Dous jour de calignan t'an douna repenti?

Jóusè sevère li rebèco.
L'autre repren: — Anen, que vas cerca?
Un pau d'escàfi es pa 'no brèco
A l'amour e countènt li bèco,
Ei dous prepaus, aquéu qu~uno fes l'a beca.

— Es perdu' as perdu ta pouleto,
Fèlis li vèn, que barjaques ensin?
— Perdado!... Es pa 'nado souleto
Darrié l'autar pèr, tremouleto,
Béure un goubelet d'aigo au miraculous bacin.

— Ah! bon, coumo acò si devino!
Dins l'aigo fresco an besoun de pouna
Pèr nega 'n fue que lei rabino...
Ma maire fa 'nsin ei galino,
Quand troup clueisson l'estiéu e lei vòu despouna.

De Titin la dicho insoulènto,
Pau, d'un gautas, la coupo: — D'aquéu fue
Saurras que l'aigo benfasènto
Garrisè pas, mai l'amo ardènto
Pouso un dous recounfouert à la fouent dóu sant lue.

— Si serien pamens pas negado,
Pèire fa mai, que lei vian plus sourti?
Vau vèire... — Tè! lei pessugado!
Lei vias?... — Dins la foulo amagado,
Degan leis avèn visto, adès, quand an parti!

— Alor, vèn Claro risouleto,
Tant bèn planta, n'esperavias d'aqui?
Croumpas-vous dounc ùnei luneto!
Que plan! — Aguste, à la beveto,
Nous a paga 'n cafè 'm' un pau de riquiqui!

Aro crompo dins la boutigo
Sàbi pas que... — Li vau, qu'ai pantaia
D'uno crous d'or pèr moun amigo!...
Rede, Aguste vèn e nous ligo
Un riban sus lou piés: sian tóutei medaia!

— Vivo lou Menistre! si crido.
Eu, boueno gènt, nous dis: — E se partian?...
L'idèio es, certo, pas marrido,
Car faudra proun courre bourrido
Pèr s'acampa, de vèspre, à l'ouro dei bóumian.

Prenèn dounc lèu la descendudo
E rescountran enca de gènt tardié
Qu'escalon... Roso es mai vengudo
Coumo adematin sournarudo:
Soun Louiset, tout-escas, proun mau countènt, partié:

Emé Charlot e sei coulègo,
Van, segound l'us, jusquo à Sant-Meissemin,
E, coumo an de faire cinq lègo,
An trouva 'n ami que soun ègo
Em' un bouen càrri va l'avala lou camin...

Roso a 'ganta lou bras de Jano:
— Que! li mur.muro, anan au Sant-Pieloun?
Mi diras... Mai cregne uno engano
E tastejo... Ve, siéu proufano
En acò!... Quand seren, adaut, au nis d'eigloun,

Seras bèn bravo de mi dire
Coumo si fa, sabes, co que m'as di...
— Ah! bon, fa Jano em' un sourire,
Ti metes pas l'amo au martire
Que, vai, lou marrit sort, lou pourras escandi.

T'apprendrai, iéu, coumo fau faire..
— A iéu tambèn? Mouninejo Lisoun.
— En touei doues... E, touei doues, pecaire!
Fau peno à Jano soun desaire:
Oh! bello, avès pres fue coumo d'escandihoun!

Anen! tournarés lèu galoio,
Mai sus l'erbetto, avans que d'escala,
Fau que, pèr prendre un pau de voio,
Curen lei biasso... — En bas, au boio,
Leis ami despachous deja soun istala.

Sian pas soulet. Souto l'oumbràgi,
Tant qu'an pouscu proche la Fouent de Nans,
Sus lei pèndo, lei racinàgi,
Lei roucassoun o lou fuiàgi,
Lei famiho an campa. Nautre aussi dejanan...

— Zóu! bello, de faire ripaio,
Aguste crido, avès panca fini?
Fau que mounten!... Roso dis: — Saio!
Es deja drecho e touto en aio;
Mai, vès, de quàuqueis—un la voio a demeni.

Quand mi parlas!... La panso pleno,
Fèlis nous dis qu'a plus ges de vigour.
Si ca~rreja 'mé sa bedeno
Fin qu'adamount!... La Madaleno
Sènsò ajudò aurié pas mouata sèt còup pèr jour!

— An! lei plus courajous! fa Pèire.
E nous lançan sus lou còup à l'assaut
Dei dur pendis. Mi sèmblo vèire
Un avé lanu boumbissèire
Qu'entre leis éuse verd mounto lipa la sau.

Mai Jousè, Claro, Lisoun, Berto
An fa lou tour pèr prendre à l'ouradou
Lou camin mountagnen... Alerto,
Lei jouino lei plus disaverto
Soun tout just lei proumiero au sant recatadou

Qu'es doi Parisen la capello:
L'escourchi es rede e pas foueço plus lèu
Vous meno à la rouino enca bello
Qu'es, soulitàri, en sentinello
Au coude dóu camin: l'escalàgi es pas brèu...

Aro plus rudo es la mountado
E si n'en fa de tour e de countour
E sus lei pèiro d'esparrado!
Vès, miechouro d'escarlimpado
A la cimo vous ausso e pas sènsò susour.

Mai li sias: eila la capello
Qu'es voueste but; avès plus qu'un grimpet...
Poudès agué visto plus bello?
Sadoulas-vous de regardello
Edóu bouen èr qu'eici lalejo o fa tripet,

Mai que quàuquei fes vous enraumo:
Avisas-vous!... Coumo vias, eici sian
De l'auto mountagno à la caumo
E just au dessus de la baumo:
Devistas, mai plus larg, ço que d'en bas vesian...

A l'adré tambèn es requisto
La majesta dóu vaste amiradou
Que si presènto à vouesto visto:
A flo lou soubeiran artisto
Dins la baisso a 'scampa de site charmadou.

Au pèd dei pèndo mountagniero
Ribous soumiho, au cagnard estendu,
Puei Cujo emé sei pegouliero
E sei tapeno: sa tubiero
Vous lou fa devina, dei grand pin escoundu.

De l'autro man capitas Signo
E soun castèu toumba 'n frun sus l'autour;
Puei au bout de la memo ligno
Lou front de Faroun vous ensigno
Mounte Touloun fouguejo en sei richeis atour;

Puei lou Bausset, puei la Cadiero
Sus un rountau assetado au soulèu,
Sant-Cèri e sa plajo galiero,
Puei vers lou pounènt, lei darriero,
La Ciéutat e soun isclo à l'orle dóu tablèu.

Dins un fres eserin de verduro
Lei vilajoun s'escoundon à mita
E fan, lei flot de la mar bluro,
Uno incoumparablo centuro,
Que l'auro e lou soulèu coumplisson sa bèuta...

O mar belasso, O mar sublime,
Plus bello enca t'ai visto en pleno nue:
Avian escala 'quéstei cimo
Emé l'ardour fouelo qu'animo
Lei jouine, e veguerian uno pluejo de fue.

De Sant-Jaque de Coumpoustello
Lou camin blanc au cèu sin trelusié
Clavela de milanto estello,
Sei beluguejàntei parpello,
Alin lou fiermamen en tu si retrasié;

Eres unido e pausadisso
Coumo un mirau, e la luno d'argènt,
Dins sa desciso fugidisso,
En si couchant, rebaladisso,
Estirè sus tei flot un large rai lusènt.

O resplendour,meravihouso,
Divino visto, as resta dins meis uei!
Ti reviéu, o mar ufanouso,
Coumo dins la nue radiouso,
E coumo alor moun couer trefoulisse au-jour-d'uei!...

Noun es pamens aquelo glòri
Que voulian vèire à l'aubo de Sant-Jan:
En un superbe óusservatòri
Venian bela d'àutrei belòri,
Un usàgi plasènt, de mai, nous l'engajant.

A travers l'atmosphèro puro
Vesian, dóu tèms, regiscla d'or foundu
Au front de tóutei leis auturo:
Davans l'esclat de la naturo,
Nous-autre, o bèu soulèu, badavian, counfoundu...

Mai dei sublimei jouïssènço
Leissen un pau lou remèmbe dourmi,
D'autant que de sàntei cresènço
E de poulidei souvenènço
Nous enebrien lou sèn, vuei dei legèndo ami...

D'àngi la troupo blanquello
Aussavo dounc la santo pecairis
Sus aqueste ro: palinello,
Dins uno estàsi encantarello,
Elo ausissié lou cant deis àngi au Paradis...

Auto e fourmidablo qu'estouno,
La paret drecho, au dessus dei valoun,
Antan quihavo uno coulouno
De maubre blanc, linjo e redouno,
Moustrant lou bèu miracle: èro lou sant pieloun.

De siècle, au mitan deis eslùci,
Lou mounumen avié brava lou tron;
Obro de fe, d'art e de lùssi,
De man impio, man destrùssi,
Un jour sus lou roucas l'embriguèron lou front.

A sa plaço l'a 'no capello,
Diguen lou mot, un paure cabanoun.
Mau-grat que rèn la fague bello,
La remembranço eis us fidèlo
De l'encian mounumen l'a counserva lou noum.

Ah! n'es lèu facho la vesito!
Sus sei bancau, à la calo dóu vènt,
S'à faire pauso vous envito
La fatigo, noun vous encito
La bèuta de l'abri tout -just propre souvènt...

— Oh! bèu Segnour! s'escrido Berto:
Mai noueste Aguste es de viéure sadou?
Aqueste, tèsto disaverto,
De vèntre, à-n-uno man duberto,
S'èro tirassa 'u bord de l'aut debaussadou.

Tranquile, éu recuelo e s'aubouro.
— O, dis à Pau, si vèi bèn quaucarèn;
Sèmblo coumo quand lou tèms plouro
Sus un campas e que l'aflouro
Lou pèd fangous d'un muou qu'à l'estable revèn.

Nouésteis ami li fan la rodo:
— As vist, li dien, lou fèrri de chivau?
— Vegués-lou tambèn! La metodo
Es bessai pas dei plus coumodo;
Pourrias toujours pourta l'entre-signe adavau!

Uno nue de tempèsto afrouso,
Un cavalié qu'erravo dins lei boues,
Aguènt perdu la routo blouso,
Faguè 'no prègo fervourouso
A l'amigo de Diéu de lou tira d'ancoues.

Tout d'un-còup lou chivau s'aplanto;
Bah! l'ome en van pougne de l'esperoun,
Quand l'esluciado esbribaudanto
Dins uno vesien esfraianto
Li mouestro lou debaus que l'es de-retenoun.

— Oh! l'espaventable espetacle!
Dé li pensa, dis Claro, mi fa mau.
— Hoi! l'as fe coumo à-n-un ouracle?
— La pèiro duro pèr miracle,
Dis uno outro, a garda la piado dóu chivau.

— E poudès meme l'ana vèire;
Dis mai Aguste: e tu, Jousè, voues pas?
— Oh! iéu, noun; àimi miés va crèire!
— E Titinet si tèn à rèire
Eu que...? Mai Titinet, alin, à trento pas,

L'a 'n bouen quart d'ouro que carrejo,
Proun afouga, de pèiro dins un trau:
Coumo éu Martouno coudelejo;
Pèire li crido: — Aurias pa 'nvejo
De l'aclapa de vuei emé quàuquei caiou?

Sabès, s'emplisson pas d'eigagno
Lei gros valat. Or vous atrouvarés
Qu'aqueste trau dins la mountagno
S'enfounso en tournejan e gagno
Uno grand salo basso e tant founso, saurrés,

Que cle la baumo un cant trepano.
— Eh! bèn, pichot, riscas pas de l'empli.
— Deis argousin troumpant l'engano,
Gaspard de Besso e sa bajano
De gus venien-ti pas alin s'enseveli?

— Es bèn co que dis la legèndo.
Couesto pas rèn de va crèire, parai?
— Noun!... Mai de prendre la descèndo
Serié pas tèms — Ato! à la pèndo
Lei cougourdo li van! — Ti n'en fises pas, vai!

Segur va diras plus tout-aro.
— E noueste mounde es tout aqui pamens?
Manco pas quaucun? — L'a pas Claro!
— Moute es? — Tè! mi vèi pas, mascaro!
— Lisoun? — E Jano? — E Roso? — An parti, l'a 'n moumen!

D'efèt l'a 'no bravo passado
Que tóutei tres soun anado eilabas;
Regardas lèi proun afougado;
Van e vènon; soun agrouvado
E fan lou castelet à l'oumbro d'un ribas.

Emé tres pèiro loungarudo
E liso fan un claus de tres cantoun
E n'en meton uno boumbudo
E roundo au mi.an: sournarudo
Uno dicho acòumpagno en guiso d'ouresoun:

Degun pòu dire s'es au diable
Vo bèn à Diéu que va l'encantacien.
Lei jouvo an pèr incountestable
Qu'auran de l'amour inefable,
Avans la fin de l'an, la realisacien.

Mai derroumpe l'escrèt mistèri
Aguste qu'es un afrous mescrestent:
— Pausus, dis, voueste treboulèri!
Acò vous fa coumo un cautèri
Su 'no cambo de boues: sias tres fadado ensèn!

Dóu couvènt ausès la campano!
Nous dis que sian deja bèn en retard.
Iéu, dóu bouenur sàbi l'arcano;
La cregnèncò, pichoto, es vano,
Emé vouéstei mourroun, que l'amour vèngue tard!

Zóu! descenden!... La davalado
Es rapido: ai! s'embrouncan, resquihan:
Pèiro, racino à l'abrivado
Pousson: — Digo, ami, man levado,
S'en de camin parié lei cougourdo li van!...

Tè! lei marchand lèvon la fiero!
Zóu! vite un còup d'aigo fresco à la fouent!
La descèndo aro es plus lóugiero,
Nous féutrant lou pas lei féusiero.
De la campano mai nous arribo un ressouen.

Mai noun oublidon soun prougramo
Leis amourouso: à gaucho dóu camin
An pas manca, lei finei lamo,
Uno draiolo dei plus flamo
Qu'ei couer tènre deja douno un urous fremin.

Sian dins uno ombrouso esclargiero:
De la fourèst salut au segne-grand!
O, soun estampaduro autiero
Nous dis bèn qu'uno longo tiero
De siècle an trecoula sus lou frontdóu gi~gant.

Mai la legèndo nous despasso:
Nous dis pas quand l'aubre fuguè planta,
Mai que, fugènt la calourasso,
L'estiéu, la Madaleno lasso
A l'ombro d'aquéu chaine eimavo de resta;

E loungamen li pantaiavo:
Amour encaro, amour pur, amour dous,
L'amour toujours la travaivo
E 'm' uno pèiro que taiavo
Dins la ruscodóu rouve un jour gravè 'no crous.

La crous a resta dins l'escorço.
L'aubre a grandi d'un crèis proudigious,
Vers lou cèu 'mé de nòvei forço
Sèmpe aussant sei brancasso torso
E soun pèd devenènt, dirai, miraculous.

Li fan tout-bèu-just la centuro
Sièis ome emé sei dous bras estendu:
Leis an, dins soun escorço duro,
L'an fa de longuei raiaduro
E la crous rèsto enca dins lou suve fendu.

Pèr l'amour pur ensin cavado,
Es naturau que fugue, aquesto crous,
Pèr l'amour pur uno man-fado;
Touto amourouso mal-astro
De sa planeto dounc pourra chanja lou cous:

Tres còupdóu chaine venerable
En pieta vendra faire lou tour;
Tres còup dóu relicle adourable
Beisara lou tai perdurable:
Avans la fin de l'an granara soun amour...

Vau miés doues assistanço qu'uno
E lei jouvènto adeja fan soun trin.
De ta toumbado inóupourtuno,
O Roso, auras plus de rancuno,
Perqu' as doues sauveta contro un marrit destin.

Mai, zóu! soueno mai la campano!...
Arriban just pèr la benedicien
E la preguiero soubeirano,
E, sus l'entrinamen de Jano,
Cadun au darrié cant respouende em' afecien:

O santo, ô grando santo,
Sian tóutei d'amourous:
Ta favour es puissant;
O grando santo,
Assousto-nous!

EPILOGUE

Retour

Lou brout de tueis. - Adiéu à Giniés. - Sant-Jaume. - La clastro de Betanio. - Darrié salut à la baumo santo. - Coutrouno. - Roussargo. - La sourso dóu téule. - Uno belugueto l'alaseto e lou sausin. - Lou tremount dóu soulèu. - Lou valoun de Segnouro. - Leis amouró dóu vièi jas. - L'aigo cascaio dins sa gouergo. - La nue arribo e vite aluman lou fanau pèr noueste ai. - La capello de Sant-Jan-de-Garguié. - La luno alumino la plano. - Aubagno a de lusour d'encèndi. - Venèn de la Santo-Baumo! dis Titin qu'es bèn las. - Chascun au siéu. - O grandó santo, marido-nous!

Noueste ai fa dinda sei sounaio:
A seis eissàri aro bèn plus lóugié
E dous jour passa sus la paio
L'an redouna voio e jugaio:
Que s'endouerme en camin l'aura pas de dangié.

Mai que l'ai Titin a sa cargo:
De verd-bouisset, d'oudourous cabro-fuei,
Branco de liéu, ramo d'espargo,
Un aubre que marchó e s'alargo:
Cadun, pèr souveni, li pren un brout de tueis...

Adiéu, bello fouent cantarello!
Adiéu, Giniés, sejour tant agradiéu!
Adiéu, demouero assoustarello!
Douço armounio bressarello
De la fourèst sacrado, oumbràgi fres, adiéu!

Lou soulèu caufó, mai la plano
A peraqui de rode charmadou
Que la calour just li trepano:
Serié ma joio soubeirano
De li faire amaga moun poulit chaumadou.

A travès de jóuinei pinedo
Prenèn dounc vanc pèr noueste gai retour.
Sant-Jaume sus sa roucaredo,
Coumo un pastre gardant sei fedo,
Nous regardo passa. Saludan à soun tour

Betanié, la clastro sereno:
De pàurei fiho à l'amour an beca
E, l'amo d'asprour touto pleno,
Vènon, coumo la Madaleno,
A Diéu demanda gràci e ploura sei pecat.

E tu qu'au flanc de la mountagno
Siés plus qu'un pouein, o baumo santo, adiéu!...
E, zóu! sènso mai de lounagno,
Zóu! davalen, acò 's coucagno!
Darrié mèste Martin que marchò d'un pas viéu.

Quita lou Var, passan Coutrouno,
Passan Roussargo: avèn marcha, carèu!
La sourso dóu téule eici douno
Uno ombreto proun galantouno
E d'aigo fresco: eh! bèn, se prenian un moussèu!

— Aguste a 'no idèio preclaro;
Vivo, dis Pau, l'aigo fresco e l'amour!
— Crides pas tant fouert! li dis Claro;
Bévi un coup e vas entendre aro
Uno vièio cansoun que douno un pau temour:

Au pèd d'uno sausetò
Uno aigo sourgissié;
Souvènt uno alauseto
Au mirau s'adusié;
Un sausin alejavo
Chasco fes à l'entour
E, d'abord, s'abéuravo
D'eigueto e noun d'amour.

Elo èro poulideto:
Dins l'aigo lou vesié;
D'èu la traito langueto
Autambèn ié disié:
Elo proun l'escoutavo
La disènt facho au tour
E lou gus s'abéuravo
D'aigo fresco.... e d'amour.

I'aguènt tout pres, paureto,
Aro, éu, la fugissié,
E, tristo, l'alauseto
Dins l'aigo se trasié.
Vai bèn que s'ensauvavo;
Venguè plus à l'eissour;
Uu pau tard redoutavo
L'aigo fresco e l'amour.

— Brave! brave!... Es pas d'aigo fresco,
Ni mai d'amour, que vous sias abéura,
Vautre! Coumo avès pita l'esco!
Acò 's proun lesta la ventresco,
Emé musico encaro!... An! zóu! fau s'auboura!

Lou soulèu tout-aro trecouelo;
Sera bouen, vès, que siguen. au coulet:
L'ouero vite, en montant, s'escouelo
E pèr sourti puei de la couelo
Avans la nue, faudra faire de gavelet.

— Vai, dins lou valoun de Segnouro
Si perdren pas! — Vau miés ana de jour!...
Au coulet, lou soulèu, qu'aflouro
Garlaban, enca nous coulouro
De sei raïoun mourènt, sei darrièrei roujour.

Lou quitan avans que nous quite:
N'ous enfousan coumo dins un embut
Emé lei virouioun necite
Pèr que siegon ni viéu ni vite
E nous menon dabas au valoun, noueste but.

Lei cresten enca 'n pau rougejon
Quouro enregan lou fin founs de la vau:
Proche un jas, d'amourié negrejon;
Martouno e Titin li boundejon
E revènon moustous coumo un cuou de tignau.

— Boudiéu! qu' 's aquesto pichouno?
Pèr l'apropri la fau metre au lissiéu!
Crido la maire de Martouno.

Avès vist caro tant negrouno?
Juèse! la maluroué que tau chauchoun es siéu!

Martouno escampo de lagremo
Que sus sa pèu fan pas meme un regoun.
Fèlis vou amansi sa fremo:
Co que diés la laisso la memo;
Trouvaren d'aigo eila: lavo-li lou mourroun.

Mai Claro: — Acò va pèr lou mourre,
Mai lou faudiéu? — Parié, iéu, m'avenguè:
Em' elo auriéu pouscu councourre:
Vesti de blanc, anèri courre
Dins un carrat de favo! — E ta maire riguè?

— Noun!... l'endeman faguè bugado..
Que vous dirai? Claro respoundè rèn.
Aurias ferni de sa pensado...
Plus bas mounte à nouesto valado
Uno outro s'embessouno, à la ribo d'un bèn

Uno eigueto lindo arribavo.
Claro prenié sa pichouno, e lei bras,
Lei man, la caro li lavavo:
Emé ràbi li lei fretavo:
Acò li fasié rèn, freto que fretaras!

— Anen, ensin n'a proun, vai, Claro!
— Eto, es poulido! — Arribaren de nue!...
Certo, bravamen ombrejo, aro,
Souto lei pin: la lus avaro
Tout-bèu just enca 'n pau ilumino lei pue.

Filan. Crueisson dins la peiraio
Nouéstei soulié; tout lou long dóu valoun
L'aigo dins sa gouergo cascaio,
Mesclant sa cansouneto gaio
Au brut de nouéstei pas em' à nouéstei cansoun.

Mai negrejo coumo la pego
Souto lou pouent que finisse la vau.
Mèste Martin, sa voio plego

E pèr que noun cale sa plego,
Proufichant la leiçoun, aluman un fanau...

De Sant-Jan la vièio capello
Soumbrejo aqui sus lou borddóu camin.
Jousè galejo Roso: — Bello,.
S'intraves metre uno candèlo?
Sant-Jan ajudarié tambèn à toun destin!

— Coulègo, diés acò pèr rire!
Voues que Sant-Jan favourise l'amour?
Si despacho, Aguste, de dire;
Dei couièti serié lou pire:
Saup tròup bèn qu'a, pèr éu, perdu la tèsto un jour!

De galeja de fes assouelo:
D'aquélei fien Roso trefoulissié,
Riserello coumo uno fouelo...
E nasejant darrié lei couelo,
Aurias di que la luno elo-memo risié!...

Uno lusour s'es espendido
Sus tout lou plan: blanquejo lou camin:
Uno negrour mau definido
De Vèuno es l'aubriLo endourmido:
Coumo un.encèndi, Aubagno es rouge aperalin.

Dóu vèspre troublant la calaumo,
Nouéstei pas lourd endicon que sian las:
Titinet lou mai fa la paumo:
— Hè! venèn de la Santo-Baumo!
Dis au proumié que vian, mai li va dis bèn bas:

Ero tant fièr à la partènço!...
Oh! d'arriba, toutei, nous fa plesi.
Coumo pèr nous faire acuiènço
Pico dès ouro: à l'avenènço
Dei gènt de teni tèsto avèn pas lou lesi:

Sian las. — Adessias! — Diéu vous crèisse!
E vers lou siéu cadun va lentamen:
Soul leis amoureux soun perplèisse:

Quand dins la nue an desaparèisse,
Ausi Jano qu'à Pau murmuro tendramen:

O santo, o grando santo,
Ve, sian dous amourous;
Ta favour es puissant:
O grando santo,
Marido-nous!

Aubagno, pèr Santo-Floro,
lou 24 de Novèmbre 1926.



© CIEL d'OC
Mai 2001